



BIBLIOTECA NAZ.
Vittorio Emanuele III

XVIII

C

28

NAPOLI



XVIII C 22

CAROLI ANTONII DE MARTINI

S. C. R. A. M. IN SUPREMO JUDICIORUM TRIBUNALI
A CONSILIIS AULICIS ET P. P. O.

POSITIONES

DE
JURE CIVITATIS

IN USUM
AUDITORII VINDOBONENSIS.

EDITIO ALTERA.



VINDOBONÆ

Typ. JOANN. THOM. NOB. DE TRATTNERN,


SAC. CÆS. REG. AUL. TYPOGR. ET BIBLIOP.

MDCCLXXIII.





PRÆFATIO.

 *uæ septem abbinc annis in
usum Regii Principis Sere-
nissimi Archiducis LEO-
POLDI nunc Magni Hetruriæ Du-
cis adumbraveram Juris Naturalis &
Gentium elementa, ea facile in scri-
niis meis svissem delitescere, nisi quod
simul inde ab hujus Universitatis Vin-
dobonensis instauratione Juris Professo-
ris fungor munere, non ultra alienos li-
bellos prælegere, atque ad meas ratio-
nes adcommodare, sed proprium quale-
cunque opusculum in lucem edere fuis-*

P R Æ F A T I O.

*sem jussus. Est autem in scholis austriacis ea jurisprudentiæ tradendæ præscripta ratio, ut primo anno tyronibus illa tantum juris naturalis pars, quæ officia hominis vel simpliciter, vel in minoribus societatibus considerati complectitur, tum romanarum legum historia, & institutiones explanentur; jus vero civitatum universale quarto demum anno tamquam lucidissima juris publici Germaniæ fax auditoribus præferatur. Quum igitur AUGUSTO beneficio prior mihi sparta obtigisset, illa quoque juris naturalis capita, quæ ad ductum meorum auditorum pertinebant, in breves positiones conjecta jam pridem *) publici juris feceram. Interea jura civitatum initio tradebantur ad filium Hennin-gii Boebmeri, in cujus locum tamen, quod is licet Philosophum professus in the-*

*) Anno 1762.

P R Æ F A T I O.

theologicas quæstiones sæpius & acriter impetum faciat, libri Hugonis Grotii de jure belli & pacis postea substituti sunt. Equidem eximium esse hoc opus ac diurna nocturnaue manu ab iis versandum, qui ad solidam jurisprudentiam contendant, nemo harum rerum peritus iverit inficias. Sed præterquam quod uberrima ubique eruditio illius lectionem multis effecerit difficiliorem, pluraque juris naturalis capita jam profundius investigata & pleniore in luce constituta sunt; nec id latere potest magni Grotii lectores, eidem non tam de officiis imperantium, quam de juribus populorum inter se agere propositum fuisse. Ne igitur juris auditoribus necessarius principiorum nexus in universa jurisprudentiæ philosophicæ disciplina deesse videretur, illud quoque mihi commissum fuit, ut alteram juris naturalis partem, scilicet jus publicum universale & gentium,

X 3

P R Æ F A T I O.

tium, seu jus civitatum typis evulgarem, cujus descriptum exemplar pluribus abhinc annis frater meus in Academia Theresiana auditoribus suis prælegerat. Qua in re instituti mei tenendi causa, observationes ab antiqua & recentiore historia petitas, humaniorum literarum testimonia, tum exempla singularia, primo meæ scriptionis scopo potissimum adcommodata, ab hujus etiam libelli editione ressecanda esse duxi, longa experientia edoctus, rationem breves & inter se cohærentes positiones prælegendi, cum studiosæ juventuti, tum ipsis Doctoribus admodum esse commodam. In magna sane auditorum copia non idem omnibus intelligentiæ vigor a natura tributus est, igitur qui non adeo abundant ingenio, neque longiora capiunt ratiocinia, servata isthac brevitate universales integræ disciplinæ regulas memoria complecti, atque in
suc-

P R Æ F A T I O.

succum & sanguinem convertere facilius possunt.

*Iti vero, qui acriore pollent mentis acie, si modo recte cogitandi & differendi arte sint imbuti, ad vivam docentis vocem fiunt attentiores, multaque e paucis percipiendi ac deducendi omnem habent opportunitatem. Id jam olim moverat summos viros Sam. Pufendorfium & nostra ætate Cbrist. Wolfium, ut suæ jurisprudentiæ naturalis opera in parvos libellos contraherent probe gnari moniti Horatiani *):*

Quidquid præcipies, esto brevis, ut
cito dicta

Per cipiant aimi dociles, teneantque
fideles

X 4

Cu-

*) *Art. Poet.* v. 235.

P R Æ F A T I O.

Cujus rei causſam præclare adduxit Demetrius Cynicus apud Senecam)*
 Plus nimirum prodeſſe, ſi pauca præcepta ſapientiæ teneas, ſed illa in promptu tibi & in uſu ſint, quam ſi multa quidem didiceris, ſed illa non habeas ad manum. *Sed & illi, qui in Academiis obeunt docendi munus, optime norunt, quam plena tædii & moleſtiæ res ſit, longa commentaria novis commentationibus cumulare. Multa præterea dies & littura coercet, ut adeo interſit omnino docentium, poſitis ſemel ſummis materiarum capitibus & regulis, liberioſorem retinere interpretandi facultatem. Si enim e quibus locis, quaſi theſauris argumenta depromantur, artificio & via tradatur, ea res efficit, quemadmodum a Cicerone acutiſſi-*

*) De Benef. VII. c. I.

P R Æ F A T I O.

tiffime observatum est, Ne necesse sit iisdem de rebus quasi dictata decantare, neque a commentariolis suis discedere. Nam qui sciet ubi quidque positum sit, quoque eo veniat, is, etiam si quid obrutum erit, poterit eruere, semperque esse in disputando suus.) Quapropter ea juris civitatis fundamenta adferre, ac stabilire conatus sum, quibus positis, quæ sunt ad cognitionem totius disciplinæ satis, innumerabiles aliæ nascerentur conclusiones, nec ulla jam de naturalibus populorum officiis occurreret quæstio, ad quam ab artis cogitandi perito ex iis, quæ tradita sunt, non posset responderi. Quid? quod nec eorum deficiunt exempla, qui certa alioquin principia respuunt, ubi de consuetariis etsi legitimo nexu inde fluentibus simul fiunt certiores? scilicet*

X 5

hi

*) De fin. IV. 4.

P R Æ F A T I O.

hi animo præconceptis opinionibus semel occupato cæcutire in media luce, quam errorem agnoscere malunt. Itaque præstat aliquando primum supremas exponere regulas, easque generatim demonstrare, ut his penitus haustis, inde quisque veritatis victus viribus, etiam singularibus legitimis conclusionibus cogatur tandem adsentiri. Ut autem methodi, quam in exponendis aut illustrandis positionibus amplexus sum, aliquod specimen præberem, exercitationes sex, quibus tota jurisprudentia naturalis contemplativa continetur, secundum ipsarum positionum ordinem in lucem protuli, ceteras etiam partes vulgaturus, si vitæ satis, atque otii superfuert. Erunt fortasse non pauci, qui officia imperfecta ad jurisprudentiam naturalem a nobis revocata fuisse reprehendent, sed satis, ut opinamur, hanc caus-

P R Æ F A T I O.

causam egimus in exercitatione sexta,)
nec spernendis argumentis comproba-
vimus, obligationes imperfectas contra
veterum morem, receptumque commu-
nem loquendi usum a nostra disciplina
perperam separari. Officia quidem im-
perantium, quæ pacto unionis civilis
nituntur, ad perfecta pertinere nun-
quam dubitavimus, at nihilominus po-
pulo subiecto armatam resistantiam do-
cuimus esse omnino denegandam. Quis
enim malum majus anteponat minori?
quis, quum non possit accidere tempus,
quo subsidia non sufficiant leniora, du-
rioribus tamen adbibendis auctor sit?
Quare juris perfecti & imperfecti no-
tiones aliter etiam, quam hodie fieri
solet, in exercitatione quarta**) evolvi-
mus,*

*) *De jur. nat. part. atque usu. §. 214, 215,
216, 235.*

**) *De jur. hom. univers. §. 155. seqq.*

P R Æ F A T I O.

mus, simulque ostendimus Grotium ac Pufendorfium re ipsa nobis haud repugnare.

Universim id erat in animo 'nobis, ut non loco vel tempori serviremus, sed pro summa qua utimur sentiendi libertate, non licentia, palam esset omnibus, veritati soli dictum esse Sacramentum.



ELEN-

ELENCHUS CAPITUM

PARTIS I

I.

De anarchia & fine civitatis.

II.

De civitatis nexu, ejusque jure generatim.

III.

De civilis imperii proprietatibus.

IV.

De jure ferendarum legum.

V.

De suprema imperantis inspectione & jure politica.

VI.

De potestate imperantis exsequente.

VII.

De jure circa bona & munera civitatis.

VIII.

De jure imperantis circa religionis negotia.

IX.

De officiis eorum, qui gubernant civitatem.

X.

De officiis subditorum civitatis.

XI.

De forma imperii & quidem simplici.

XII.

De forma imperii mixta.

XIII.

De modis acquirendi imperium civile.

XIV.

De modis, quibus imperium civile desinit.

ELEN-

ELEN. CAP. PART. II.

XV.

De jure gentium generatim.

XVI.

*De æqualitate gentium aliisque cum eadem connexis
juribus.*

XVII.

De gentium humanitate.

XVIII.

De justitia gentium absoluta.

XIX.

De juribus gentium circa dominia & proprietatem.

XX.

De officiis inter gentes, quæ utilitatis sunt innoxie.

XXI.

De conventis & sponfionibus publicis.

XXII.

De legationibus.

XXIII.

De eo, quod justum est inter gentes circa belli initia.

XXIV.

De eo, quod in hostem publicum licet.

XXV.

De conventis bellicis & pactione pacis.



POSITIONUM
DE
JURE CIVITATIS
P A R S I.
S E U
JUS PUBLICUM
UNIVERSALE.


1122



C A P U T I.

DE ANARCHIA ET FINE CIVITATIS.

I.

uamquam singulis familiarum sociis incumbit, communibus periculis vi unita obsistere, tamen unusquisque patrumfamilias eum domesticorum numerum nec reperire, nec alere semper potuit, qui contra incrementem injuriarum vim plenam securitatem præstaret. Nihil ergo tam consentaneum naturæ fuit, quam domuum singularum rectores ceterarum familiarum auxilium quærere, idque, quo esset certius, mutuo sibi polliceri.

A

II.

II.

Ubi duo aut plures patresfamilias invicem sibi contra externos hostes promittunt auxilia, adest status, in quo persona jus perfectum & affirmativum in personam habet, ut ad mutuæ defensionis finem junctis viribus conspiret. Atque adeo societas concipitur, quæ licet ex societatibus aliis rectoriis sit composita, ipsa tamen æqualis est, siquidem sociorum obligationes, non arbitrio imperantis, sed ex pactiois natura determinantur.

III.

Societas hæc familiarum plurium æqualis, five in *pagis*, five in *vicis* reperiatur, dicitur *Anarchia*, quod in eo statu patresfamilias communi careant imperio. Auctoritas enim, ob prudentiam forte, senium aut fortitudinem, uni ex fociis collata Imperium dici nequit. v. GEN. XV. 13. HOMER. Od. X. 112.

IV.

Hoc in statu patresfamilias aliæque personæ *sui juris* variis quidem in speciem utebantur commodis, libertatis quippe, æqualita-

tatis, belli, pacisque juribus gaudentes. At-
tamen his non contenti in majores societates
coire, communi se submittere imperio, at-
que naturalia illa bona cum subjectione, &
inæqualitate, incommodisque aliis permutare
studuerunt. Cujus rei causam nosse plurimum
interest, quo earum societatum fines, ex
finibus leges & obligationes dignoscantur.

V.

Statui nimirum libertatis incommoda
multo graviora comitabantur, quod ho-
mines seu exiguo præditi ingenio, seu justitiæ
ac æquitatis immemores, propriis opinionibus
& cupiditatibus indulgerent. Quare
nec singulæ domus jure suo quiete frui,
nec, quod ab aliis tribuendum, tuto consequi,
nec contra aliorum insultus se tueri solæ po-
terant.

VI.

Sane huic malo non satis medebatur
Anarchia. Quum enim nemo patrumfami-
lias ab alieno penderet arbitrio, facile inter
socios licet probos erumpebant diffidia, dum,
alia aliis ad commune bonum obtinendum
remedia viderentur aptiora. Inde diffiden-

tiae & similitates, quæ non modo vires ac voluntates sociorum dissolverent, sed & odiis bellisque intestinis viam pararent.

VII.

Nemo tamen existit, qui ad quærendam felicitatem propulsandaque ejus impedimenta naturali non incitetur stimulo. Totâ autem externa, seu hujus vitæ, felicitas in non interrupto perfectionum progressu posita est; cui quam maxime obstabat securitatis defectus, quod nec animi, nec corporis, nec status externi bona satis tutari, multoque minus augere liceret.

VIII.

Ceteræ societates omnes propter hominum sive imprudentiam, sive pravitatem, sive crescentem numerum, sive ingeniorum dissensum hisce finibus consequendis minus erant idoneæ; necesse igitur fuit de arctiore virium & voluntatum conjunctione cogitare, adeoque propter officiorum erga se conflictum, ad majora scilicet incommoda & pericula evitanda, libertatis & æqualitatis, aliaque naturalia jura in commune quoddam transferre imperium, ut ita voluntates singu-

gulorum totius universitatis voluntati subji-
cerentur. Neque enim in Anarchia sperare
licebat, omnes per conspirationem in idem
esse semper consensuros. Cic. *Off. II. 12.*
& 21. *Orat. I. 8.*

IX.

Cœtus hominum sui juris sub eodem
communi imperio securitatis fruendæ causâ
colligatus, *civitas* est. Patet inde civitatem
omnem societate, & quidem rectoria con-
tineri. Est vero ejus forma *Monarchica*,
si imperium penes unum, *Aristocratica*, si
penes plures, *Democratica*, si penes omnes
collectim consideratos reperiatur. Ex qui-
bus elucet, quæ sit obligatio & causâ con-
dendæ civitatis; quodve ejus ab Anarchi-
co statu sit discrimen.

X.

Sufficit ad eum cœtum tanta multitudo,
quanta ad scopum securitatis obtinendum re-
quiritur. Quod enim putavit PLATO quinque
millia & quadraginta, HIPPODAMUS MI-
LESIUS decem civium millia, APULEJUS
quinde m homines liberos, VALERIUS de-
nique M. tres requiri familias, id nullo mo-

do hic attendi potest, quum crescente metu majores semper constitui civitates necesse sit. Illud vero abunde liquet, a solis maribus, aut a solis feminis diuturnam civitatem effici non posse. **FLOKUS L. I. C. I.**

XI.

Debent porro focii civitatis seu *cives* esse sui juris, id est, nec imperio parentali nec herili subiecti, quin tamen singulos familiam habere opus sit. Hinc filii familias & servi, quamvis intra terræ spatium, quod cives possident, seu in communi civitatis territorio *) existant, personæ tamen civiles non sunt. Sed & ipsæ personæ imperantium cives sunt; quare hi in *imperantes* & *parentes* dispescuntur.

* L. 239. §. 8. *de V. S.*

XII.

Commune, quod requisivimus, Imperium propterea non cessat, si societas civilis una plures possideat diffitas regiones, civesque plurimi a se invicem remoti vivere debeant. Etsi & illud aliquando accadat, ut unus sit rector diversarum omnino civitatum.

XIII.

XIII.

Finem denique civitatis primum ac proprium statuimus esse securitatem. Quamquam enim haud negemus, etiam alios secundarios assignari fines posse, hi tamen omnes primitivo illi tanquam stirpi & radici inhærent. Arcentur vero fines inhonesti, ob quos inita societas non civitas veri nominis, sed *turba* est.

XIV.

His præstructis facile erit sententias de causâ condendæ civitatis invicem conciliare. PLATO illam ab hominum indigentia repetit. Sed in hac homines nunquam fuissent versati, si modo quisque perfectioni intellectus & voluntatis dedisset operam, nemo esset otiosus, nec quisquam justitiæ & charitatis officia violasset; non enim primis civitatum conditoribus rerum copia, sed illis secure fruendi ratio deficiebat.

XV.

ARISTOTELES recurrit ad naturæ stimulos. At his tantum conveniunt societates minores & æquales extra civitatem positæ. Ipsa enim *natura quisque magis studet libertati*

quam imperio *). Itaque civitas societates simplices non necessitate quidem absoluta, sed cum adjunctione consecuta est **); quod mortales naturalem illum statum profecto non deseruissent, nisi conflictatio officiorum subjectionem omnino postulasset.

* CÆSAR. *B. G. III.* 10.

** CIC. *Off. I.* 17.

XVI.

Ita & illorum sententiam, qui societatem civilem ex ipso ordine naturæ derivari arbitrantur, necesse est declarare. Nec enim patresfamilias ex sola natura alii aliis subjecti esse intelliguntur, sed posita primum conventionē; quia tamen nec in vita segrege, nec in anarchia sufficientem sperare licuit securitatem, dictavit profecto ratio atque adeo lex naturalis, ut homines concederent in civilem cœtum, cujus omnis cura atque opera posita esset in avertendis singulorum periculis, quique si non omnia propelleret mala, summum tamen, quod esse posset, eorum faceret compendium. CICERO *pro Sext. c.* 42.

XVII.

XVII.

Atque eodem recidit doctrina eorum, qui Deum auctorem faciunt civitatis. A Deo enim nobis tributa recta ratio est, & lex naturalis, quæ orto conflictu officiorum civilem jussit iniri societatem. Quo sensu præclare observatum est a Cicerone *), nihil esse illi Principi Deo, qui omnem hunc mundum regit, quod quidem in terris fiat acceptius, quam concilia cætusque hominum jure sociatos, quæ civitates appellantur. Id ipsum sacri Codices mirifice illustrent. **)

* *Somn. Scip. c. III.*

** *Prov. VIII. 15. Ecclesiastici, XVII. 14, Roman. XIII. 1.*

XVIII.

Igitur hoc modo civitas *generatim* considerata recte dicitur societas inter homines omnium perfectissima, quam naturæ auctor non modo initam consequenter adprobat, sed jam antecedenter ineundam esse præceperat, ut quemadmodum morbis paratur medicina, ita & infirmitati Patrum

familias communis imperii remedium confu-
leret. Etſi vero D. Petrus *) civitatem
humanam vocat *ordinationem*, id tamen ad
fingulares civiles ſocietates, & varias ea-
rum formas tantum pertinet.

* *Ep. I. c. II. v. 13. cf. PUFEND. de J. N.*
& G. L. VII. C. III. §. 3. LEYSER Spec.
ad Pand. 568. §. 1.

XIX.

Illi, qui civitates metu impellente ex-
citas fuiſſe contendunt, a nobis haud diſ-
ſentiunt. Qui enim ſecuritatem querunt,
ii primo metuunt. Quare ut ſe periculis
undique ingruentibus primi mortales expe-
dient, non alia ei fini ſatis idonea præſto
erant ſubſidia.

XX.

Nec quippe eum ſtatum præſtare po-
terant, aut 1.) Lex naturalis ſibi ſoli re-
liſta, quum ſæpe dormiat hominum conſci-
entia, aut 2.) metus Numinis, quod ſe-
ra ejus vindicta plerumque futuræ ſervetur
vitæ, aut 3.) aliæ quæcunque conventio-
nes,

nes, quod eæ facile violarentur, nisi conjunctis demum viribus perfidi ad fidem datam compelli, atque communi imperio debiliores a potentioribus defendi possent. Quid quod nec semper in civitate virtus vincat audaciam?

XXI.

Docent alii, civitatem violentia constitutam esse. Quæ opinio tunc admitti potest, si eum sensum habeat, homines violentiam metuentes in communem cœtum mutuæ securitatis ergo transivisse. At falsa est, quando ita explicant, ut ipsum imperium initio sola coactione & potentia physica fuerit stabilitum. Si enim primam civitatem democraticam fuisse ponas, sane repugnabat, manente apud omnes imperio, singulos sibi vim intulisse. Si vero imperium penes unum vel paucos fuit, quomodo his totius licuisset multitudinis vires superare? Sed & sacre Literæ huic opinioni adversantur. GEN. XIV. 18. XX. 14.

XXII.

Ut doctrinam nostram labefactent, ajunt, solam vim originem civitatum fuisse

ex

ex eo adparere, quod 1.) probi inter se satis fuerint securi, ut civili societate non egerent, & quod 2.) Cainus eam primus condidisse legatur, *) immo quod 3.) statim post diluvium Nimrodus homines subjugare cœperit, atque 4.) improbi fuerint, qui eodem tempore turrim ædificarint, ut sibi *nomen facerent*, id est, superbiam alerent, **) a Deo propterea linguarum confusione puniti.

* GEN. IV. 17.

** GEN. X. 8.

XXIII.

Addunt 5.) in sacris Literis mentionem fieri Gigantum seu oppressorum *), quo referendi videantur venatores, qui, quod armati essent, pastores inermes & agricolas sibi subjecerint, & speciatim Esavus, qui regnum sibi condidisse & Choreos profligasse memoretur **). Maxima denique regna, veluti Romanorum rempublicam, violentia potissimum increvisse.

* GEN. VI. 4.

** GEN. XXXVI. DEUT. II. 12.

XXIV..

XXIV.

Non tamen tanti hæc sunt argumenta, ut non facile dilui, atque everti possint. Quis enim 1.), ut adversariorum tela ordine suo prosequamur, improbis institutum tribuat, quod ex legis naturalis hypotheticæ custodia ipso Deo auctore profectum esse intelligitur? Sed nec repugnaret, malos sibi metuentes quæsisisse securitatem, veluti Cainum. Etsi 2.) hunc non constet fecisse civitatem, verum potius casarum collectionem, maceria vel sepe viridi cinctam, familiari attemperatam imperio, quo ipsum securitatis desiderium impulit.

XXV.

Reponimus 3.) Nimrodum nihil aliud quam venatorem fuisse præcipuum ferarum, quarum magna copia homines infestaverat. 4.) Turrim illam non fuisse ambitionis, verum potius metus effectum, voce Hebræica *Schem* signum dumtaxat denotante, quod respicere possent, si quando dispergerentur venatione; neque ideo ejus exstructores confusione linguarum punitos fuisse, sed ideo potius, quod contra Dei volun-

luntatem, qui orbem totum illis habitandum destinarat, uniti manere sibi proposuerint.

XXVI.

5) Potuisse quidem mortales ad eum conjungi finem, ut alios sibi subjicerent, verum ita, ut ipsa illa unio communem unitorum voluntatem, adeoque societatem quamdam civilem præcessisse designaret. Potuisse imperia per vim increfcere, sed inde non sequi, a violentia primam civitatum originem esse repetendam.

XXVII.

Est præterea alius *finis operis*, propter quem agere debemus, alius *finis operantis*, ob quem agimus; illum Philosophus, hunc Historicus confiderat. Ita fieri potuit, aliquarum civitatum *formas aut ex benevolentia, aut beneficiorum magnitudine, aut dignitatis præstantia, aut spe largitionis* *) coaluisse. Sed ea res est cognitionis historicæ, quum a facto singulari tota dependeat. Nos vero civitatis finem ex ejusdem natura sola ratione contemplati fumus, qui utique ad cognitionem spectat philosophicam.

CA-

* CICER. *Off. c.* VI. 11.



C A P V T II.**DE CIVITATIS NEXU, EJUSQUE
JURE GENERATIM.****XXVIII.**

Nulla societas absque communi fine, virium unione & voluntatum, negotiis denique socialibus intelligitur. Quum itaque de causa & fine societatis civilis actum fit, sequitur, ut de modo, quo plurium patrumfamilias vires & voluntates unitæ sunt, seu de civitatis nexu differamus, ad ipsa negotia inde civilia transitori.

XXIX.

Placet multis PUFENDORFII sententia, qua civitatis structuram a duobus pactis & uno decreto derivavit. Et primum quidem ac præcipuum pactum ait singulos cum singulis in naturali libertate viventibus iniisse, quod in unum ac perpetuum cœtum coire, suæque salutis ac securitatis rationes communi consilio administrare velint. Hoc deinde pacto semel absque ulla determinati

nati regiminis conditione celebrato ita obfiringi omnes, ut cuicumque demum imperandi potestatem tribuant, a cœtu recedere haud amplius possint. PUFEND. *de J. N. & G. L. VII. c. 2. §. 7.*

XXX.

Sed & porro ex ejus mente *decretum* successit, quo a fociis imperii forma fuerit definita, an scilicet unus, an plures, an vero omnes collectim cives imperarent. Cujus decreti ea vis sit, ut ei quidem assentiri non teneantur personæ, quæ nonnisi sub alius regiminis conditione in societatem consenserint, tamen ut reliquæ, quæ pactum pure iniverint, suffragiis plurimorum stare cogantur.

XXXI.

Addit demum aliud pactum, quo vel Monarchæ, vel optimatibus, aut toti populo secundum formulam in decreto conventam se singuli subjiciant. Et hinc pactum *unionis* virium, decretum *formæ*, & *pactum subjectionis* fecerni consueverunt. DION. HALICAR. L. II. p. 80. JOSUE I. v. 16. 18. I. REG. 10. v. 24.

XXXII.

XXXII.

Enimvero non prius patribusfamilias de constituenda civitate inter se tractare licuit, quam physica quædam illorum congregatio existeret. Hæc autem unio non tam a conventionem, quam a facto dependebat; five quod homines diu per orbem errantes ad eadem demum loca fortuito delati fuerant, five quod a communi stipite progeniti, & in varias domos distributi in vicinis terrarum spatiis jam antea simul permanferant, quemadmodum de Achæis proditum est. JUSTIN. *Hist. L. XXXIV. I.*

XXXIII.

Sed & quamprimum status concipitur, in quo plures homines sui juris de vita in uno ac perpetuo cœtu mutuæ defensionis ergo transigenda ita convenerunt, ut singuli vi hujus pacti suas voluntates univerforum aut majoris partis voluntati subjicere teneantur, jam adest civitas alibi definita. Quia igitur Puffendorffii opinione status ille ex solo pacto primo consequitur, evidens est, frustra alterum pactum & intermedium decretum generatim superaddi.

B

XXXIV.

XXXIV.

Ac profecto, qui in societatem civilem consensit, sine ullius formæ exceptione, id utique, quod naturale est, voluisse judicandus est, nimirum suam voluntatem imperio submisisse univerforum; quorum porro erit, vel jam enatam inde democratiam tueri, vel diversam ab hac imperandi rationem stabilire. Fingas vero primum illud pactum hanc vim non habere, tum id negotium non jam ad pactorum genus, sed ad nudos tractatus pertinebit.

XXXV.

Tum igitur demum vera est PUFFENDORFII doctrina, quando multitudo Aristocratiam vel Monarchiam præfert Democratix. Nam tunc opus est decreto, quod singularem hanc inducat formam, dein novo pacto, quo in certas & determinatas personas imperium transferatur. Alias ita viget imperium univerforum, ut singuli quam minimum primævæ suæ libertati detraxisse videantur.

XXXVI.

XXXVI.

Nec quisquam obloquatur, etiam in Democratia eligendas fore personas, quæ negotia quotidiana expediant. Enimvero adesse prius civile necesse est imperium, quam hujusmodi personæ decernantur. Aliud quid igitur est conventio, qua constituitur civitas, aliud *ordinatio civitatis*, seu remediorum electio, quæ ad finem societatis civilis consequendum magis idonea judicantur.

XXXVII.

Pendet hæc ordinatio, seu *respublica* in eo statu ab arbitrio univerforum, quorum erit definire, an civile penes se retinere imperium, an idem uni, an pluribus sub nulla vel sub certa formula, aut mere personale, aut in alios transmittendum concedere velint.

XXXVIII.

Hinc non obscurum est unicum pactum subjectionis, quo singuli voluntatem suam universis submittant, vel quod idem est, pactum unionis civilis ad essentiam civitatis generatim acceptæ sufficere. Nam qui

voluntatis unionem, seu subjectionem spondet, is eo ipso in physicam civium unionem, omniaque remedia ad confirmandum hocce confociationis vinculum necessaria consensisse intelligitur.

XXXIX.

Illos itaque non moramur, qui unicum ad civitatem constituendam pactum ideo sufficere non posse arbitrantur, quod hac ratione primas societates civiles fuisse democraticas, & non monarchicas contra omnem fidem historicam statuendum fore putent. Etsi enim imperium origine totius fuisse multitudinis cogitemus, multæ tamen ac graves esse poterant causæ, cur populus illud uni civi permittere, quam sibi habere mallet.

XL.

Patet vero non esse opus, ut tale pactum expressis fiat verbis, sed & tacitum sufficere, dum populus communi suffragio & adjutorio de securitatis obtinendæ subsidiis ex usu ac consuetudine deliberare solet, aut dum infirmiores atque imbeciliores ab iis se gubernari patiuntur, de quorum justitia, prudentia & robore magna existit opinio.

XLI.

XLI.

Non minus inde colligitur, civile quod dicimus imperium ex pacto pendere, atque vi originis suæ penes patresfamilias aliosque sui juris homines, ut jus proprium resedisse. Et quum sola violentia unio voluntatum effici nequeat, civitatem inter societates voluntarias esse referendam. Cicer. *de LL. III. 2.*

XLII.

Sicut reliquæ societates, ita societas civilis est una persona moralis in statu naturali vivens, unum corpus politicum juribus propriis distinctisque instructum obligationibus. Et quia cives non sibi tantum, sed etiam posteritati consulere videntur, est quoque societas perpetua eoque sensu immortalis, quatenus novi semper focii in eandem succedunt, ut adeo post annos innumeros idem populus manere videatur. *L. 76. D. de judiciis.*

XLIII.

Quoniam leges sociales, quæ ad totum pertinent populum, *publicæ* vocantur, & quidem naturales, si ex ipsa populi no-

tione promanant, evidens est dari leges civitatis universales, quæ porro planæ sint, ac liquidæ, mathematica gaudentes certitudine, immutabiles, necessariæ, æternæ, ut alibi ostensum est.

XLIV.

Harum principia ex iis, quæ ibidem tradita sunt, nullo negotio intelliguntur. Principium scilicet, quod ajunt, *essendi* in non repugnantia civilis societatis, *existendi* in actuali ejusdem structura, *cognoscendi* subjectivum in recta ratione, objectivum denique in coetus hujus perfectissimi fine collocanda sunt.

XLV.

Ex quo perspicitur, cur inter jurisprudentiæ naturalis socialis partes etiam jus civitatis sit relatum; quod si in officiis versatur *imperantium & subditorum*, jus civitatis *internum* vel publicum universale, si vero officia exponat a populis sibi invicem præstanda, *jus gentium*, seu jus civitatis *externum* nuncupatur.

XLVI.

XLVI.

Finis civitatis est securitas. Huic maxime repugnat periculum, quod vel impendet a sociis *internum*, vel a non sociis seu peregrinis *externum*. Exigit itaque salus societatis civilis ejusque commune bonum, ne quid ei a civibus suis periculi sit, sed ut omnes potius securitatem tam internam quam externam pro virili præstent.

XLVII.

Quumque in legum conflictu eo modo instituenda sit exceptio, ut potius finis, quam remedii, boni majoris, quam minoris, totius quam partis ratio habeatur, facile perspicitur illius axiomatis veritas: salutem populi saluti civium singulorum esse anteferendam.

XLVIII.

Quibus autem remediis salus publica obtineatur, ex sequentibus elucebit. Abstinet quis a malo nobis inferendo, vel ex *voluntatis* vel ex *virium* defectu. Deficit voluntas sive I. quod læsionem nostram ut malam sibi repræsentet & virtutem colat, sive II. quod nulla rerum indigentia ad eam

impellatur, sive III. quod nocere volens majus quoddam malum pertimescat. Vires lædendi defunt, quando quis vim resistentem superare potis non est.

XLIX.

Quare I. cives ad virtutem informentur; II. de vitæ sufficientia cuilibet pro statu suo prospiciatur, ne struant tumultus; III. vitia pœnis efficacibus compescantur, virtutes excitentur præmiis; IV. promptæ semper sint vires, quæ hostilia meditantibus resistent, ea tamen moderatione, ut ne remedium sit pejus malo, dativæ alibi de legum conflictatione regulis repugnet.

CAPUT III.

DE CIVILIS IMPERII
PROPRIETATIBUS.

L.

Quoniam Imperium generatim alibi definitum est jus perfectum actiones entis intelligentis pro arbitrio determinandi ad certum quemdam finem, civitas vero sine
im-

imperio concipi non potest, perspicuum fit: Imperium seu potestatem civilem contineri jure gubernandi civitatem, hoc est, actiones omnium subditorum ad communem securitatem pro arbitrio dirigendi. GROTIJ. B. & P. I. c. 3. §. 6.

LI.

Quotquot existunt societates hypotheticæ, illæ in civitatem veluti partes in totum quoddam desinere possunt. Est igitur civitas cœtus inter rectorios omnium maximus, atque adeo civile imperium reliquas omnes humanas potestates dignitate & magnitudine antecellit, ac idcirco eminentiore illo *Majestatis* nomine fuit insignitum.

LII.

Ex his porro colligitur, Majestatem ita versari in civitate, ut altera ab altera se jungi nullo modo valeat. Imperium autem civile a nullius alterius hominis arbitrio pendere, esse in his terris penitus liberum atque *independens*, neque ejus actus alterius cujuslibet juri subesse, aut irritos reddi posse. Etsi enim cives singuli suas vo-

luntates univerforum voluntati submiserint, attamen aliorum intuitu, cum quibus nulla fuit societas inita, libertatem naturalem ceteraque omnia retinuerunt jura.

LIII.

Inde autem fluit, potestatem hanc civilem seu Majestatem recte *summam* nominari. Præterquam quod enim societates minores, quæ in civitatis territorio reperiuntur, five illæ conjugales sint, five parentales. five heriles, five domesticæ, aut cujus demum cunque alterius finis causa colligentur, omnes cum suis rectoribus civili subjectæ sunt imperio, ita hoc præter Divinum numen neminem alium agnoscere superiorem potest.

LIV.

Et quia nullus rector alius existit in civitate, qui Majestati non sublit, consequens est, ut nec ulla in territorio civili potestas eidem æqualis reperiatur, adeoque Majestas eo sensu *una* atque *universalis* adpellanda sit. Quamprimum enim duo illic hujusmodi imperia existere fingeres, vel

vel penitus desinere civitatem oporteret,
vel in duos civiles cœtus diversos abire.

LV.

Jura, quæ ex notione Majestatis intelligi atque explicari possunt, *majestatica* appellantur; quorum licet plura quidem, ut in ceteris minoribus imperiis, numerari, adeoque in partes distribui minime repugnet, quia tamen ab ipsa civitatis essentia atque natura divelli nequeunt, haud obscurum est, cur inter reliqua majestatis attributa illud quoque, quod *individua* sit, recensendum veniat. GROTI. *L. c.* §. 17.

LVI.

Ideo hominum jura ut prorsus æqualia & inter se congrua cogitantur, quia ab ipsa hominis notione promanant. Quum igitur jura etiam majestatica ab imperii civilis essentia ducantur, nemo inficias inquit, *æqualem* apud omnes populos, eamdemque omnino vigere majestatem; quare quod uni civili simpliciter consideratæ licet societati, idem & alteri licere, ac vicissim, quod uni non licet, nec alteri id licere est necesse.

LVII.

LVII.

Neque huic quidquam derogat æqualitati diversa civitatis forma. Quod enim origine sua toti populo imperium competit in Democratia, idem quoque in Aristocratia aut Monarchia, quam primum totum illud in paucos aut unum duntaxat translatum fuit, vigere oportet. Neque aliud statuendum est, si populo jura quædam majestatica ad democraticas, quædam alia ad aristocraticas, quædam denique ad rationes monarchicas, vel ad harum binas exigere placuerit.

LVIII.

Sed etiam imperium civile ipsum a modo illud habendi probe discernendum est. Ab hujus enim varietate perperam quis illius etiam discrimen argueret. Sane nec dominia, nec reliqua jura ideo ab invicem differunt, quod ea jam modo originario, jam derivativo, jam ex contractu benefico, jam oneroso possideantur. Quare & majestas una semper atque eadem permanet, etsi populus, qui eam initio inspecto in

in τω *ſuo* habet, diverſas ejus transferendæ leges definiverit. GROTI. *L. c. ſ. XI.*

LIX.

Quemadmodum porro a majoribus patrifamilias aut hominis alterius viribus ac corporis proceritate, ad ſtatum inæqualitatis moralis non valet collectio, ſed quodlibet familiæ caput naturaliter iisdem in domo ſua utitur juribus, ita ii magnopere hallucinantur, qui jura majestatica & imperium civile ex numero civium, territorii amplitudine, aliisve potentiæ phyſicæ adminiculis eſſe putant æſtimandum.

LX.

Majeſtatem abſque civitate eſſe nullam, hanc autem pacto coaleſcere, & finibus divini numinis quam maxime convenire, ſupra eſt oſtenſum. Unde manifeſto conſequitur, ſpeciatim conſideratam majeſtatem principium quoque ſuum proximum quidem in conventionem, remotum vero in ipſa Dei voluntate poſito officiorum conflictu habere, eo ſcilicet modo, quo ipſas naturæ leges proxime ab hominis natura, remote autem a liberrimo Dei ipſius arbitrio derivavimus. VICTORIA

relect. III. de potest. civil. IV. 1. seqq. v.
OSEE c. VIII. v. 4.

LXI.

Sicuti porro hæc explicandi ratio contra legum naturalium sanctitatem minime venit, ita & illud majestatis attributum, quod nimirum *sancta* ac *inviolabilis* fit, haud quam imminuit, quia nec jus imperii a vario illud habendi modo immutari, abunde demonstravimus. *CONCINA Th. Chr. T. VI. dist. IV. c. 2.*

LCII.

Nititur vero sanctitas imperii summa, qua munitum est, sanctione pœnali. Si enim gravissima illa habetur læsio, quæ plurimis infertur, & eatenus maximam mereatur imputationem, nullum profecto inter officia erga alios homines majoris est ponderis, quam a cive non violari civitatem, cui sociale pactum Auctorisque naturæ voluntas ita eum subjicit, ut orto conflictu propriam suam tanquam partis salutem negligere potius, quam totam discrimini exponere societatem teneatur.

LXIII.

LXIII.

Menfuram jura majestatica accipiunt tum ex communi Imperii notione, tum ex societatis civilis fine; quamobrem se ad ea extendunt omnia, sine quibus nec sociatam dirigere multitudinem, nec ejus salutem liceret efficere. Hæc vero jura si in ipsos se exserunt subjectos *immanentia*, sive interna, si in extraneos, *transseuntia* sive externa nuncupantur. Priora quoque jura imperii speciatim, posteriora jura libertatis naturalis dici solent.

LXIV.

Possunt homines in statu naturali viventes aliorum implorare auxilia, seque in eorum patrocinium & clientelam conferre pacto inito, atque hisce ipsis societates civiles sibi sæpius consulere solent subsidiis. Ast uti homini propterea nihil de sua personali decedit libertate, ita nec civitates hujusmodi conventionibus summam violant Imperii Majestatem, quin potius eandem magis confirmare conantur. GROTI. *L. c. §. XXI. CIC. Off. II. 8.*

LXV.

LXV.

Nec minus sua civili imperio constat summitas, etsi populus vi pactiois alteri populo aliquam concedat prærogativam, eive quædam honoris aut reverentiæ signa exhibere, ac ipsius imperium comiter venerari & conservare teneatur, nec enim quolibet prærogativa tolli libertatem alibi docuimus.

LXVI.

Atque eandem ob causam dubium esse nequit, quin summum ii retineant imperium, qui alteri genti annuam pensionem, five eam stipendium esse dicas, five tributum, pendere necesse habent. Nec enim contracto æri alieno statim subiectio cohæret, quippe quod non ex creditoris imperio, sed ex pacti natura persolvendum est. Quid quod etiam annuis ejusmodi subsidiiis potentiores sæpe subveniunt infirmioribus? GROTIUS. *L. c. §. XXII.*

LXVII.

Denique quum in nexu feudali non semper simul promittatur subiectio, sed fides datur, certa dumtaxat præstandi servitia curam-

ramve adhibendi, ne quid in alterius fiat præjudicium, manifestum est: ejus generis conventionem, quæ non tam jus, quam illius habendi modum afficit, nihil de summa civili potestate delibare. Quamvis vero quis ob perfidiam privari feudo possit, attamen ea privatio non ex jure imperii, sed ex illo jure descendit, quo æqualis læsus contra lædentem sibi æqualem utitur.

LXVIII.

Tum vero existit demum subjeccio, si eo pertineat pactum, ut populi unius socii ab alterius populi nutu aliquando pendere, ejus se submittere judicio, & particula quadam majestatis pro ipsius arbitrio uti obligentur. Etsi enim tunc populus legibus ceteroquin suis vivere permittatur, nihilominus ei precaria tantum superest libertas, quo ipso etiam veri nominis Majestas evanuit. L. 7. D. *de capt. & possl. rev.* GROTI. l. c. §. XXI. & BARBEYRAC. *ibid.*

LXIX.

Ceterum quibus capitibus jura omnia majestatica contineantur, non eadem esse videtur Doctorum sententia. Nos haud gra-

vatum eorum partitione amplectimur, qui civile imperium I. Jure *legum ferendarum*, dein II. Jure actiones ac res omnes subditorum, five ii singuli sint, five in minores collecti societates, *inspiciendi*, demum III. Jure consilia, quæ ad bonum publicum capiuntur, *exsequendi* concludunt. Unde triplex illa potestas, quam legislatariam, inspectariam, & executoriam vulgo nominant, promanat. V. GROTI. l. c. §. VI.

CAPUT IV.

DE JURE FERENDARUM
LEGUM.

LXX.

Illa est imperii natura, ut imperans actiones subditorum pro suo arbitrio ad societatis finem determinare valeat. Voluntas imperantis sufficienter declarata, ut subditi actiones suas ad eam componant, *Lex*, arctiore significatione, nominatur. Itaque imperantem civilem legum civilium ferendarum jure gaudere non ambigitur, quip-

quippe sine quibus, ut corpora nostra sine mente, sic nec civitas suis partibus, ut nervis ac sanguine & membris, uti potest. Cic. *pro Cluent.* 53. de LL. III. 1.

LXXI.

Duplici autem ratione jus hoc sese exferit, prout leges ab ipsa civitatis essentia, vel a rebus cujuslibet societatis incidentibus repetuntur. Horum itaque fontium alter cujusque populi communis est, alter singularum civitatum proprius. Sic ut hoc utar exemplo, nusquam obligatio parendi aut securitatis procurandæ abesse potest; contra an rerum quarumdam commercium præcipere vel prohibere e re sit populi, id ex loco, tempore, personis, ceterisque adjunctis est judicandum.

LXXII.

Priores leges immortales, necessariae, ubique eadem, mutarique nesciæ, posteriores fortuitæ sunt, mutabiles, & quum a diversis eventibus pendeant, pro iisdem variandæ. Ceterum tunc perfecta erit civilis legislatio; si leges a loco, tempore & adjunctis desumendæ cum iis, quæ abes-

sentia civitatis ducuntur, concordent. LIV. XXXIV. 6.

LXXIII.

Quicumque in civitate sunt, ii non remedia modo ad finem communem necessaria, sed & illa, quæ circumstantiis singularibus nituntur, cognoscere debent, ut actiones suas iis adtemperare queant. Qua cognitione si omnes æque pollerent, & pari salutis publicæ amore tenerentur, vix opus foret, leges novas ferre. Sponte enim sua quisque sine lege fidem rectumque coleret, OVID. *Metam.* I. 89.

LXXIV.

Quum vero, quas varia tempora desiderant actiones, cuncti ingenio proprio intelligere antecedenter nequeant, necesse est, ut qui civitatem gubernant, seu *Regimen* gerunt, civibus hæc agendi normas declarent. Atque, quum pluribus sæpe idoneis æque remediis idem obtineatur finis, illud, quod imperanti præplacet, ipse manifestare debet.

LXXV.

LXXV.

Sed & inde legum necessitas maxime elucet, si in animum inducas tuum, eos, quibus jurium majestaticorum exercitatio committitur, homines esse, a quibus aliquando impetres, ubi jus, ubi injuria opus sit, esse gratiæ locum, esse beneficio; & irasci & ignoscere posse: inter amicum atque inimicum discrimen nosse. Leges vero rem furdam, inexorabilem esse, salubriorem melioremque inopi, quam potenti: nihil laxamenti nec veniæ habere, si modum excefferis.

LIV. II. c. 3.

LXXVI.

Leges civiles fortuitæ toties libertatem civium naturalem imminuunt, quoties eadem reipublicæ nocere posset. Quid autem hic & nunc damno reipublicæ cedat, iis dumtaxat cognitum est, qui non modo aliqua, sed omnia ejus eventa penetrant. Sane aliquando mala quædam ob eorum conflictum toleranda sunt, quæ si impedire conetur imperans, majoribus etiam incommodis civitatem subjiceret.

LXXVII.

Leges igitur mutabiles non prius quis suadere potest, quam ubi omnia negotia perspexerit socialia, quod quum humanæ imbecillitatis vires fere excedat, communis inde consilii utilitas satis intelligitur. Nisi enim, qui uni dant operam ædificio, conferant inter se consilia, singulæ licet ejus partes bene compositæ sint, sin tamen mutuo sibi non respondeant, totam perfectione sua carebit.

LXXVIII.

Quæ legum civilium requisita sint, haud difficulter ex dictis eruitur. Scilicet I. promulgatione indigent, & quidem idiomate vulgari; nec enim aliter obligant, quam si in omnium notitiam pervenire possint. II. Quæ vago nituntur edicto, posterorum fere oculos effugiunt, & in oblivionem ire solent; nisi igitur aliquando publicatione e tenebris educantur, parum juste ignaro subdito imputaretur earum transgressio: ut adeo sit consultum eas uno atque constanti codice complecti.

LXXIX.

LXXIX.

III. Sint breves, facili & plano scriptæ stylo, quemadmodum divinus Legislator in decalogo eas tulit. Non enim omnibus subditis æque tenax sive memoria sive judicium obtigit. IV. Concisæ & determinatæ, ne vaga eas corrumpat interpretatio. V. Paucæ, quia ut PLATO observat, *) ubi plurimæ leges, ibi & lites & mores improbi. VI. Accedant quam maxime ad legis naturalis simplicitatem, ut spes sit, eas quam diutissime duraturas.

* *Ap. Strab. Geogr. IV. Tac. Ann. III. 27.*

LXXX.

Illud etiam considerandum est, legum civilium diversas esse formas. Quæ enim ad statum civitatis, quatenus est persona moralis, pertinent, sunt *publicæ*, quæ ad personas singulorum vel patrimonium; *privatæ*. Dein illæ, quæ jura rerum atque dominia, deque his disponendi modum definiunt, speciatim *civiles*, eæ contra, quæ poenas delictis vel quasi, id est, actionibus dolo culpave insignibus, decernunt, *criminales* adpellantur.

LXXXI.

Harum autem omnium fons is est, qui utitur majestate, earumque vis non jam ex solo naturæ jure, sed proprie ex communi civitatis sponfione *) fluit. Nec audiendi sunt, qui dicunt, legibus societatis primos tantum illius conditores, non horum posteros se subjecisse. Dum enim quis in civitate nascitur & educatur, in eam venit, ac eo ipso se submittit. Absurdum autem foret, velle eum esse participem commodorum, onera vero atque incommoda subterfugere.

* *L. I. D. de LL.*

LXXXII.

Quoniam leges omnes vel ex notione civitatis, vel a rebus circumstantibus promanant, priores quoad materiale, seu edictum, naturales vocantur. Posteriores tam ratione edicti quam ratione sanctionis sunt positivæ, & in rebus objective indifferentibus versantur. Pone, lege civili furtum sub pœna mortis prohiberi; hæc erit materialiter naturalis, formaliter vero, seu quoad pœnam, positiva. Contra lex de septem adhibendis in testamento testibus tam ma-
te-

terialiter quam formaliter positiva censenda est, quod nihil eorum sola ratione constet, atque indifferens sit, septem vel octo testes definire.

LXXXIII.

Ita vero ferendæ sunt leges positivæ, ut non adversentur naturalibus, quarum mutatio divinæ naturæ ipsisque rerum essentiis repugnaret. Potest igitur legislator civilis leges declarare naturales, iis species adplicare obvenientes, novis quin immo præmiis aut pœnis munire, juribus permissivis detrudere, obligationibus demum naturaliter imperfectis jus cogendi civile adjicere. v. EXOD. XXI. & XXII. v. I. LEVIT. XIX.

LXXXIV.

Hinc fit, ut imperans civilis actionibus subjectorum certam jure præscribat formulam, ætatemque, qua varia obire negotia liceat, determinet; atque porro promissionibus, pactis, contractibus, matrimoniis & ceteris tam inter vivos, quam mortis causa dispositionibus modum & normam statuendi habeat potestatem, dummodo nihil definiat, quod divini Numinis volun-

tati fit contrarium. Impia certe est HOB-
BESII opinio, omne honestum aut inhone-
stum a civili lege dependere. *De Cive VI.*
9. XIV. 10.

LXXXV.

Qui vero civitatem ingressi sunt, na-
turalem suam libertatem communi subjece-
runt imperio, & in nihil se consentire vel-
le promiserunt, quod imperanti displiceret;
qui proinde subditorum antevertere con-
sensum potest. Quare horum dispositio ut-
pote de jure alieno facta, & ab illa condi-
tione, si non prohibeatur, pendens, irrita
penitus est lege imperantis refragante. *L.*
5. C. de LL.

LXXXVI.

Et quoniam leges civiles remedia sunt
ad consequendum civitatis finem, liquet
objectum earum non esse illa, quæ ad hunc
promovendum haud conducunt, neque ul-
lum cum eo nexum habent, & ab homi-
num imperio natura sua eximuntur, ve-
luti cogitationes; multoque minus, quæ
vel vetita, vel præcepta manifestum civi-
tati adferrent detrimentum. Quare dantur
actio-

actiones subditorum, quæ foro civili haud subjacent, civiliter indifferentes, in quibus residuum quid adest libertatis naturalis, quæ *libertas civilis* dicitur.

LXXXVII.

Si tamen dubitetur, an legislator civilis de rebus a foro suo alienis quid statuatur, jus bonæ alterius existimationis conatum violaret, qui legi se subducere vellet. Præsumtio igitur pro legislatore pugnat, cujus est singulares nosse circumstantias, bonumque civitatis optime perspicere. Quare manente dubio subditis solum superest parendi gloria: poterunt tamen, quæ videntur subesse legis incommoda, imperanti ob oculos ponere, vel, ut ajunt, *repræsentare*.

LXXXVIII.

Denique quia leges civiles sibi subjectos non alia ratione nos tenent, quam quia imperans vult, facile etiam reliqua, quæ ad potestatem legum ferendarum pertinent, perspiciuntur. Ita I. habet jus legem fortuitam abrogandi, ei derogandi, & ex justa causa vel personam singularem vel certum civium genus lege solvendi seu *dispensandi*.

LXXXIX.

LXXXIX.

Nec obloquaris, inutilem esse dispensationem, quod ea illicita sit, si ratio legis duret, hac vero cessante necessaria amplius haud esse videatur. Enimvero si ratio respectu omnium cessat, aut plane absurdum ex legis implemento sequitur, tunc quidem sola æquitas cives a lege eximet; si tamen lex intuitu unius dumtaxat & solum negative cesset, ut nimirum sine ulla absurda consecutione possit custodiri, tum vero ad dispensationem omnino recurrendum est.

XC.

II. Imperans potest legem suam interpretatione authentica vel restringere, vel extendere, aut obscuram declarare. III. Qui majestate gaudet, legibus mere civilibus non est subjectus, repugnat enim obligatio a solius obligati arbitrio pendens. IV. Etsi vero leges naturales nullis subesse mutationibus alio loco demonstratum est, sæpe tamen etiam actiones ab iisdem dissentaneæ permitti seu tolerari possunt.

XCI.

XCL.

Cives generatim æquali inter se jure utuntur, nisi ob bonum civitatis libertas unius vel augeatur, aut imminuatur; cujusmodi lex privata in favorem vel odium alicujus quid speciale constituens *privilegium* vocatur, quod porro in *favorabile* & *odiosum* abit. Favorabile rursus *gratuitum* est, si ex gratia, *onerosum*, si aliqua permutatione obtineatur. Dein si uni soli tribuitur personæ, privilegium stricte tale, & quidem *reale*, audit, si in hæredes transeat, *personale*, si cum persona exstinguatur.

XCII.

Illud denique privilegium, quod certo rerum aut personarum generi veluti agriculturæ, feminis, minoribus, conceditur, beneficium legis seu *jus singulare* vocatur. Ceterum inest in privilegio favorabili quædam dispensatio. Ab ea tamen differt, quod hæc jus dumtaxat negativum tribuat, & libertatem moralem restituat, illud vero jus positivum largiatur, atque in certis negotiis obeundis civi speciatim adfistat.

XCIII.

XCIII.

Fluunt hinc sequentes conclusiones: I. Jus dandi privilegia est jus majestaticum, adeoque nemini nisi imperanti competens. II. Conceditur privilegium extraneis etiam, quatenus vel ipsi, vel res eorum civitatem ingrediuntur, ac eatenus in subjectionem veniunt. III. Privilegia mere gratuita naturam precarii induunt, & ideo ab imperante pro lubitu revocari possunt.

XCIV.

IV. At onerosa & quæ pretio redimuntur, nequeunt auferri, nisi ob commune bonum, qua in specie præstanda etiam privilegium habenti indemnitas, hæc vero V. non debetur, si ipse conditionibus privilegii haud satisfaciat, eo abutatur, aut illud plane in publicum detrimentum convertat.



CAPUT V.

DE SUPREMA IMPERANTIS INSPECTIONE ET JURE POLITIÆ.

XCV.

Cognitio morum, temporum, rerumque, in quibus respublica versatur, necessaria est iis, qui gubernant civitatem; nec enim aliter jure legum ferendarum apte uti, nec obligationi communem promovendi felicitatem satisfacere iis liceret. Itaque ad jura majestatica jus quoque supremæ inspectionis referendum est, vi cujus nimirum imperanti ea omnia, quæ ad salutem publicam pertinent, veluti actiones, res & operas subditorum examinare ac cognoscere concedatur.

XCVI.

Atque hanc ob causam potestas civilis non modo ætatem, numerum, pecunias, vitæ genus seu labores civium singulorum investigare potest, sed etiam in cunctas minores societates inquirere, ne quid com-
mit-

mittant, quod securitati & quieti civitatis adferret detrimentum, quin potius earum consilia in commune totius populi bonum conspirent.

XCVII.

Ita nimirum otiosi cives incitantur ad labores, improbi vel ad meliorem reducuntur frugem, vel ne probos contagione sceleris contaminent, omnino ab his separantur. Hujus denique inspectionis beneficio pernicioſa etiam conjugum diffidia, nimia parentum in liberos vel ſævitia, vel indulgentia, crudelitas dominorum in famulos, aliæque vitioſæ conſuetudines præcaveri, atque emendari poſſunt.

XCVIII.

Societas æqualis ad artis ſive liberalis, ſive illiberalis, immo & ad communis cujuſdam juris exercitium unita *collegium* dicitur, ſeu *ſodalitium*; eſtque aliud *publicum*, ſi in juribus majeſtatis adminiſtrandis, aliud *privatum*, ſi in rebus ſingulorum gerendis occupetur. Ita Romæ collegia Senatorum, Pontificum, Prætorum, Tribunorum erant publica, collegia Fa-

bro-

brorum , pistorum , fratrum arvalium ,
privata.

XCIX.

Justa civiliter est societas, quæ le-
gi civili non repugnat, secus est *injusta*.
Quum vero legum omnium civilium fons
reperiatur in Majestate , consequens est,
ut eidem sit potestas, collegia & sodalitia,
dum velit, instituendi, vel eorum scopum
saltem & regulas cernendi, ac porro prout
fini civitatis consentanea sunt, vel dissenta-
nea, eadem civiliter justa aut injusta decla-
randi. Itaque compertum est, cœtus, qui
naturaliter licerent, constitutis civitatibus
latisque legibus civilibus haud amplius vi
propria valere. *L. 1. D. de coll. & corp.*

C.

Is actum confirmat, qui novas ei va-
loris addit rationes. Competit igitur Impe-
ranti jus non modo singulorum civium ac fa-
miliarum negotia & conventiones, sed etiam
pacta five statuta collegiorum confirmandi.
Quorum porro & jus pertinet vicos, pagos,
urbes, studiorum universitates & commer-

D

cio-

ciorum fodalitia erigendi vel reprobandi ,
ac quæ hujus sunt generis.

CL.

Fit sæpius collegii confirmatio sub certis conditionibus , quæ locum ac modum socios recipiendi , horum labores , numerum , ætatem ac ceteras qualitates requiritas designant. Fac verò collegium præscriptam hanc normam excedere , & jam erit civiliter illicitum. Est autem hujusmodi confirmationis eo major necessitas. quo magis multitudo ad nocendum est idonea.

CII.

Quamprimum vel singulorum civium negotia, vel instituta minorum societatum reipublicæ noxia sunt, aut rerum conversione facta periculum ex iis redundat in civitatem, jus inest in imperio civili, quo hujusmodi actus reprobentur, atque irriti fiant; tum etiam fodalitia & corpora vel corrigantur, vel adjecto conventibus adfessore coerceantur, vel si quorundam animis inemendabilis illabatur pernicies, dissolvantur. *L. 5. Cod. de LL. L. 3. D. de coll. & corp.*

CIII.

CII.

Determinatio remediorum, quibus ci-
ves patrimonium suum tueri, illud augere,
& commode vivere queant, dicitur *Politia*
strictiore significatione. Quum posita rerum
sufficientium inopia securitas non possit in
civitate obtineri, in propatulo est, inter
jura majestatica etiam jus *Politix* esse ad-
scribendum. Atque hoc jure utitur Impe-
rans, ut subjectis pro sua cujusque conditio-
ne ac statu de rebus necessariis, immo etiam
de utilibus ac voluptuariis, prospiciat; utque
hoc modo singulis in quiete, ac quoad ejus
fieri poterit, etiam in abundantia & mun-
ditie vitam liceat tolerare. III. REG. IV.
v. 20. & 25.

CIV.

Itaque vi-juris *politix* Imperans annonæ
curam atque lignorum gerit, vias a latroni-
bus tutas reddit, modum incendia præca-
vendi, ac prompte exstinguendi præscribit,
omnium vero sanitati contra ingruentes mor-
bos institutis Medicorum & Chyrurgorum
collegiis, ac prophylacticis invigilat re-
mediis.

CV.

Sed & pretium rebus & operis necessariis statuit, ne unquam cives ad labores prompti atque idonei illis destituantur. Pro mendicis vero & labori imparibus fundat orphanotrophia, ptochotrophia, xenodochia, nosocomia, atque ab iis validos arceat mendicantes, quos vel invitos in ergastulis operas pro alimentis cogit permutare. COD. JUSTIN. *de Valid. Mendic.*

CVI.

Ex hoc eodem fonte porro consequitur, ut is, cui competit Majestas, pondera definiat atque mensuras, ne contrahentes se invicem defraudandi arripiant occasionem; utque auri, argenti ærisque flandi, feriundi facultate vel solus utatur, vel si monetam cudere aliis permittat, formam tamen & valorem ejusdem determinet, caveatque, ne ex re monetaria cives quidpiam detrimenti patiantur. L. 13. §. 8. D. *Locat. Nov. CXXVIII. c. 15.*

CVII.

Studet civile imperium subjectorum utilitati, si agrorum culturam per pagorum
ma-

magistros certis propositis præmiis aut etiam pœnis promoveat; si opificia varii generis & naturæ territorii accommodata erigi, ac in diēs perfici curet; si commercia denique tam inter cives quam cum exteris per mercatus, nundinas, emporia, & montes pietatis instituat, adjuvetque, ac eam in rem sollicitè dispiciat, ne negotiatorum fraudibus locus fiat.

CVIII.

Et quum in civitate fugiendi sint inutiles labores, & ordo familiarum conservandus, necesse utique fuerit perimere artes vanas, ineptos tollere operarios, nullumque pati vitæ genus, veluti doctorum, opificum & mercatorum, quod nimia multitudine laboret. Quæ omnia efficiendi potestatem Imperanti competere res est longe manifestissima.

CIX.

Civium jucunditati consulitur, si ad mores humanos, comes, urbanos & festivos informentur, si ædificia tam publica quam privata non modo solide, sed etiam decore exstruantur, si denique honestum

quoddam pateat ludorum & gaudiorum genus, quo cives & corpus exerceant, & in feriis curis pusillum laxamenti nanciscantur. Nemo itaque negaverit, & horum ordinationem ad civilis imperii jura pertinere.

CX.

Nihil autem magis ad reipublicæ tranquillitatem conducit, quam disciplinarum cultura & virtus, siquidem pessimus quisque asperrime rectorem patitur; inde elucet jus Imperantis ea omnia præcipiendi, quæ dum intellectum perficiunt subjectorum, & voluntatem, legibus quoque convenienter vivendi suppeditant occasionem.

CXI.

Est igitur jus majestaticum artium liberalium & illiberalium veluti agriculturæ & opificiorum scholas curare, tum lycea, universitates & academias, in quibus tradendis excolendisque scientiis assidua detur opera, instituere, ex hisce vero eligere viros probos doctosque, qui ad cives in officio continendos & virtutis admonendos omni studio incumbant; speciatim vero pupil-

pillis de tutore idoneo prospicere, & supremam tutelarum inspectionem habere.

CXII.

Contraria ratione Majestati est ea vetandi potestas, quæ male agendi præbent subsidia, ex quo fluunt leges *formulariæ*, quæ levitatem in paciscendo coerceant, dein *sumptuariæ*, quibus luxui tam in nuptiis & funeribus, quam in vestibus potissimum peregrinis cibusque modus ponatur, ne cives inutiliter opes perdant, atque sanitatem.

CXIII.

Pari jure prohibentur in quibusdam gradibus matrimonia propter incontinentiæ periculum, astrologia nugatoria perimitur, & circulatorum impostura, porro bibendi restringitur atque aleæ licentia, quæ fraudes, furta, superstitiones nutrit, venalem reddit pudicitiam, & familias spoliatur; res denique libraria prudenti censura limitatur. JEREM. X. 5. L. 4. §. D. *fam. ercis.*

CXIV.

Crescente civium numero vires quoque & opes civitatis crescere necesse est;

D 4

quam-

quamobrem jure politiæ cura continetur, ut procreatio liberorum pariter ac educatio promoveatur. Est itaque Imperantis non modo expellere feminas quæstuiarias, aut saltem ad loca remotiora relegare, sed & fidem munire conjugalem, morem faciendi eunuchos abolere, præmia nuptiis, pluriumque liberorum genitoribus aliquam immunitatem concedere, cælibes autem incastos a variis civilibus excludere juribus.

CXV.

Quia tamen non possunt mala impediri omnia, & porro danda opera, ut ea in commune quoddam vertantur bonum, non leviter paucitati subditorum subvenietur, si loca idonea parentur, quibus puerperæ innuptæ vel pauperes mature ac sine famæ jactura excipi possint, celandi vero ventris facilitas, præcepta cuique delatione, aliisque artibus adimatur.

CXVI.

Nec ideo metuendum est, feminas ad flagitia invitari; satis enim fuerit, parentum aut tutorum in educando negligentiam acerbius punire, in viros autem plerumque im-

impuditiæ auctores graviolem, quam vulgo fieri solet, & cujusvis facultatibus consentaneam sancire mulctam, eamque alendæ matri & partus nutritioni adplicare. Alienum enim est a ratione, factum causæ præcipuæ minus imputare, quam causæ subjectæ, quæ etiam solo metu imminentis mali ad sæviendum in foetum innocentem fit proclivis. Sed de his remediis in prudentia politica agendum est.

C A P V T VI.

DE POTESTATE IMPERANTIS
EXSEQUENTE.

CXVII.

Nisi leges in republica observentur, ipsas nullum usum, utilitatem nullam habere palam est. Hinc salus civitatis exigit illam imperantis facultatem, per quam ea, quorum vel necessitatem vel commodum perspexit, atque ideo præcepit aut vetuit, executioni quoque mandentur. Unde manat Im-

perantis potestas ea in actum deducendi ,
seu exsequendi , quæ fini societatis civilis
conducunt. HORAT. III. Od. XXIV. v. 35.

CXVIII.

Huc speciatim pertinent I. Jus armorum , II. Jus territoriale , III. Potestas judiciaria , IV. Jus puniendi , V. Jus circa bona civitatis , & VI. munera publica , quæ quidem omnia in personis & rebus societatis versantur. Quibus deinde accedunt jura belli , pacis , foederum , ac legatorum , nonnisi adversus externos populos se exercentia , ideoque in jure gentium tractanda.

CXIX.

Arma dicuntur res omnes aptæ ad vim vel alteri inferendam vel amoliendam , facultas vero ea in promptu habendi , iisque pro re nata utendi *jus armorum* nuncupatur. Quia itaque Imperans societatis civilis finem seu securitatem nisi turbatorum violentiæ resistat , obtinere nequit , evidens fit , inter jura majestatica armorum quoque jus reperiri , atque sine viribus parum tutam esse Majestatem. LIV. II. 55.

CXX.

CXX.

Quapropter jus Imperantis est solius de bello & modo, quo id geri debeat, arbitrandi, ut adeo non jam singuli, sed universi fini civitatis consequendo prospicere censeantur. Quo revocatur jus personas, per quas cavetur, ne vis fiat cuiquam, nominandi tam *vigiles* pro securitate interna, quam *militēs* pro externa. Cf. GROTIUS L. I. c. V. §. I. seq.

CXXI.

Inde porro descendit jus conscribendi milites, habendi delectus, immo & peregrinos conventa formula, vulgo capitulatione, viventes conducendi; jus armamentaria publica constituendi, extruendi munimenta, & præsidia ponendi; hinc jus cogendi cives, ut pro omni adparatu militari laborent, & annonam procurent; jus castra habendi, metationes præscribendi, invalidos milites per pagos distribuendi, ut simul rusticos militaribus instruant exercitiis; jus denique leges condendi militares ejusque generis reliqua.

CXXII.

CXXII.

Quia tunc tranquillitate interna fruimur , quando nullæ adfunt cauſæ , ex quibus pericula ab improbis incutienda prævidere liceat , inter majestatis quoque jura referendum est *jus actiones eorum dirigendi , qui in civitate existunt , ne cives lædantur* , ut cuique suum tribuatur. Quorum leges pertinent , ne quis noctu sine lumine ambulet , ne arma a paganis gestentur , ne pharmacopolæ venena promiscue vendant , aut agyrtæ medicinam faciant.

CXXIII.

Quum territorium sit locus , ubi imperium civile exercetur , patet : Imperantem polle- re jure efficiendi , ne illi , qui in civitatis sunt territorio , leges violent perfectas , five habeant *domicilium* , hoc est , habitationem animo ibidem perpetuo manendi , five non habeant. Hoc *jus nonnulli territoriale* adpellant.

CXXIV.

Ex his consequitur : I. Ut jus hoc territoriale ad actiones tantum negativas seu omissiones spectet , exempli causa , ne quis ter-

territorium accedat, vel transeat; II. ut illud etiam cum peregrinis exerceatur, qui tamen ad actiones affirmativas cogi nequeunt, nisi sub hac conditione admittantur: quæ ratio est, cur quilibet foro delicti subjiciatur. III. Ut etiam in Imperantes extraneos competat, quia horum majestatem haud imminuit.

CXXV.

IV. Ut adeo possit Imperans iis quidem ingressum denegare, qui se non subjiciunt, nec legibus affirmativis teneri volunt: at quando alium admittit Imperantem, id facere salva ejus æqualitate censeatur. Quare non obstat illud vulgatum: extraneos territorium civitatis subeuntes cives fieri temporarios, nam & hi subjecti non fierent, nisi jam antea tales fuissent.

CXXVI.

Nec minus inde patescit V. si jus quoddam in suo territorio civitas altera alteri concedat, velut habendi præsidii, tum id jus non esse majestaticum, sed servitutem quamdam gentium potius producere, de qua alibi. VI. denique quum jus territoriale sit majestaticum, illi,
qui

qui non gaudet majestate, id proprie competere non posse, etsi juribus aliis majestati analogis fruatur.

CXXVII.

Quandoquidem ex dictis constat, Imperanti esse jus determinandi bella, modumque ea gerendi, nec patiendi, ut civibus vis inferatur, quin immo efficiendi, ut resarciatur læsio, & injuriæ iis illatæ vindicentur, denique suum cuique tribuatur, Majestati etiam jus de subditorum litibus judicandi, easque decidendi, seu *suprema jurisdictio* vel *potestas judiciaria* recte attribuitur.

CXXVIII.

Pone enim, id jus supremæ jurisditionis majestati non cohærere, & jam nihil proderit iustitutio civitatis. Inde vero haud conficitur, jura naturalia stricte talia in statu civitatis desiisse; alius enim dumtaxat ea exercendi modus est definitus, quem sola non determinat natura, sed qui ab iis, quæ circumstant, rebus simul pendet; quare nec Imperanti duriora licebunt remedia, quam-

quamdiu supersunt leniora. *L. 13. Dig. quod. met. caus. L. 276. de R.*

CXXIX.

Absque cognitione causæ hujus decisio fieri nequit, decisione vero opus est, suum ut cuique tribui possit. Itaque in potestate judiciaria inest jus causas subjectorum controversas cognoscendi, sententias, quibus ea decidentur, ferendi, atque exsequendi, tum partem victam, ni sponte solvat, adigendi, ut præstet illud, in quod fuit condemnata.

CXXX.

Hinc autem liquet. I. Judicium legitimam esse disceptationem ac decisionem causæ a superiore, vel ex ejus jussu factam. II. Ordinem judiciorum naturalem consistere, in 1.) petitione actoris, 2.) rei exceptione quoad factum vel jus, 3.) probationibus earumque elisionibus, 4.) sententia ferenda; vanas autem a judiciis dilationes esse repellendas.

CXXXI.

Porro III. judicium tribus constare personis; actore, qui imputat factum, reo, cui fit im-

imputatio , judice , qui imputat jus. IV.
 Si actor suum perfequatur , vel pœnam sibi
 applicandam , judicium esse civile , si pœ-
 nam vero publicam exposcat , judicium cri-
 minale constitui.

CXXXII.

Præcipue autem potestas exsequens
 Imperantis tum se exferit , quando is cona-
 tibus obstat improborum , & delicta sive
 ipsam proxime afficiant civitatem , *publica* ,
 sive in *peculiares* tantummodo cadant so-
 cios , *privata* , coercet , ac porro a delin-
 quentibus pœnas ex doctrina imputationis
 & fine civitatis determinandas sumit.

CXXXIII.

Sane legis civilis auctoritas absque pœ-
 næ comminatione nulla est. Licet enim
 apud probos , qui legislatorem salutis pu-
 blicæ studiosum , legemque salutarem esse
 noscunt , ea satis valeat , tamen sola legis
 virtus intrinseca apud pravos , quorum sunt
 plurimi , est inefficax , quod metu dumta-
 xat regantur pœnæ externæ ; dum sciunt
 rectorem & posse , & *confiteri* velle ma-
 la

la cum peccatis ipso effectū copulare. GROTI.
II. I. §. 14.

CXXXIV.

Gaudet igitur Imperans jure pœnas ob conflictum actionum cum publica vel privata civitatis securitate infligendi ; quod jus eo quidem fine exercet, ut qui culpam contraxerunt, attentiores deinceps in muneris sui expletionē fiant, iis autem, qui dolo deliquerunt, desit imposterum I. voluntas, vel saltem II. potentia nocendi, neve III. successus improborum plures alliciat, sed ut reliqui subditi alieno periculo cautiore redditi a malo committendo absterreantur. PHÆDR. II. Fab. 4.

CXXXV.

Quare haud aliter licita est pœna, quam dum fit remedium ad salutem publicam necessarium. Atque adeo salus civitatis unicus est finis pœnæ, qui obtinetur emendatione delinquentis, satisfactione læsi, & exemplo aliis illucente, qui tres particulares pœnarum fines semper præ oculis habendi. Unde aliquando etiam mortuorum suspenduntur cadavera, pœna fugitivis in

E effigie

effigie statuitur, publicaue patibula habentur. Nec vero sola moralitas actus, sed ejus relatio ad finem civitatis, poenarum civilium mensura est. GROTI. II. XX. §. 34. 36.

CXXXVI.

Et quoniam jura Majestatica ex jure civitatis colligi debent, peccata, quæ fini civili haud adversantur, huc non pertinent, sed in foro civili & externo sunt indifferentia. Hinc non punitur simplex ambitio, avaritia, hypocrisis, ingratusve animus, quod hæc animi vitia externis coactionibus emendare non liceat. Nec poenæ omnes promiscue dictari debent, sed illæ tantum, quæ cum fine civitatis conspirant.

CXXXVII.

Ita poenæ infamiæ, vel mutilationis non emendant delinquentem, immo eundem ad peccandum invitant, quia odio publico expositus honestam sustentationem quærere non potest; ipsique aliquando civitati nocent, quippe quæ otiosis hominibus alendis oneratur. *Talio* vindicta par est, ut quod quis fecit, idem rursus ferat, veluti ut
ocu-

oculis privetur, qui alteri oculos effoderit; rarissime igitur toleranda est.

CXXXVIII.

Exilium an dictandum sit, quæritur. Verum quin civium imminuat copiam, hominesque pessimos in vicina mittat territoria, sæpe etiam linguæ ignaros, ut, quia sibi alimenta promereri nequeunt, furto & rapina vivere teneantur, repugnat fere semper bono civitatis, emendationi lædenti, ac justitiæ erga alios observandæ.

CXXXIX.

Pœnas executioni mandare soli majestati reservatur, cui dumtaxat jus determinandi modum, quo bella gerantur, rei que publicæ fervetur tranquillitas, competere diximus; non ergo a quopiam in civitate nisi illius consensu exerceri potest. Itaque non est permittendum, ut a sodalibus vel parentibus pœnæ in suos graviores decernantur. Et dum Galli, Germani, Romani jus puniendi uxores maritis concesserunt, id non nisi nomine civitatis fecisse videntur.

CXL.

Qui alterius perfectionem & securitatem promovet, beneficus est; quin itaque Imperans delinquentibus poenas infligens eundem titulum mereatur, haud est dubium. Contra patet, eum maleficum esse, si flagitiosis parcendo bonos cives in pericula novarum læsionum conjiciat; ex quo veram Imperantis benefici ideam a præconceptis opinionibus purgare licebit. *Si enim in delinquentes remissiores fuerimus, summæ nobis crudelitatis in patriæ civiumque perniciem fama subeunda est.* CICER. IV. in Catil. II. 12.

CXLI.

Pœnæ civiles ex fine civitatis mensuram capiunt. Unde consequitur juris esse majestatici, ad hunc finem poenas nunc majores nunc minores imponere, eas exasperare, aut pro re nata mitigare, quin si bonum publicum remissione pœnæ magis promoveatur, proßus remittere, quod ultimum *jus adgratiandi* vocant GROTIUS II. XX. §. 22.

CXLII.

CXLII.

Inde regulæ in Judicio de pœnis formando notandæ promanant: I. Pœnæ sunt mala vel corporis, vel fortunæ, adeoque in privatione ejus, quod nostrum est, aut in dolore infligendo consistunt. II. Quod uni malum majus est, alteri vel minus est, vel prorsus nullum, ex quo proportio in sumendis pœnis haurienda erit. Non enim rusticus aula sibi interdici grave putabit, nec dives aliquot perdere aureos.

CXLIII.

III. Æstimatio ergo pœnæ pro statu personæ, sexu, patrimonio, loco, tempore, & modo varianda est. IV. In multitudine peccantium, quod pœna ab omnibus sumenda reipublicæ potius noceret, iis danda erit venia, qui minus rei sunt. GROTI. II. 20. §. 31. MONTESQ. *l'Esprit de loix* VI. 16,

CXLIV.

V. Qui non peccavit, non potest puniri, ac idéo consanguinei vel liberi delinquentis a pœna immunes erunt; quod vero hi interdum bonis aut privilegiis mulctentur,

tur, id pœna proprie non est. Profuerunt olim majorum merita, nunc demerita noceant.

CXLV.

VI. Leges veteris testamenti non sunt positivæ universales, quod alibi evictum dedimus; illis igitur in delictis, quibus leges Ebræis sub Theocratia datæ certas definivere pœnas, quin Imperans civilis Christianus gratiam faciendi libertate polleat, dubitationi haud est obnoxium.

CXLVI.

Quando delictum est privatum, reus et civem lædit, & legem pœnalem transgreditur, quamobrem & ad satisfactionem privatam, scilicet damni refarcitionem, & ad publicam seu pœnæ præstationem tenetur. Hujus si gratiam faciat civitatis rector, non ideo & illam censetur remisisse.

CXLVII.

Et quia juri Imperantis respondet subditorum obligatio, reus pœnam perferre tenetur; nec eam irroganti unquam resistere potest. Non tamen ideo jubetur malum
lege

lege præscriptum ultro sibi arcessere, aut se ipsum punire.

CXLVIII.

Dicunt neminem obligari posse, ut malum adpetat, ergo neminem quoque adstringi, ut perferat pœnam. Verum intelligendum id est cum exceptione, nisi majus malum immineat. Reus enim graviori se exponeret periculo, si pœnæ resisteret. Deinde in conscientia, qui peccavit, tenetur, postquam nocuit reipublicæ, eidem prodesse exemplo, quod utique bonum est morale.

CXLIX.

An jus morte etiam plectendi nocentes, *jus gladii*, *jus vitæ & necis*, Imperanti civili competat, fuerunt, qui in dubium revocarent. Quam in rem his utuntur argumentis. I. Jus illud natura sola non tribui, quod jura omnium sint æqualia. II. Pacto id in superiorem transferri haud potuisse; quod nemo unus fuerit vitæ suæ Dominus; III. nec illud ab expresso & universali summi numinis jussu derivandum esse, quod soli populo judaico concessum fuerit.

CL.

Enimvero jus gladii manat ex tacita Dei voluntate, seu, quod idem est, ex lege naturali hypothetica, quæ dum jubet finem, remedia quoque ad eum necessaria impertitur. Si igitur nulla jam speranda sit delinquentis emendatio, aut eo crimen progrediatur, ut vel ob atrocitatem facti vel pessimum ob exemplum grave reipublicæ impendeat periculum, quod delinquentis internecione averti debeat, tunc imperans partem corporis morbosam totius servandi causa justè præscindet: in quod & sacræ literæ consentiunt, III. REG. XX. v. 42. GROTI. II. XX. §. 10. n. 8.

CLI.

Nemo profecto negaverit juris occidendi injustum aggressorem, quod singuli sibi in statu naturali vindicaverant, exercitium in Imperantem communem transferri potuisse. Sed quod porro opponunt, singulos hominem inermem, aut catenis victum, adeoque nocendo jam imparem, jus vita privandi non habuisse, hinc nec ejusdem

dem translationem licuisse, id ex totius civitatis consideratione evanescit.

CLII.

Quid enim vetat remedia salutis civitatum multo diversa esse a remediis, quibus sibi singuli consulant? quum utique finis hominum singulorum longe diversus a fine eorundem in societate viventium existat? Quemadmodum sonus instrumentorum harmonicus multo & præstantior & fortior sono est singulorum.

CLIII.

Sane & legum ferendarum potestatem societati nullus denegat, quamvis singuli sibi ipsis legem dicere nequeant. Quare sufficit justum esse societatum finem, publicam scilicet securitatem, ut remedia cum eodem necessario connexa, posito legum conflictu, pariter cohonestentur. PUFEND. *J. N. & G. L. VIII. c. 3. WOLF. ibid. T. VIII. §. 834. seqq.*

CLIV.

Nec putandum a blasphemia & concubitu cum bestiis valere argumentum, quod et si per ea crimina respublica non lædatur, illa

tamen morte etiam puniantur. Ut adeo jus necis non ex remedii necessitate, sed potius a divina revelatione venire, aut demum Imperanti prorsus abnegandum esse videatur.

CLV.

Falluntur enim, quotquot ita colligunt. Si quippe per ea crimina nulla inferretur læsio civitati, nec licita pœnæ civilis foret exactio: læditur his autem respublica multifariam, cujus vinculum cum religione tum civium propagatione continetur. An de cetero & quando ad mortem usque licite extendatur pœna, id ex positis paullo ante principiis eruendum erit. *Cf. DEUT. XVII. 2.*

CLVI.

Jus defensionis porro limites non a natura accepit, sed indefinitum est, & a rebus circumstantibus determinatur. Id tamen observandum, sæpe Imperantem hoc jure abuti posse, si media adsint leniora. Nec enim continuo juris naturalis est, ut, qui crimen patrat, moriatur, at tunc demum, ubi alia remedia salutis civitatis haud satis consulerent. Quid quod frequens ultimo-

timorum suppliciorum adfectus horrorem minuit, atque fortissimos reipublicæ enervat elateres? GROTI. II. XX. §. 12. n. 3. & I. c. II. §. 7. n. 13.

CLVII.

Nemo inauditus aut indefensus condemnari potest. Nam quilibet naturaliter jus habet bonæ existimationis, ac ideo puniri non debet, nisi delicto sufficienter probato, ut de veritate facti dubitare ultra non liceat. Quare permittendum erit, ut reus adducat, quæcunque ad elidendas delicti probationes idonea esse legitime colligit.

CLVIII.

Tortura est actus, quo corpus de crimine graviore valde suspecti tormentis adficitur, ut ad confessionem facti adigatur. Qui torquetur, malum perfert passionis ob malum actionis nondum satis probatæ, plurimi autem dolore compulsi crimina in se mentiti sunt, & nonnulli extremos potius perferunt cruciatus, quam ut scelera sua confiteantur. Hinc generatim tortura re-

me-

medium veri eliciendi ineptum est, ideoque etiam illicitum.

CLIX.

Quum tamen summopere aliquando reipublicæ inter sit crimina detegi, & in conflictu officiorum salus publica privatæ sit anteferenda, sequitur, ut si tanta fuerit sceleris a quodam patrati probabilitas, ut quam proxime ad veritatem accedat, nec quidquam præter ipsam inquisiti confessionem ad plenam certitudinem deesse videatur, in rarissima hac specie sibi locum tortura vindicare possit.

CLX.

Id tamen semper observandum, aliquam malitiam rei aliunde manifestam esse, atque in tortura modum servari oportere. Nimirum torquendus sit sano & robusto corpore, ac tortura in illis tantum tribunalibus instituat, ubi virorum juris prudentia probe subactorum copia præsto sit, qui ad omnia requisita attendere & singula ex communi statu Reipublicæ ponderare norint. Tum vero etsi forte quis innocens esset in eo, de quo torquetur, infortunii id loco habendum

dum forte, velut si quis pœnam patitur, quod primum ob prægñantissima indicia suspectus, dein quoque convictus per testes fuerit, etsi hi absolute possint falsi esse.

CLXL

Tortura spiritalis dici solet juramentum illud purgatorium, quod homini criminis suspecto per judicem defertur, ut suam affirmans innocentiam se a suspitione liberet. Hoc quoque perperam adhibetur remedium, ubi pœna mortis, corporis afflictiva, aut infamia dictanda venit, quum vehemens ab his pœnis metus reos quoque ad pejerandum facillime adigat.

-CLXII.

Imperantis interest delicta haud manere impunita; quare habet in ea inquirendi jus, & quia potest adgratiare, pariter inquisitionem eadem potestate abolebit; quod dum facit, pœnam in delicto dubio remittit.

CLXIII.

Potest etiam loca, unde rei abduci nequeant, id est, asyla concedere, quæ abolitionem quamdam continent temporariam, donec nimirum reatus vel innocentia

tia accusati adpareat. Hinc patet jus asyli vel concedendi, vel abrogandi esse majestaticum, nec a quoquam invita civitate illud usurpari posse. COD. THEOD. & JUSTIN. *De his, qui ad Eccl. confug.*

CLXIV.

Ceterum quæ hoc capite de personis singularibus dicta sunt, ea omnia ad pagos, collegia, urbes, delinquentes extendenda veniunt. Ubi nimirum societates delinquant, puniendi erunt auctores præcipui, ac demum totum corpus privilegiis exui, aut prorsus deleri poterit, ita tamen, ut non poena ipsa, sed ejus tantum incommoda in innocentes aut minus reos cadant; quæ proportio, in decimatione militari aliave simili poena aleatoria difficulter reperitur.



C A P U T VII. .

DE JURE CIRCA BONA ET MUNERA CIVITATIS.

CLXV.

Quæcumque sunt in dominio, nullo discrimine habito, *bona* dicuntur. Hæc si spectantur, prout in territorio civitatis existunt, varias sortiuntur denominationes. Bona, quæ pertinent ad universos, publica, sin minus, privata vocantur. Publica, quorum proprietas omnium est, usus vero singulorum, sunt *publica* in specie, quorum autem usus non singulis, sed universis competit, ea *patrimonium* civitatis nuncupantur.

CLXVI.

Ita fluvii, pontes, viæ, ripæ sunt bona publica in specie; ædes, fundi, lacus, vulgo bona cameralia, & bona coronæ, sunt bona publica quidem, sed in civitatis patrimonio. Contra bona singulorum immo & minorum societatum atque ipsius imperan-

rantis non jure imperii obtenta bonis privatis accenseri debent. Omnia tamen sunt univerforum, quos quia repræsentat Imperans civilis, rector civitatis etiam dominus territorii adpellatur.

CLXVII.

Abſque ſumtibus reſpublica adminiſtrari nequit; ad ſumtus requiruntur bona, atque hæc in computatione virium civitatis inſignem partem faciunt. Itaque in imperio civili etiam jus continetur per bona civitatis ſalutem promovendi publicam, & ſpeciatim ſumtus neceſſarios ex iisdem colligendi.

CLXVIII.

Valet ſcilicet & hoc loco illud argumentum a fine ad jus remedii cum eodem neceſſario connexi ductum. Quum itaque Imperans teneatur templa aliaque exſtruere ædificia, miſeris opem ferre, publicos alere doctores, ac potiſſimum prout tenere militem, ceteraque omnia, quorum jure eundem inſtructum eſſe ſuperius diximus, facere, jus quoque bona civitatis ad eos uſus convertendi habere debet.

bet. *Neque enim quies gentium sine armis, neque arma sine stipendiis, neque stipendia sine tributis haberi queunt.* TAC. Hist. IV. c. 74.

CLXIX.

Quoniam bona publica sunt in dominio populi, nemo ea possidere, iis uti, aut frui poterit, nisi is, cui populus vel Imperans, in quem jura populi translata sunt, permiserit; quare jus disponendi de bonis his est jus majestaticum, rursus ex fine civitatis nempe securitate & inde pendente civium felicitate dimetiendum.

CLXX.

Populus potest extraneos a suo arce-re territorio, iis ergo præcipuum jus habet bona in eo contenta occupandi, unde quæ a singulis occupata non sunt, *bona jacentia, adespota*, ad populum pertinent. Talia sunt montes, sylvæ, metalla, venationes, loca deserta, antra, fluvii, insulæ, fontes & viæ publicæ.

CLXXI.

Hinc intelligitur ad jura Imperantis jus quoque venationis, piscationis, aucu-

pii, jus silvarum, vulgo forestale, jus subterraneum, jus minerale, jus in thesauros, jus cursus publicos ordinandi, seu *jus postarum* in locis viisque publicis, esse referenda, etsi ea jura sæpe a civitate in privatos pro parte derivari soleant; contra in locis privatis ea naturaliter esse bonorum privatorum consecratoria, nisi & tunc in Imperantem translata esse constet.

CLXXII.

Bona publica, quæ conservandæ vitæ ac dignitati Imperantis, præcipue in monarchia, ejusque domus five aulæ inserviunt, in specie vocantur *bona fisci*. Si vero fiscus prædia pro suis redditibus habeat, dicuntur hæc *domania*, redditusque eorum sunt bona ipsius Imperantis propria. Illa deinde bona publica, quæ reipublicæ administratio & defensio exigit, sunt bona *æarii*.

CLXXIII.

Hinc triplex est jus, quod Imperanti in bona civitatis competit. I. Jus domini illimitati in proprium sibi assignatum patrimonium. II. Jus utendi & fruendi bonis fiscalibus, in quo jure exercendo Impe-

rans

rans commodi sui proprii habet rationem. III. Jus ærarii administrandi, seu pro arbitrio ad bonum commune civitatis dispensandi, quod dum facit, jam non suo, sed alieno commodo invigilat. Est tamen sæpe arduum hæc bona ab invicem separare.

CLXXIV.

Si bona publica sumtibus civitatis sufficiant, nulla est justa ratio, ob quam privati ad partem suorum bonorum suppeditandam adstringi possint. Pone autem, ea ad scopum civilem haud sufficere, tum quisque pro modo facultatum suarum ad onera publica concurrere debet, quod quidem singuli universis ab initio civitatis polliciti sunt.

CLXXV.

Itaque perspicitur. I. Quia jus in bona privatorum ex finis necessitate oritur, cavendum esse, ut, prout finis exigit, ratio quæstum & necessitas erogationum inter se congruant *); II. Si causa præstationum, id est, necessitas definat, præstationes quoque aboleri debere; quemadmodum apud

F a

Ro.

Romanos olim unius Imperatoris præda finem tributorum attulit **); III. Qui multa possident, necessum esse, ut multa conferant, ii autem quibus res angusta est, pauca.

*) *TACIT. An. XIII. 50. SUTTON. Tiber. c. 32.*

**) *CICERO. Off. II. 22.*

CLXXVI.

IV. Rebus ad vitam necessariis, velut pani, carni, lignis, quam minima onera, contra iis, quæ soli commoditati & voluptati serviunt, graviora imponi oportere. V. Nec ulla sodalitiarum bona ab his oneribus natura sua esse immunia, quod æquali civitatis jure fruuntur, ac iis Imperans, non minus quam reliquis civibus, securitatem impertitur.

CLXXVII.

Potest autem Imperans duplici modo bona privata in publicos usus convertere, prout vel quædam solum consecraria, vel ipsam horum substantiam attingit. Si jus in consecraria exercet, necesse est, adesse rationem, cur hoc nec alio modo con-

se-

sectaria hæc definiat in usum publicum convertenda esse. Rationis hujus diversitas varia quoque huic juri ab Imperante exercito nomina tribuit.

CLXXVIII.

Quodsi ratio in eo sita est, quia utens rebus suis privatis simul etiam utitur bonis publicis, jus id *vectigal* dicitur. Suntque vectigalis variae species. Aliud enim est pro usu viæ, pontis, fluminis, fori, & quidem vel a persona pedite solvendum, quod in specie *pedagium* compellatur, vel in itinere pro equis, curribus, vel pro viæ, fluminis, pontisve transitu, quod *portorium* dici suevit. Aliud pro facultate in foro publico vendendi, & sic porro.

CLXXIX.

Si ratio præstationis ex eo sumitur, quod privatus re sua secure uti & frui possit, tum, quod rerum aut prædiorum immobilium possessores pro modo emolumentoque suo præstant, *tributum* & *stauram*, quod autem pro rebus fungibilibus aut mobilibus solvitur, *accisam* & *licent* appellant.

CLXXX.

Male igitur HOBBIUS *) docuit, jus vectigalium & tributorum jus esse dominii, nec enim jus est Imperanti in substantiam rerum, sed in partem dumtaxat confectariorum competens. Nam si vectigal aut tributum omnem absorberet utilitatem, res suas nemo duceret per vias, fluviosque publicos, agricultura jaceret, periret industria, ipsaque civitas dissolveretur.

*) *De Civ. VI. 15. XIII. 11.*

CLXXXI.

Eodem modo licebit jure territorii ex parte maris vectigal petere, quia & tunc privatus re sua utens, simul bono quodam publico utitur; præterquam, quod varii insuper sumtus ad construenda navibus tutandis loca seu portus, ad ignes nocturnos alendos, ad securitatem navigantibus præstandam ferendi sint. Nec objici potest, mare non existere in bonis civitatis, quod quidem de toto mari, non etiam de ejus parte verum esse, in jure gentium constabit.

CLXXXII.

CLXXXII.

Quando respublica in eum devenit statum, ut salus univerſorum cum ſalute ſingulorum conſiſtetur, Imperans bonum majus minori præferre debet; ipſeque jus habet conſervationem partis negligendi, ſi conſervatio totius vel majoris partis aliter obtineri nequeat; quod jus vocatur *eminens*, aliis *supereminens*, quia ſuper jura ac dominia privatorum omnia eminet. Atque in ſpecie *dominium eminens* dicitur, quando circa res ſubditorum proprias verſatur, *eminens poteſtas & imperium*, quando in perſonas exercetur. GROTI. l. i. §. 6.

CLXXXIII.

Vi ſcilicet dominiis eminentis occupatur fundus, ut in eo caſtra ponantur, aut munimenta; vaſtantur res ſubditorum, ne in hoſtium manus cadant; naves ad tranſportandos milites auferuntur; domus hoſti expoſitæ aliaque loca tempore obſidionis occupantur; granaria privatorum aperiantur; ac ſi quando vis fluminis viam publicam ſuffodiat, ex vicinis hæc reſtituitur

fundis. Vi deinde potestatis eminentis obfides mittuntur; personæ, spontaneis deficientibus, invitæ coguntur ad militiam; neque illis parcitur, qui alias gauderent privilegio immunitatis; vulnerati denique & captivi in prælio deferuntur.

CLXXXIV.

Hujus vero juris eminentis naturam sequentia determinant principia. I. Pertinet ad casum dumtaxat necessitatis & statum reipublicæ extraordinarium, ubi nempe istius juris exercitium unicum est remedium servandæ reipublicæ sive totius, sive majoris ejus partis, aut si id major quædam reipublicæ utilitas exigit; quum secus non liceat Imperanti privatis jus quæsitum auferre, nec etiam res subjectorum amœnitatis publicæ causâ, propriæve voluptatis ergo, invadere, aut cum unius detrimento alteri quid largiri. *III. REG. 21. GROT. III. XX. §. 7.*

CLXXXV.

II. Quoniam onera publica ab omnibus æqualiter ferenda sunt, Imperanti incumbit, efficere, ut necessitate desinente
ces-

cesset quoque ejus juris effectus, si obligatio redeat iis refarcitionem præstandi, qui præcipuo onere gravati fuerunt. *) Atque ideo jus habet Imperans adigendi reliquos cives, ut in eum scopum conjunctis concurrant viribus. Aliud de damno ab hostibus illato dicendum foret; est enim casus fortuitus mutua vice inter cives tolerandus. BYNKERSH. *Quæst. J. P. L. II. c. 15.*

*) TAC. *Ann. I. 75. L. 9. C. de oper. publ.*
GROT. *II. XIV. §. 7.*

CLXXXVI.

III. In solo statu necessitatis vel majoris cujusdam utilitatis reperitur sufficiens ratio, ex qua jus eminens intelligi possit; quæ ratio justifica, seu principium hujus juris, aliis etiam *ratio status* dicitur. An autem jus eminens dominium sit, an imperium, quæstio est de nomine; etsi ostensum sit, quod illud jus, dum circa res versatur, dominium, quando vero personas afficit, potestas, vel imperium, jure dici queat.

CLXXXVII.

Atque ita triplex esse jus in bona civium privata majestaticum videmus. I. supremæ inspectionis, II. jus in partem confectariorum, III. jus eminens in ipsam rerum substantiam, & personas subjectionum, quæ cuncta sub imperio civili generatim continentur.

CLXXXVIII.

Nova nobis hic supremæ inspectionis exempla suppeditant leges contra scænebre malum, in aleatores, prodigos, in eos, qui bona in certa alienant collegia, qui testamento nimias concedunt libertates, nimia legata aut fideicommissa faciunt, atque leges usucapionibus, donationibus, hæreditatibus ac contractuum æqualitati invigilantes. Interest enim reipublicæ, ne quis re sua male utatur. Cf. §. 2. §. de his, qui sui vel al. Jur.

CLXXXIX.

Quamvis jus reipublicæ administrandæ ad eos tantum pertineat, qui imperio civili gaudent, fieri tamen non potest, ut unus aut etiam plures, immo vel omnes colle-

collectim sumti singula civitatis expédiant negotia , sed viris indigent prudentibus , rerum peritis & usu doctis , quorum consilio & opera perpetuo utantur.

CXC.

Quia igitur in unione virium , quarum dispensatio in Imperantem translata est , etiam actiones & operæ singulorum subditorum continentur , consequens est , ut Imperans jus habeat , actiones atque operas subditorum pro exercitio administrationis publicæ exigendi. LIVIUS XLIV. 22.

CXCI.

Status , in quo persona certis incumbere negotiis , eaque obire perfecte obligatur , dicitur *munus* , & nunc *publicum* , nunc *privatum* est. Itaque competit Imperanti jus conferendi munia publica , quæ etiam officiorum publicorum nomine veniunt , siquidem ab obligatione ad officium consecutio patet. Eandem ob causam , qui hac ratione obligatus est , audit *Minister* , *Magistratus* , *Potestas minor* , *Consiliarius* , *Officialis publicus*.

CXCII.

CXCII.

Jus hoc conferendi munera Imperans quidem tenetur erga socios exercere, sed non potest candidatus in munerum distributione hoc vel illud profecto jure exigere. Potest porro Imperans vel generatim *expectativam*, vel *jus speciale succedendi* in certum quoddam munus conferre, ubi priori casu nudam spem, posteriori jus quæsitum candidatus nanciscitur.

CXCIII.

Est & Imperantis jus substituendi, aliumve adjungendi officialem, qui idem officium gerenti adjutorio sit. Ceterum qui propria auctoritate munus publicum sibi adrogare tentaret, læderet imperium civile, quia potestates hæ minores jus omne a summa habent, neque plus tenent; quam ipsis datum sit, adeoque a voluntate Imperantis dependent.

CXCIV.

Qui etiam præscribere ministris suis agendi normam, investigare, an suo quisque munere recte fungatur, probos confirmare, improbos aut desides corrigere, vel

vel dimittere potest, immo invitos cogere ad suscipienda munia, petitaſve dimiſſionem illis recuſare. Quare hi officiales reſpectu Imperantis manent ſubjecti & perſonæ privatae. GROTI. I. IV. §. 6. LEYSER. ad Pand. ſpec. 570. 571.

CXCIV.

Multiplex jurium majeſtaticorum eſt exercitatio, officia itaque publica in diverſas etiam abeunt claſſes. Sunt quippe negotia externa belli, pacis, ſœderum, ſunt & interna ſcilicet eccleſiaſtica, politica, judicialia, cauſſæ fiſci & ærarii, tum commercialia, quæ civium commercia comprehendunt.

CXCVI.

Pro externis Miniſter ſtatus & Legati in aulis peregrinis, pro internis Antifites religionis ad Eccleſiæ naturam comparati, generalis politiæ Director, ſummus judiciorum Præſes, primus Rationarius & fiſci procurator, ſupremus commerciorum Inſpector & primus precum Arbiter, pro utriſque vero ſupremus rei bellicæ Præfeſtus, ſummus rei navalis Dux, cum admi-

miralitatis collegio haberi solent, quorum singuli rursus diversas personas atque integra tam superiora, quam inferiora collegia dirigunt.

CXC VII.

Ita & uni plura rerum gerendarum capita aliquando, vel unum caput pluribus pro re nata committitur. Ne vero tot collegiorum operationes inter se confligantur, formiatur sæpe ex præsidibus vel aliis consiliariis, vel ex ambobus simul supremum status consilium, quod potissimum in majoribus civitatibus, veluti centrum, unitatem constituat.

CXC VIII.

Quemadmodum rerum pretium ex quantitate perfectionis desumitur, ita & hominum valor atque existimatio ex majori vel minori perfectionum gradu pendet. Et si enim existimatio omnibus connata sit, ac naturaliter æqualis, ea tamen simplex tantum est, atque sola abstinentia a malo continetur. Hic vero de æstimatione civili & hypothetica est sermo, quæ ex causis superadditis variari solet.

CXC IX.

CXCIX.

Is, cui major tribuitur valor, præcellit, præcellentia unius hominis præ altero *dignitas* dicitur. Ex quo fluit, summam in republica dignitatem apud Imperantem residere, quippe qui juribus gaudet maximis, atque imperio, cui alii sese subicere, ejusque adeo dignitatem præ se cognoscere tenentur.

CC.

Officiales publici jura exercent civili imperio adnexa, ac ideo in aliqua dignitate sunt positi, quæ eo major est, quo plura vel majora fuerunt iis munera demandata, hisque, vel animi, vel corporis magis robore perfunguntur. Quapropter ad jura majestatica adjungi etiam debet jus conferendi dignitates, & signa externa, quæ illis cohæreant determinandi, veluti titulos, præcedentiam, insignia, sive gentilitia, sive ordinis mere personalis.

CCI.

Proin huc spectat jus, lites de proedria decidendi & suum cuique assignandi dignitatis gradum, ut adeo Imperans fons omnium ci-

vilium dignitatum verissime nuncupetur. Ratio vero perfacile colligitur, cur in republica ordines vel equestres vel togati ad æmulationem alendam instituantur, cur sæpe leges famam notent, & cur iusta ex causa dignitate quis & nobilitate sua possit spoliari.

CAPUT VIII.

DE JURE IMPERANTIS CIRCA
RELIGIONIS NEGOTIA.

CCII.

Eminet illud inter Imperantis officia, ut in subsectorum animis & virtutes excitet omnigenas, & qua pote foveat, quæ quoniam singulæ nituntur pietate erga summum numen, hanc maxime promovendam, tum etiam illis, qui in cœtu civili divino incumbunt cultui, opitulandum esse, tam certum est, quam certissimum ab obligatione ad finem jus ad remedia non posse separari. Nec enim qui ad numinis adorationem totius

tius naturæ voce excitabantur patrumfamilias singuli, postquam in civitatem coiverunt, minus ad eum cultum obligari aut voluisse aut potuisse judicandi sunt. *I. ad TIM. II. v. 2. NOVELL. Theod. & Valent. de Judæis Sam. hæc. & pag.*

CCIII.

Quare civitatis Rector imprimis, ne pietatis exercitia turbentur, neve cives actiones suas externas a jure naturæ detorqueant, præcavere debet. Et porro doctores aptos probosque denominare, qui ad pietatem in societate colendam alliciant, atque contraria exstirpent vitia, eorum autem dignitati & honestæ sustentationi adpræme consulere. *ROM. XIII. 4.*

CCIV.

Atque ob eandem causam templa ædificare, dies festos, ceremonias & congregationes piorum publicas instituere cordi habeat, nec unquam patiat, ut cives Dei cultum proterant, aut atheismum, idololatriam, ceteraque bonis etiam moribus contraria opinionum monstra disseminent, ac ita fortissimum obedientiæ civilis vincu-

lum convellant. D. AUGUSTIN. *contra Crescon. L. III. c. 51.*

CCV.

Non dicas ab Imperante ad congregationes publicas aliaque religionis negotia vi cogi subditos haud posse, siquidem a nemine id, quod ipse malum esse putat, liceat extorquere. Nam etsi stulta ac erronea alterius opinio legibus flecti nequeat, tamen boni publici causa civis, spectata sola Religione naturali, jure ad actionem cogitur externam, quam ipse falso sibi velut malam repræsentat. Secus neque ad patriæ defensionem suscipiendam compelli posset, qui eam rationi contrariam fore perperam judicaret.

CCVI.

Quum societas ad Deum eodem modo colendum inita sit Ecclesia, & quidem *universalis*, quæ per terrarum loca quæcunque dispersa est, vel *particularis*, quæ in certis quibusdam locis, provincia, pago vel vico existit, determinatus autem Deum colendi modus religio vocetur, non obscurum est, esse aliquos actus pietatis, qui ita pendeant ab imperio civili, ut quam-

vis

vis religio proprius civitatis finis haud sit ,
tamen Imperans jus quoddam circa Ecclesiæ
suæ particularis & religionis negotia dispo-
nendi sibi asserere valeat, quod vulgo *jus circa
sacra* nuncupatur. GROTI. II. XX. §. 46. n. 4.
CCVII.

Hic cultus vel internus est vel exter-
nus; itaque actus etiam religionis in inte-
riores & exteriores abeunt, ambo vero aut
essentiales sunt, si salva religione abesse ne-
queant, aut *accidentales*, adiaphori & arbi-
trarii, quando ii non debent eodem modo
fieri, adeoque eorum mutatio divinæ non
disconvenit voluntati. Ita agnoscere Dei
existentiam, providentiam, ad cultum essen-
tialem religionis naturalis spectat; ad loca
& tempora, externæque determinationes,
sub quibus preces fieri soleant, cultum ar-
bitrarium efficiunt.

CCVIII.

Jus ergo hoc circa religionis negotia
quatenus extendatur, probe advertendum
est: quum enim homines corda scrutari ne-
queunt, sub hoc jure ea sane non com-
prehenduntur, quæ Dei cultum respiciunt

mere internum. Sed nec ea, quæ a Deo seu rationis ope, seu per revelationem nobis diserte manifestata sunt, quæque vocamus *dogmata*, quia nimirum salva Dei voluntate aliter esse non possunt, immutare a civili arbitrio pendet.

CCIX.

Et profecto qui civitatem constituunt, jus non habent paciscendi, quod tanquam veram religionem illam, quæ majori placebit parti, velint agnoscere, quod ea tum naturali demonstrationi everti nesciæ, cum traditioni divinæ innitatur. Neque Rector civitatis vi quadam jubere potest, ut quis id pro vero agnoscat, de quo per argumenta persuasus, aut convictus nondum fuerit. Nec demum interna, id est, spiritualis humana potestas naturaliter ulla existit. LACTANT. *Div. Inst. V. 14.* CASSIOD. *Var. II. 27.*

CCX.

Urgebit fortasse quispiam, incumbere utique imperanti, ut instruantur cives, atque hoc modo etiam internum cultum ad ejusdem potestatem videri esse revocandum.

dum. Longe alia autem quæstio est, quibus rebus conveniat cives imbueri, alia, ad quas iidem vi externa compelli queant.

GROT. II. XX. §. 44.

CCXL

Existunt itaque actus religiosi coactionis expertes, five quod animo & cogitatione continentur, five quod contrarium rectæ rationi & verbo Dei speciali repugnat. Libertas a tali coactione dicitur *Libertas conscientie*: quæ igitur cuilibet per imperium civile salva esse debet, quod nemo humanam cogitationis pœnam patiatur, nec a quoquam obstringi possit, ut agat id, quod a divina voluntate alienum est, utique in officiorum conflictatione, hominibus potius quam Deo obsequatur. DAN. IV. 7. ROM. VIII. 15. HEBR. XI. 15. DIST. XLV. c. 5. GROT. II. XX. §. 48.

CCXII.

Quemadmodum vero idem naturæ auctor & civitates, & religionem veram existere voluit, ita religio omnis, quæ civitatis finem evertit, aut remediis ad eum obtinendum necessariis impedimenta ponit,

nit, religio vera cenferi nequit, ut adeo character hujus veritatis etiam fit, si religio simul ad salutem civitatis conspiret. Quare etsi focii civitatis simul cujusunque demum Ecclesiæ fuerint focii, tamen imperium civile juribus in illos integris utitur, neque Ecclesia qua talis iisdem derogare valet. *cf. Dist. XCVI. c. 6. Grot. I. II. §. 7. n. 3.*

CCXIII.

Quapropter Imperans gaudet jus actiones Ecclesiæ essentielles vi supremæ inspectionis examinandi, non quidem, ut de iis aliquid decidat, sed ne dogmatum obtentu doctrinæ aliæ bono civili adversantes propalentur; immo & ecclesiasticam societatem civili saluti contrariam, utpote erroneam *excludendi*, ne communi deinceps bono impedimenta ponat; atque *providendi*, ut Ecclesiæ veræ negotia cum salute civitatis consentiant.

CCXIV.

Id quoque suo sibi jure adsumit Imperans, ut invigilet, ne quis piis exercitationibus abutatur, eas pecunia prostituat, vel
pe-

petentibus Ecclesiæ officia sine caussa, & cum publicæ tranquillitatis discrimine, dene-
gare attentet, deinde, ut dissidentes in
Ecclesia, quatenus turbas foveant, nec aliter
eorum speratur emendatio, etiam territo-
rio excludat. NOVELL. JUSTINIANI LXI.
princ.

CCXV.

Et quia jura majestatica ex civitatis
sine mensuram capiunt, ea religionis nego-
tia perpetuo ex imperio civili pendent,
quæ ad societatem civilem respiciunt, aut
quorum executio sine potestatis civilis ad-
jumento nequit obtineri. Non enim ex
sola Ecclesiæ notione potestas aliquem viri-
bus physicis cogendi, seu jus violentiæ col-
ligitur. CAN. 20. C. XIII. q. 5.

CCXVI.

Pertinet porro cura Imperantis ad res
sacras, quæ velut templa & imagines cul-
tui divino dicatæ sunt, deinde ad bona ec-
clesiastica, seu res Ecclesiæ, quæ ad usum
quemdam societatis ecclesiasticæ spectant,
non tamen directe & simpliciter ad cultum

divinum destinantur. *L. 14. § 23. C. Just. de SS. Eccl. Nov. VII. § CXX.*

CCXVII.

Dein si orta Ecclesiæ controversia tumultus in republica enascerentur, erit jus Imperanti eam provisionis more sopiendi, ut constet, quid docere aut externe agere interea conveniat, vel efficiendi, ut liberum sit utrique parti mentem declarare suam, & citra contumeliam tueri, vel ut de eo, quod in disputationem deducitur, pars utraque silentium servet. *v. CAROLI M. Capitular. I. 122.*

CCXVIII.

Actiones, quæ quoad civitatem indifferentes sunt, ab imperio civili eximuntur, quare in iis cives libertate fruuntur civili, ut propterea territorio nequeant excludi. Quoniam vero non semper civitatis intuitu indifferentia sunt, quæ ita dicuntur, etiam in his jus supremæ inspectionis locum fortitur. Atque si lis inter imperium ac Ecclesiæ socios vertatur, an tales actus ad religionis essentiam non pertinentes civitati indifferentes videantur, an potius eidem noceant, tum
in

in dubio præsumtio pugnat pro decisione imperantis civilis, cui utpote soli res omnes civitatis circumstantes patere debent, donec nempe contrarium luculenter doceatur.

CCXIX.

Disputari, exempli causa, posset, utrum civitatis respectu indifferens sit, Ecclesiæ focios in aliam concedere civitatem, negotiorum Ecclesiæ inibi tractandorum ergo; cœtus in regione Imperantis majores habere; certam personam suæ præficere societati; certum locum, modum, tempus divini cultus statui, quodam ciborum genere abstinere. Porro an pœnæ ab Ecclesia sanctæ in peregrinationibus, abstinencia, aut pecunia consistentes, in civitatis detrimentum vergant; an templa ad arcendum hostem demoliri oporteat; an res Ecclesiæ deminutionem, an augmentum admittant.

CCXX.

Qua in re firmiter tenendum est, quod si quando uni semel civitati, quid in Ecclesia salva religione licuit, naturaliter etiam al-

teri eadem incolumi idem licere oporteat; ne secus præter societatis naturam, æquales Ecclesiæ ejusdem focii inæqualibus juri- bus censeantur. Unde quam maxime hi- storia rerum gestarum simul ac experientia iis commendatur, qui intima disciplinarum principia perspicere nequeunt.

CCXXI.

Illud vero extra dubitationem positum est, pacta licita Imperantem inter & Ecclesiæ socios conventa ab illo servanda esse, veluti si placuisset, ne in territorio ci- vilitatis falsa tolleretur religio, & ne ipse, qui Majestate fulget, diversum Dei colen- di modum amplectatur, aut in aliam tran- seat Ecclesiam; a quarum conditionum im- plemento, si modo imperium ea lege dela- tum, ut si secus fecerit, amittatur, reti- nere velit, invitis se eximere sociis haud quaquam valet.

CCXXII.

Ex his jam colligitur: Imperantis jura non modo, ut supra exposuimus, generatim, sed & speciatim æque religionis intuitu ad tria redire capita, quæ sunt, I. Jus ferendarum
le-

legum , quæ Dei cultum promoveant , & impietatem evellant , II. Jus supremæ inspectionis , quo præcavere potest , ne Ecclesia noceat , utque turbatores excludantur , III. Jus exsequendi seu dirigendi negotia non essentialia seu arbitraria ad salutem civilem , sive Imperans ipse sit Ecclesiæ eidem confociatus , sive alii religioni addictus. S. AUGUST. *Contr. Cresc. Gramm. L. III.* GROTI. I. II. §. 7. n. 2.

CCXXIII.

Ubi tamen , si intra naturalis rationis limites perman eas , ante alia in externa Ecclesiæ ordinatione considerandum est , an Ecclesia , cui Imperans civilis adhæret , societas sit æqualis , an inæqualis , deinde , si sit inæqualis , an is ipse Imperans , an alius separatim eidem præfideat , quod quidem fieri posse minime dubitandum est. Imperium enim vel sine ullo limite , vel certis circumscriptum finibus concedere fas est , ut adeo populus sibi etiam totum jus circa Religionis negotia reservare , vel idem speciatim alicui alii præter Imperantem civilem , aut huic soli omne potuerit conferre. cf.

GEN.

GEN. XIV. 18. PARALIP. II. 19. v. 11.
WOLF. J. N. T. VIII. §. 65. & 955.

CCXXIV.

Ac siquidem societate æquali contineatur Ecclesia, Imperans civilis qua socius non nisi jure suffragii gaudebit; si vero societati huic tanquam inæquali præsit Imperans, negotia religionis externa eo modo, quo civilia, diriget. Si denique diversum Ecclesiæ propositum fuerit caput, Imperans civilis Ecclesiæ intuitu fiet subditus, atque tum ne ex utriusque potestatis conflictu respublica detrimentum capiat, tenebitur negotia civilia ab Ecclesiasticis discernere, atque hos limites latis legibus pactisque confirmare. Quod idem multo magis ad contentiones evitandas ei facere incumbet, si Ecclesiæ socius non sit.

CCXXV.

Ita non difficile erit, de juribus majestaticis circa religionis negotia specialibus dispicere. Atque quod potestatem quidem legiferam attinet, inter hæc jura numerari debent: I. Jus de personis Ecclesiasticis, id est, de omnibus Ecclesiæ sociis generatim,

tum , tum speciatim de iis , qui immediate ad cultum divinum deputati sunt , seu ministris Ecclesiæ , toties disponendi , quoties absque ea dispositione respublica detrimentum pateretur. *L. 3. Cod. de Epis. & Cler.*

CCXXVI.

Hinc II. Jus cavendi , ne horum ministrorum numerus convenientem excedat modum , ne bona eorum immobilia nimium quantum excrescant cum aliorum damno , & ne pecuniæ in profusas ceterisque civibus noxias convertantur largitiones , tum III. definiendi ætatem , qua quis huic statui se addicere possit. *L. 21. 32. 37. C. Th. de Ep. & Cl. L. ult. ibi de Episcop. Jud. L. 7. C. Just. de Episc. aud.*

CCXXVII.

IV. Jus ritibus arbitrariis , processionibus , confraternitatibus , diebus festis aptam tribuendi formam , vel etiam eos restringendi boni communis gratia. V. Jus coercendi legibus immoderatam sive templorum sive personarum illarum copiam , quæ certis addictæ fodalitiis vitæ genus pro-

profitentur a negotiis civilibus alienum. V. Jus abusus jurium Ecclesiasticorum, si diffidia & turbæ inde immineant, tollendi. *cf. COD. TH. L. XVI. Tit. IV. MURATORI felicit. publ. c. VI.*

CCXXVIII.

VI. Jus tolerandi Ecclesias ex religionibus a vera alienis compositas, cum illis pro salute publica paciscendi, aut denique non tolerandi, si rebellionibus fomitem præbeant. Quo loco forte quidam opponent, a gentilibus igitur jure Doctores catholicos excludi. Jure autem ii a gentilibus ejiciuntur, qui turbas foveant, a quibus religio vera abhorret, ceterum tenentur prius gentiles de doctrina cognoscere, quam si probam inveniunt, non minus impium foret eandem arcere, quam ineptum bonas artes, veluti agriculturam, mathematicam, medicinam, eliminare. GROT. II. XX. §. 49.

CCXXIX.

VII. Jus concertationibus religionis negotia tangentibus silentium imponendi, si quæ tumultibus & turbis societatis civilis

occasionem præbeant; VIII. Jus prohibendi doctrinas quascunque noxias reipublicæ, librosque easdem propalantes, quorum atheismus, epicureismus pertinent. *L.*

2. *§. 8. §. 5. C. JUST. de hæret.*

CCXXX.

Ex jure supremæ inspectionis totidem velut rivuli sequentia profluunt jura: I. inspicendi quascunque Ecclesiæ ordinationes & edicta, ac si civitatis intuitu sint adiaphora, placito suo confirmandi, II. negotia Ecclesiæ a profanis separandi, III. ministros sacros, qui negotia ecclesiastica ordinent, ac in bonum commune provehant, convocandi, aut eam in rem eorundem consilia exquirendi.

CCXXXI.

IV. Sed & heterias aliquando cohibendi, V. dogmatum observationem promovendi, VI. præcavendi, ne schismata oriantur, VII. si lites circa sacra existant, colloquia & tractatus instituendi, VIII. invigilandi, ut res sacræ suis adhibeantur usibus.

CCXXXII.

CCXXXII.

IX. Pacta vel promissiones civium de negotiis Ecclesiæ examinandi, eaque antecedenter, si reipublicæ noceant, irritandi, veluti sponsalia, ac matrimonia, etsi jusjurandum accesserit, vel votum; ubi enim actiones ab alterius pendent potestate, quod nostri juris tum non est, nequaquam invito superiore polliceri licet. NUM. XXX. v. 6. §. 13.

CCXXXIII.

Jus demum exsequendi in imperante specialia hæc rursus producit jura. I. Excludendi a directione Ecclesiæ personas illas ecclesiasticas suæ civitatis, quæ sibi suspectæ aut seditiosæ sunt, easque coercendi *). II. Jus personis, quæ sunt in Ecclesia, recursum tamquam ab abusu concedendi, si quando Potestates ecclesiasticæ sua auctoritate in civium damnum abutantur. *Can. 41. CAUS. II. q. 7. can. 31. CAUS. XVI. q. 7. NOVELL. CXXIII. c. 11. JUL. CÆS. de B. G. L. VI. c. 13.*

*) *Can. 9. & 16. DIST. LXIII.*

CCXXXIV.

CCXXXIV.

III. Jus adfistendi Ecclesiæ sua auctoritate, quam *brachium sæculare* vocant, si vel res sacræ, vel res ecclesiasticæ, vel personæ religionis ministerio destinatæ, summa semper observantia colendæ, violentur; IV. Pœnis in Ecclesiæ hostes animadvertendi etiam corporis afflictivis, vel eos eiciendi, si modo reipublicæ pariter hostes fiant; V. Regulas ab Ecclesia constitutas robore civili addito custodiendi. *L. 9. C. Th. de hæret. NOVELL. JUSTIN. CXXXVIII.*

CCXXXV.

Sed non minus intelligitur, quale sit, quod supra diximus, jus Imperantis emittens in Ministros Ecclesiæ, & quomodo illud sese ad res ecclesiasticas porrigat. Scilicet vim id suam toties ostendit, quoties vinculi civilis diffociandi periculum manifestum vertitur. Tunc enim Imperans & personas sacras ad civitatem etiam sanguine suo tuendam juste adiget, & res quasunque in usus necessarios convertet.

CCXXXVI.

Nam qui homines servat, misericors est, ac Deo obsequitur, eumque interne colit, contra res ad cultum solummodo externum & eum quidem splendidiorum spectant, ac ideo in conflictu officiorum cultus Dei internus everti nescius, debet præferri externo, quo aliquando possumus carere. CAUS. XII. Q. II. c. 70. S. AMBROSIIUS *de Off.* I. 17. WOLF. *J. N. T.* VIII. §. 514.

CCXXXVII.

Atque hæc Imperantis & officia & jura eo majus robur indipiscuntur, si perpendamus, religionem non esse modum tollendæ obligationis, aut juris amittendi, neque res Ecclesiæ destinatas bona civitatis, neque personas religionis ministerio addictas cives esse definire.

CCXXXVIII.

Quæ omnia de religione Christiana æque prædicari posse palam fit, quia CHRISTUS, qui quidem Ecclesiam suam unam fundavit & universalem, ac sacra potestate instruxit, *) attamen civili imperio minime

CAP. IX. DE OFFIC. EOR. QUI GUB. CIV. 115

nime derogare intendit, sed *Cæsari dari* jussit, *quæ sunt Cæsaris, & quæ sunt Dei, Deo.* Atque is ipse religionis Christianæ auctor *regnum suum de hoc mundo esse* negavit, omnemque animam civili subesse potestati, *etiam propter conscientiam,* voluit. MARC. XII. 17. LUC. XX. 25. JOAN. XVIII. 36. ROM. XIII. v. 14. I. PETR. 2. v. 13.

*) *Ad CORINTH. Cap. XII. v. 12. 13. 27. seqq. ACT. XX. 28. MATTH. XVI. 18. XVIII. 18. ROM. XII. v. 4.*

C A P U T IX.

DE OFFICIIS EORUM, QUI GUBERNANT CIVITATEM.

CCXXXIX.

Ii, quorum se imperio submiserunt singuli patresfamilias, dum hanc subjectionem acceptant, jam eo ipso tacite simul repromittunt curam salutis publicæ; adeoque ad eum civitatis finem assequendum se obligant. Ex quo fons intelligitur, un-

de profluant officia specialia Imperantium, additorumque iis ministrorum, qui in partem regiminis, seu exercitii Imperii civilis vocati sunt, quippe, quod legitimo usu remediorum, seu jurium majestaticorum continetur. *Cic. de rep. V. seu Attic. VIII. Ep. XI.*

CCXL.

Natura civitatis docet, eam, sicut hominem quemlibet singularem, certis quibusdam erga se officiis teneri. Quare cives singuli ad munera publica se idoneos reddere, civitas tota se in confociatione conservare, quin immo statum suum pro ratione finis perficere, pericula interitus, ac perfectionis suæ impedimenta amoliri debet, ac ideo inprimis virtutes tam intellectus, quam voluntatis excolere, ne barbara, sed docta, culta, iusta, potens habeatur, gloriamque suam in dies propaget.

CCXLI.

Quæ quum civitatis erga se sint officia, adparet: moderatoribus reipublicæ omnes vires eo esse impendendas, ut impleantur. Hinc primum eorum munus
erit

erit rempublicam, in qua versantur, nosse, civitatis finem, statum, vires, ac porro jura & obligationes, quæ cum imperio civili copulatæ sunt, intime perspicere, voluntatem deinde constantem & perpetuam ea tantum faciendi habere, quæ ad bonum ejus regimen spectant. CIC. *de Rep.* II. & *pro Dejotar.* C. IX.

CCXLII.

Quam in rem necessaria est legum reipublicæ tam universalium, quam particularium cognitio, historia aliarum rerumpublicarum, tum accurata domesticæ historiæ & jurium populi notitia, unde ea discantur, quæ ars gubernandi latissime patens exigit, quum *ipsis etiam excellentibus ingeniis citius defuerit ars, qua civem regant, quam qua hostem superent.* LIV. *Lib.* II. c. 43. SALLUST. *B. Catil.* c. 2. CIC. *de LL.* III. 18.

CCXLIII.

Omittenda vero sunt ea studia, quæ a scopo regiminis abhorrent, circumcident negotia, & aliæ occupationes, quæ huic fini adverfantur; qua ratione Rectores

res populorum contentos haud esse oportet notitiis historicis seu veris, seu fabulosis, quod hæ cognitionem solummodo confusam & obscuram pariant; cujus locum ideæ claræ & distinctæ occupare debebant ex solidis scientiarum principiis hauriendæ. *SOCRAT. ap. Xenoph. Memor. LV. SALUST. de rep. ord. n. 42.*

CCXLIV.

Dein ratione potestatis legislatoriæ attendi debet, ne leges prolixæ, vagæ, libertatem sine caussa restringentes, nec plures quam finis civitatis deponat, ferantur. Ergo singulares reipublicæ indagandæ sunt circumstantiæ, plurimumque etiam suffragia exploranda, tum bono exemplo civibus ad legum custodiam præire, privilegia autem, quæ vulnera legum sunt, non nisi rarissime largiri oportebit. v. *LIV. XXVI. c. 36.*

CCXLV.

Quum leges civiles ex naturalibus addendo aut detrahendo efficiendæ sint, cavendum est, ne errores quidam communes pro jure naturæ sumantur, ad cujus
nor-

normam etiam leges civiles antiquæ emendandæ sunt, vel abrogandæ. Leges vero naturales, quas sanctius observari speciatim reipublicæ profuerit, novis pœnis additis muniantur.

CCXLVI.

Nec ob minimam injuriam litibus in foro indulgeatur; quaræ læsiones & culpæ, quas pro varia negotiorum indole præstari e re civitatis erit, determinentur. Si denique leges peregrinas recipere placeat, inquirendum est prius, an per earum præscripta bono civitatis communi consulatur; atque si immutato rerum statu aut agnito postea errore adpareat, eas non esse bono communi congruas, rursus aboleantur.

CCXLVII.

Quod autem potestatem concernit inspectoriam, societates minores & collegia salutis publicæ subordinari, quæ deficient, erigi, inutilia corpora dimitti debent. Porro sanam institui politiam, factiones & sectas præcaveri, foveri artes lucrativas, sellullarias & opificia, commercia propa-

gari, viam facilem ad quærendas opes parari, hinc procul amoveri ea omnia, quæ bona reipublicæ pessumdant, luxum denique arcere, conveniet. SALLUST. *de Rep. ordin. n. 52. 53.*

CCXLVIII.

Inde quòque providendum, ne rerum pretia ab iis solis statuantur, quorum interest proprios majori charitate fructus vendicare, ne studia bonarum artium iis committantur, qui ex plebis ignorantia lucrum captant, aut noxias reipublicæ doctrinas inculcant, quive ipsi doctrina carent, vel diligentia, aut ob ingenii imbecillitatem lites ex litibus ferunt: ne denique religio vel avaritiæ, vel præpotentiæ servire cogatur.

CCXLIX.

Religio non armis propaganda est, sed adversus hostiles impetus defendenda; nihil quoad religionis dogmata, aut ea, quæ in externo cultu cum his essentialiter cohærent, tangatur, sed illa sancte servantur. Et si enim salus æterna non sit finis societatis civilis proprius, tamen qui
in

in hanc convenerunt, officiis erga Deum. renunciare minime valebant; ita cives & doctiores reddentur & meliores. *cf. HOB-
BES. XIII. 5.*

CCL.

Potestatis demum exsequentis rectus fiet usus, si promptæ semper ad protegendam civitatem habeantur vires, neque commeatus, periti duces, miles exercitatus, exploratores ceterave defint, quæ artis militaris regulæ postulant. Bella tamen ob causas frivolas haud inchoanda, & læsiones dissimulare minores potius conveniet, quam civitatem periculis exponere. Mature etiam hæc, si necessitas ferat, agenda, nam miserum est opus, tunc demum fodere puteum, ubi fitis fauces tenet. *PLAUT. Mostell. act. 11. Sc. 1. v. 32.*

CCLI.

Verum & huc spectat obligatio leges exsequendi, auxilium læsis non denegandi, subditos gravamina exponentes, aut protectionem implorantes aditu non prohibendi, jus cuique suum promte reddendi, ne secus litis expensæ ipsam excedant for-

tem, pœnas pro re nata temperandi, restringendi afyla, illudve cavendi, ne det veniam corvis, vexet censura columbas. JUVEN. *Sat. II. v. 36.*

CCLII.

Bona civitatis ad hujus finem dumtaxat consequendum erogari debent; ne igitur majora, quam hic finis postulat, exigantur onera, ne opes subditorum exhauriantur, quorum utilitas ab utilitate Imperantium sejungi numquam potest. Idem enim foret ac corpus truncare membris, ut omnia capiti adcrecant. Quare & jure eminenti Imperans non abutetur, aut dominia & jura privatorum cum juribus suis confundet. DEUT. *XVII. v. 19.* SENECA. *I. Clem. 19.*

CCLIII.

Hinc vectigalia & tributa, habita proportionem ad quantitatem & qualitatem bonorum, tum modum percipiendi faciliorem, imponantur. Nam sæpe non tam opera ipsa, quam præstationum inæqualitatem & acerbum exigendi modum graviter ferre solent cives; *tantum nimirum ex malis publi-*

blicis sentimus, quantum ad privatas res pertinet, nec in iis quidquam acrius, quam pecuniæ danimum stimulat. LIV. XXX. c. 44.

CICER. *Rep.* IV. HOBBS. XIII. 10.

CCLIV.

Quum Imperans instructus esse debeat scientia eorum, quæ ad bonum requiruntur regimen, ad hoc autem omnia negotia publica, atque ea imprimis, quæ consilium in arena desiderant, sæpe oporteat ipsi intime perspecta esse; id tamen aut unius, aut etiam plurium numero Imperantium vires excedat, necessum est, relatione ac consilio virorum prudentum uti, quorum diversi diversis studiis excellent.

CCLV.

Dicuntur hi *consiliarii*, quorum ex notione continuo dispalescit, eos sapientes esse, virtuti deditos, prudentes, jurium majesticorum peritos, exemplo esse aliis, rerum humanarum scientia pollere debere; cordatos præterea, non vero adulatores, aut nugivendulos, qui fumos & inania captent. EXOD. XVIII. 2. SALLUST. *de Rep. ord.* 55. 56. CICER. *de LL.* III. 14.

CCLVI.

CCLVI.

Non sæpe in causis dubiis , & quando res aliqua variis modis ac conditionibus perfici potest , rationes in utramque partem allatæ maturius a pluribus trutinari possunt ; ut quod utile est , decernatur. Neque etiam , quamvis Principes multa polleant scientia , hic carere poterunt. Nec enim ad bonum regimen theoria officiorum sufficit , sed opus est notitia rerum singularium , earumque diversissimarum , cui veritates generales adplicari debeant. Quare illi etiam optime gubernare censentur , qui hac imperii civilis parte , in conferendis muneribus publicis posita , sapienter funguntur. MARTIAL. *VIII. Ep. 15.*

CCLVII.

Quæ res , quo est difficilior , eo majores in bonorum ministrorum electione cautelæ sunt adhibendæ , quæ ad sequentes fere regulas reducuntur. I. Ministri non nascuntur , sed fiunt , igitur solus natalium splendor vel patrimonii magnitudo in confide-

fiderationem hoc loco non veniunt, sed omnibus via facienda, quicunque virtute & habilitate reipublicæ administrandæ præstant. *Patere honoris scirent ut cuncti viam. Nec generi tribui, sed virtuti gloriam.* PHÆDR. L. II. Epil.

CCLVIII.

II. Ut subditi hanc aptitudinem sibi comparare queant, oportet non modo academias & lycea instituere, sed indolem cujusque & ingenium in ipsis rebus gerendis diu experiri, nec enim ex academiis reduces mox impendi possunt, ut de vita & bonis subditorum judicent inexpertes juvenes.

CCLIX.

Itaque agricolas imitari convenit, qui malas evellunt herbas, contra implantant ramusculos, eosque excolunt, donec in arbores excrescant frugiferas, ut in senescentium locum substitui possint. Atque si apti deficiunt viri, non ea juventutis culpa est, sed virorum principum, qui reme-

media juventuti informandæ non adhibuerunt, siquidem egregios invitant præmia mores. CLAUDIAN. *Il. in cons. sil. v. 124.*

CCLX.

Animadvertendum autem est, ne munera personis apta fiant, sed ut idoneæ personæ ad ea magis accommodentur. Sane vel quotidiana docet experientia, multiplicia esse ingenia hominum; *esse viros natos militiæ factis magnos ad verbum linguæque certamina rudes, ea ingenia consularia esse, callidos solertesque juris atque eloquentiæ consultos, urbi ac foro præsides habendos, prætoresque ad reddenda jura creatos esse.* LIV. X. c. 22.

CCLXI.

III. Aptos vero educare officiales parum prodest, si minus tamen idonei impendantur; quare non potest Imperans salva conscientia digniores minus dignis postponere. Commendationes solæ, partium studia, cognationum favor, vulgo nepotismus, hac in re exulent. Quot non idonei commendantur, atque tales videntur, quos experientia inidoneos monstravit?

vit? Externa forma nihil sibi adroget, nam frons, oculi, vultus sæpe mentiuntur.

CCLXII.

IV. Si honores & dignitates indignis conferantur, innumeris turbis administratio reipublicæ confunditur; torpescunt boni, defervet æmulatio, negligunt & reliqui munus suum; plusque nocet officium uni contulisse parum digno, quam si centum alii merita præmia consequantur. Pessima sane illa est reipublicæ conditio, *ubi inter bonos & malos discrimen nullum, omnia virtutis præmia ambitio possidet.* SALLUST. B. Catil. c. 56.

CCLXIII.

V. Imperans Ministros ac Confiliarios observet, ut intelligat, an omnes rationem habeant sui muneris, & an non juribus majestaticis abutantur. Eorum dirigat consilia, ita enim facilius discernet, num ipsi forte non fallant, fallanturve. Quare etiam necesse est, cujuslibet investigare inclinationes atque affectus; ac propterea philosophiam moralem excolere, quæ re-

gu-

gulas artis conjectandi hominum mores sup-
peditat. Quod ipsum ceteris minoribus po-
testatibus faciendum incumbit, quæ sæpe
ab aliis inferioribus deceptæ, decipiunt Im-
perantem. VOPISC. in *Aurelian.* c. 43.
WOLF. l. c. T. VIII. §. 1040.

CCLXIV.

VI. Frustra etiam foret viros impen-
disse digniores, nisi eorum dictis atque con-
siliis paterent aures, aut vero si rebus
ad vivendum necessariis carerent. Tunc
enim ad negligendam vel plane venumdan-
dam administrationem aditus januaque esset
patefacta.

CCLXV.

VII. Boni aliquando mores induunt
malos, quare sæpius eorum administratio-
nem examinare, ac si fraudis conscii sint,
debita eos pœna coercere oportet. *) Nul-
li tamen, qui salubre dedit consilium, for-
tuitus adversus eventus jure potest im-
putari. Cetera disciplinæ politicæ doce-
bunt.

*) L. 4. C. THEOD. de accusat.

C A P U T X.

DE OFFICIIS SUBDITORUM CIVITATIS.

CCLXVI.

Juri administrandi rempublicam, ne ca-
reat effectu, respondet obligatio sub-
ditorum ad ea præstanda, quæ a Rectore
civitatis imperantur. Illorum itaque erit
voluntates subjicere, & vires in omnibus
negotiis civilibus; hinc ea, quæ præcipiun-
tur facere, quæ vetantur omittere, atque
hancce obsequendi promptitudinem etiam
externis signis, data occasione, contesta-
ri. LIV. XXVI. c. 36.

CCLXVI.

Est vero hæc obediendi obligatio ex
perfectarum genere, nascitur enim ex pa-
cto subjectionis civilis, quam si quis de-
negare auderet, is jus læderet transla-
tum in universos, atque adeo justam ipsis
tribueret bellandi causam. Et quoniam
lex naturæ, ejusque auctor DEUS præ-

I

cepit

cepit civitates , per se liquet , cives non modo in foro externo, sed & in foro interno, seu conscientiae, ad parendum obstringi. ROM. XIV. 5. PETRI I. Ep. II. v. 13. 19.

CCLXVIII.

Frustra vero nonnulli ad leges confugiunt , quas vocant *mere penales* , quasque omni obligatione interna destitutas arbitrantur. Si enim legislator legis editum, minus quam ejus sanctionem pro fine habet, tunc ex poena percipit voluptatem, & porro subditos odio persequitur ; quod quum legi naturali omnino repugnet, absurdum sane est, hujusmodi legum monstra cogitare.

CCLXIX.

Et si dein filii familias & servi cives stricto sensu non sint, neque in hunc numerum extranei seu peregrini territorium civitatis subeuntes proprie referri possint, attamen illi domestico duce imperio , quod a civili pendet , ad finem hujus majoris societatis contendere perfecte obligantur , hi autem vi juris territorialis ea cuncta
omit-

omittere debet, quæ securitatem turbant,
& eatenus ad *subditos temporarios* pertinent.

CCLXX.

Reſtor civitatis itaque filioſfamilias ad militiam & munera publica adigere poteſt, non vero ad ea, quæ cum ſocietate nulum plerumque nexum habent, & ideo domeſticæ relinquuntur poteſtati; puta, ut certam perſonam ducant in matrimonium, vel artem determinatam addiſcant. Quæ tamen ipſa ſi conflictus cum ſecuritate comuni ſibi depoſceret, nemo dubitabit, Imperanti etiam horum intuitu eandem poteſtatem & vim attribuere.

CCLXXI.

Quamobrem focii licet remotiores civitatis ad actiones tam negativas, quam affirmativas vi imperii ſummi tenentur, ſuntque eorum officia duplicis generis, alia generalia, ſeu omnibus *communia*, quæ fluunt ex noſione civitatis atque ex illa obligatione fundamentali, qua cives ſinguli ſummo imperio adligantur, alia ſpecialia ac *propria*, quæ ex peculiari cuivis demandato munere oriuntur. Priora hac definiuntur

tur propositione : *Vive, quantum in te est, convenienter juribus majestaticis.* Posteriora hoc axioma enunciat : *Nullum ambias munus, ad quod idoneus non es, quam vero spartam nactus es, banc orna.*

CCLXXII.

Si autem peregrini in civitatem admittantur, quod ab Imperantis voluntate pendet, hi dumtaxat vi juris territorialis obstringuntur 1.) ad actiones negativas, & 2.) ob factum singulare, si contrahant, aut delinquant, nisi pacto vel expresse vel tacito aliud actum sit; 3.) Legibus affirmativis illis subjacent, quæ aliquando in ipsos peregrinos feruntur; 4.) Onera præstare debent rebus publicis adnexa, si iis utantur.

CCLXXIII.

Implet leges negativas, qui abstinet a læsione, & porro eadem hisce enunciatis continentur. I. Non ponas impedimentum Imperanti, qui actiones subjectorum ad externam felicitatem dirigit. Contra quod peccant, qui in jus vocatum vi eximunt, dolove, aut captivum subducunt,

cunt, qui desertores militiæ abscondunt, quique delectum habentibus resistunt. II. Societatem non ineas ab Imperante nec expresse nec tacite confirmatam; est enim injusta. Ubi tamen nulla adest lex prohibens, ibi sufficit tacita permissio.

CCLXXIV.

III. Læisionis depulsionem aut damni reparationem ne propria vi, sed auctoritate Imperantis persequaris; hujus enim folius est determinare modum, quo bella gerantur. Quod jus si cuilibet concedatur, jam suprema læditur jurisdictio, omnisque definit securitas, primus civitatum finis. Hinc neque debitores violentia compellere, nec manus cum civibus conferre, sive duella inire licet.

CCLXXV.

IV. Ne des mala agendi occasionem, neque V. concivium tuorum commoda intervertas. Quo nomine coercentur, qui aleam foveant, qui turpes conciliant amores, qui annonam flagellant, qui illicita exercent monopolia. Quare & ideo ab extraneis jure petuntur vectigalia, ne res

suas viliori, quam incolæ, vendentes pretio, hos honesta vitæ sustentatione fraudent.

CCLXXVI.

Quoniam leges affirmativæ subditos attingunt cives, facile colligitur, quod hi te-
neantur non solum non turbare securitatem,
sed simul eandem promovere. Hinc abstinere ab otio, commissæ sibi munera suscipere, rite administrare, aliisque bona agendi opportunitatem præbere, ad salutem denique publicam omnibus viribus conniti, eamque posito conflictu ante salutem privatam ponere. ARRIAN. *Epiclet.* II. c. 10. HOBBS. XIII. 3.

CCLXXVII.

Hinc est, quod jussu Imperantis incumbat civibus arma capere, civitatem tueri, & operas præstare militares, neque illas fuga aut mutilatione detrectare, pupillorum *tutelam* gerere, civiumque minorenium *curam*. Si tamen physica tunc aut moralis obtingeret impotentia, causam ejus justam allegare, seu se *excusare* oporteret, atque

atque Imperantis erit, ob conflictum officiorum exceptionem facere.

CCLXXVIII.

Nascitur scilicet obligatio ad laborandum ex nexu civili, sed præferendi sunt labores illi, quibus securitas quam maxime præstatur. Ideo senes, officiales civiles, feminæ, sacerdotes, debiles, ad militiam non sunt cogendi, si adsint validiores. Verum & extranei neque ad tutelam, neque ad bellum aliaque munera adigi poterunt inviti.

CCLXXIX.

Quoniam amor in voluptate ex alterius perfectione consistit, singuli autem cives eo uniri debent, ut respublica, cujus sunt membra, & hinc ejus territorium seu *patria*, quoad fieri poterit, perficiatur, non obscurum est, maxime amandam esse patriam, eique præ privatis fociis plurimum essetribuendum. A qua tamen differt locus nativitatis, siquidem quis etiam extra patriam in lucem edi potest. CICERO. *Off.* I. 17. LIV. XXVII. 34.

CCLXXX.

Discessus personæ nexui civili adstrictæ e civitatis territorio sine animo amplius redeundi factus dicitur *emigratio*. Quia emigrans se officiis perfectis, & affirmativis exsolvere tentat, id vero invitis universis locum non habet, manifestum fit: nemini jus emigrandi sine consensu Imperantis saltem tacito competere; immo ubi quis emigraverit, jus Imperanti perfectum nasci, eum a vicina gente repetendi, & puniendi. OVID. *Metam.* XV. v. 28.

CCLXXXI.

Nec obloquaris cum BOEHMERO *) civem se tantum subjecisse, ut quamdiu subditorum numero continetur, sinceram obedientiam præstare velit. Nam promisit utique societatem civilem, igitur hoc pactum servare debet. Et quamvis, quod ille urget, nullum inde fieri Imperanti præjudicium videatur, id tamen falsum est, siquidem Imperans jure, quod in civem habet, invitus privaretur, præterquam

quam quod etiam jus turbetur univerforum,
quo in istum emigrantem utuntur.

*) *J. P. U. part. XIII. c. 2. §. 18. not.*

CCLXXXII.

Inde sequentes conclusiones lucem capiunt. I. Ideo vetita est emigratio, quia pacto societatis repugnat, ea tamen licita fieri potest, si ipsa consentiat civitas, si subditos alere eorumque opera uti nequeat, si occupatae ab hostibus terrae relictio pacis foedere permessa sit, si denique discedentes non sint cives, nec ratione delicti aut contractus obligati.

CCLXXXIII.

II. Solet aliquando consensus dari a conditione suspensus, ut emigrans ad certum solummodo locum transire possit, quae itaque sancte servanda veniet. Ita potest quidem *commutatio domicilii*, non autem *patriae concedi repudiatio*. III. Qualis conditio etiam rebus addi solet, ut certus emigrationis census praestetur, quod bona ibi, unde emigratio fit, sint acquisita, si tamen & huic censui modus expressa conventionem positus sit, eum transgredi haud licebit.

CCLXXXIV.

IV. Jus *albinagii* dicitur, quo hereditas vel legatum defuncti civis vel peregrini extraneis denegatur. Quoniam cives societati civili ad actiones tenentur affirmativas, non autem peregrini, consequens est, ut jus albinagii exerceri quidem jure possit in patrimonio civium, non autem in bonis peregrinorum, nisi de ea lege prius fuerint admoniti, aut id jure retorsionis statuatur.

CCLXXXV.

V. Quod de genere traditum est, id æque de specie valet. Igitur officialis invito Imperante dare muneris dimissionem haud poterit, nisi sit subjectus temporarius certis conditionibus evocatus, quæ non impleantur. VI. Contra nec Imperans jus habet cogendi cives, ut emigrent, nisi ii ratione delicti, veluti si turbas foveant, plectendi sint exilio.

CCLXXXVI.

Immo vero & civis innocens tenebitur e civitatis territorio discedere, si ejus defensio cum salute publica collidatur, quia
ab

ab initio quisque pollicitus est, bonum proprium bono publico se posthabiturum, ut itaque tunc ob officiorum conflictationem civis vi potestatis eminentis deferatur, atque ad statum suum naturalem redeat.

CCLXXXVII.

At propter eandem causam non deferri modo, sed & hosti simpliciter extradi poterit, omni alio servandæ civitatis remedio deficiente, innoxius civis. Quid ni enim id liceat; quum sæpius tot militum millia præsentis mortis periculo committere necesse sit? *Cf. WARNER. de Gest. Longob. L. V. c. 4.*

CCLXXXVIII.

Quoniam vero jus vitæ & necis non habet Imperans civilis, nisi in delinquentes ob necessariam civitatis defensionem, civem innocentem nec ad evitandum imminens societatis excidium, multoque adeo minus ad efficiendum, ut in vera religione moriatur, vita privare fas erit. Alia igitur est deditionis, alia necis ratio. *GROT. II. C. 25. §. 3. CICERO. Offic. I. 45.*

CCLXXXIX.

CCLXXXIX.

Hanc nondum infert, qui extradendo jubet civem se periculo exponere, quod facere aliunde tenetur, modo adsit sufficiens certitudo, hoc remedio civitatem ab interitu liberari posse. Quam tamen rarissime adesse lubenter fatemur. Quis enim scit, an cive extradito, quem hostis deposcit, salva ideo futura sit multitudo? Lupi certe ab ovibus canes sibi tradi obtentu pacis postularunt, reipsa vero ut oves facilius devorarent. PHÆDR. *Fab. app.* XXI. PUFENDORF. *L. VIII. c. II. §. 5.*

CCXC.

Subditus inobediens & refractarius est *læsæ Majestatis* reus, si jura quædam majestatica sibi adroget. Idem est *rebellis*, si directe & animo dolo armis, tumultu, vel conspiratione securitatem civitatis pessumdare attentet. Fit *perduellis*, si in ipsas personas Imperantium aliquid moliatur. Hinc *læsæ Majestatis*, *Rebellionis*, *Perduellionis* crimina intelliguntur, quorum quantitas ex imputationis principiis patet.

CCXCI.

CCXCI.

Manifesta proin sunt hæc confectaria :

I. Rebelles bellum gerunt late sumtum , quia tamen id inter gentes justum non est , *seditio* potius adpellatur. II. Qui dolo malo Imperantis mandato non parent , sunt *contumaces* , rebelles negative. III. Qui aliquid agit contra honorem Imperantis & famiam , ipse quoque dat ansam tumultibus ; igitur omnis hujus generis actio omitti debet , & hinc ejus statuum , imaginem , aulam , *salvam guardiam* oportet revereri.

CCXCII.

IV. Causæ morali actio imputatur , qui igitur dolo malo per injustam administrationem cives turbis involvit , inter rebelles numerari meretur , ad quos & concionatores referri possunt , si contra regiminis morbos detonando foveant tumultus. Et si enim mala ita se haberent , tamen aliis longe remediis forent corrigenda. V. Qui *gravamina* demisse exponunt , rebelles dici nequeunt , sed potius querulantes , *minus contenti*.

CCXCIII.

CCXCIII.

VI. Deus quidem sic lædi non potest, ut ejus diminuantur perfectiones, qui tamen honorem ei debitum non præstant, qui attributa solius Dei propria adtreſtant, ii ex analogia *læſæ divinæ Majeſtatis* rei dicuntur. VII. Peregrini non proprie fiunt rebelles, ſed hoſtes, nec læſio ſoli privato civi illata ad rebellionis crimen pertinet.

CCXCIV.

Quum pœnæ ſuos debeant tenere auctores, quando unus ex familia perduellionis reatum incurrit, ejus uxor & liberi tormentis quidem affici nequeunt; ſi tamen liberi bonis privantur paternis, nomen mutare, dignitatem perdere, immo & aliquando ex territorio diſcedere cogantur, eſt id remedium ſecuritati obtinendæ neceſſarium, & non pœnis, ſed infortuniis adſcribendum. Docuit nempe experientia liberos atque agnatos delicti ab iis patrati immemores, ſuorum necem ulciſci voluiſſe.

CCXCV.

CCXCV.

Quare indigna homine est HOBBSII doctrina, qui ex eo, quod in bello etiam innocentes occidantur, perduellium quoque liberos eodem jure de medio tolli posse argutatur, quæ porro liberorum occisio fit defensionis reipublicæ species, ne iidem patrem ulciscantur.

CCXCVI.

Quam parum autem hæc se consequantur, nemo non perspicit. In bello enim, præterquam quod aliud non esse juris nostri prosequendi remedium ponimus, innocentes non ex proposito nostro, sed casu quodam vitam perdere liquet. In perduelles datur quidem jus belli, latius accepti, id tamen per modum judicii exerceri debet, in quo adpareat, quale sit innocentem inter & noxium discrimen, atque ideo leniora semper præferenda veniunt defensionis remedia, quamdiu iis securitas satis obtineri potest.

CCXCVII.

Si cum rebellibus Imperantes pacta ineant, putant aliqui ista non stringere.

Ve-

Verum, qui cum illis paciscitur, Imperans eo ipso reatus gratiam censetur facere, atque adeo servare debet, quod promissit, quamvis etiam in captivitate ad id fuisset inductus; quum secus nulla foret ad unionem cum seditiosis redeundi ratio. Quemadmodum autem alios cives, ita hos in gratiam receptos vi juris supereminens in extrema necessitate juribus suis destituere licebit. GROTI. III. c. XIX. §. 7.

CCXCVIII.

Status, in quo judicia cessant, vocatur *justitium*. Est de cetero vel *universale*, si fit in tota civitate, vel *particulare*, si in aliqua solum civitatis parte sese exserat. Dein aliud est *necessarium*, si ob calamitates publicas invito Imperante invalescat, aliud *voluntarium*, si ejus ratio in Imperantis arbitrio reperiatur. Aliud *continuum*, *perpetuum*, quando nulla est spes judicia restitutum iri, aliud *temporarium*, si nonnisi ad aliquod tempus jurisdictio suspenditur. GELL. N. A. XX. I. LIV. Lib. X. c. 4. II. C. IV. I. X. I. 4. tit. dig. de fer.

CCXCIX.

CCXCIX.

Quum remedia duriora nunquam adhibere fas sit, quamdiu leniora supersunt, ac malum minus majori præferri oporteat, perspicuæ sunt hæ conclusiones: I. Ubi justitium est necessarium, attamen particulare, judicia generatim non cessant; nisi igitur summum fuerit in mora periculum, oportebit superiora adire tribunalia.

CCC.

II. Ast si ex mora summum nascatur periculum, nec judex statim adiri queat, quælibet erit honesta ratio expediendæ salutis. Ita licet propriam possessionem vi tueri, & se etiam cum aggressoris nece defendere, sicque pariter in insula deserta, vel oceano jus suum propria auctoritate persequi fas esset.

CCCL.

III. Si justitium indicatur voluntarium & universale quidem, sed temporarium, finito hoc tempore copia judicis haberi potest; itaque expectatione extrahendum est tempus; at si res moram non patitur, ad illam speciem justitium haud ex-

tendi solet. Quare tempore feriarum de vi & alimentis jus redditur.

CCCII.

IV. Si justitium voluntarium fiat particulare, velut ob denegatam justitiam, nec extremum sit discrimen, minus erit malam injuriam pati, quam turbas ciere; oportet itaque malum silentio involvere. Nam singuli jus suum ob communem quietem universis renunciarunt. Et quum sine causa quisque sibi fingere possit, jus sibi non esse redditum, tumultus occasionem quivis fumeret. Hinc datis ab Imperante debitori induciis, *moratorium* vocant, creditor adquiescere debet.

CCCIII.

V. Putant multi civem injuste condemnatum tacita uti posse compensatione; sed quia facile quisque sibi de justitia causæ suæ blanditur, dein potest compensans detegi, atque ut fur puniri, perniciosa est hæc eorum doctrina, quæ bonum privatum ordini in civitate servando posthabet.

CCCIV.

CCCIV.

VI. Quod si iustitium sit necessarium atque universale & perpetuum, sublatus est nexus civitatis, oritur Anarchia, & cives ad statum naturalem redeunt. VII. Restituta civitate; quæ interim gesta sunt, integra manent, nisi aperte de iniustitia possessionis constet; talia enim facta sine summa perturbatione, pro spolio non habentur, sed externa saltem iusta sunt.

CCCV.

Progredimur ad specialia subditorum officia, quæ a munere cuiusvis pendent. Quum autem munera sint quamplurima, quid cuilibet officiali incumbat, hoc ex cuiusvis muneris declaratione erui debet, velut quale sit officium Belliducis, Ministri, Consilarii, Magistratus, Quæstoris, Iudicis, Advocati, & ejus generis reliqua.

CCCVI.

Omnibus quidem communia sunt hæc præcepta. I. Nemo munus ambiat malis artibus, ut pecunia vel adulatione; II. rationem implendi, quod jam licite suscepit, muneris, non desumat ex donis aut xen-

niolis, quæ ipsi promittuntur, vel tribuuntur, secus in *crimen repētundarum* incurret.

CCCVII.

Sed jam propria quædam officia strictim attingemus. I. Qui rebus ad religionem pertinentibus destinati sunt, vera de cultu summi Numinis dogmata exponant, conspicuum se populo vitæ exemplar præbeant, a negotiis profinis, tum maxime a fastu abhorreant & avaritia, nunquam vero aliter sentientes gladio persequendi intemperiiis se agitari patiantur. *L. 2. Cod. Th. de Episc. aud.*

CCCVIII.

Ministri vel Confiliarii, qui ab Imperantibus in partem regiminis suscepti sunt, tota mente rempublicam, ejus initia, progressus, jura & vires complectantur; non proprias, non suorum opes vel potentiam aut dignitatem spectent, sed salutem publicam; ab assentatione pariter ac insolentia & factionibus sint alieni, ea, quæ usui esse videntur, exponant modeste & sine partium studio, illudque curæ habeant,

ut

ut in deliberationibus adsint, ut loco dicant, ut modo. CICERO. III. de LL. 18.

CCCIX.

Militare imperium ii tantummodo suscipiant, qui prudentia, fortitudine, ingenii celeritate excellunt, his vero nihil erit antiquius castrorum disciplina. Militem diligenter & tempestive ad ministerium bellicum, & molestias perferendas habilem reddent, eum periculis absque necessitate non exponent, annonam, aut stipendia non intervertent, & probe intelligant, ducebis validiorem quam exercitu rempublicam esse. FLORUS III. 22.

CCCX.

Milites ipsi Sacramenti memores sint, hinc dicto audientes praefecto, suisque stipendiis contenti, paganos nec vexent, nec expilent, strenue exercitationibus vacent, corpus laboribus indurescant, nec vires frangant potu, aut libidinibus. Secum ipsis non dimicent, sed cum hoste, neque id temere, verum quum tempus necessitasque postulat, & mortem turpi fuga ducant esse potiore.

CCCXI.

Qui juris dicundi munere funguntur, de factis idonee probatis decernant, secundum leges; in adeundo se faciles præbeant, & patienter audiant utramque partem. Sed nec excandescere adversus eos, quos malos putant, nec precibus calamitosorum illacrymari, nec motum animi vultu detegere oportet. Caveant omnino ab affectibus & corruptelis, justitiam inopi æque ac potenti diligentissime administrent. lites vero diminuere conentur, non prote-lare. ECCLESIASTIC. VII. 6. L. 19. Dig. de Off. præf.

CCCXII.

Præfecti ærario exactas imprimis current inire rationes, ut impensas ex redditibus & futuris reipublicæ necessitatibus dimetiri possint; moderatione utantur & æqua lance, hinc lenissimum excogitent exactionum modum, importunam acerbitem atque incassum cadentes sumtus præcaveant, sciantque, optimum vectigal esse tempestivam parsimoniam. Denique in id invigilent, ut pro dignitate cui-

cuique tribuatur, & ne inferiores quæstiones pecuniam publicam in suos convertant usus, quod crimen *de residuis* dicitur. *Pu-
FEND. de O.H. & C. L. II: cap. ult. §. 6.
seqq.*

CCCXIII.

Qui negotia civitatis apud externos gerunt, iis summa cautio sit atque provisio, ut rempublicam, in qua versantur, noscant adcurate, de hominum ingeniis & moribus conjectandis laborent, iisque, quantum par est, sese adcommodent, inprimis commissa celent, a formula sibi præscripta non recedant, rumores quoslibet nec spernant, nec sectentur, studeant vero potissimum gloriam sui populi virtutibus tam intellectualibus, quam moralibus tueri.

CCCXIV.

Quibus civium animos scientiis & disciplinis informandi Sparta obtigit, indefessa se commendent diligentia, & morum honestate, doctrinas proponendas summa attentione examinent, earum fontes & causas investigent, ne secus in theses incidant inanes aut perniciosas, ea tradant, quæ

usum præstant humanæ vitæ, omniaque solidis rationibus muniant; generatim veritatem quærant, non jurgia vanamque ostentationem. WOLF. *J. N. T. VIII. §. 435. seqq.*

CCCXV.

Sed tamen certi inter hæc officia sunt limites, ut nec alter officialium in alterius munia involare, nec, quia omnes ab Imperantis arbitrio pendent, alter alteri suas vices committere queat, nisi id expresse vel tacite fuerit permissum. Quare nemo etiam ultra limites suos judicare poterit.

CCCXVI.

Inde nascuntur exceptiones fori incompetentis, vel ex *re*, vel *loco*, vel *persona*; atque pariter tot hodie usuvenientes jurisdictionum species, forum scilicet *ecclesiasticum*, *militare*, *maritimum*, *civile*, *criminale*, *academicum*, *mercatorium*, *salinarium*, *metallicum*, *cambiale*, *forestale*, *pupillare*: quæ ipsa porro certis reguntur legibus.

CCCXVII.

CCCXVII.

An judex secundum privatam suam scientiam judicare, utrumve sola probata & allegata sequi possit, difficilis est disputatio, quam nos brevibus axiomatibus expediemus. I. Nemo potest condemnari, nisi veritas criminis perspecta sit. Judex igitur neque in causa civili, neque criminali sententiam in eum pronunciare attentet, qui reus non est probatus.

CCCXVIII.

II. Si judici liceret ex privata scientia eum, qui probatus est debitor, absolvere in civili causa, turbaretur judiciorum ordo, via pateret fordibus in summum felicitatis externæ detrimentum. Ideo jus singuli suum universis renunciarunt, pollice-rique debuerunt, se potius damnum pati velle, quam evertere judiciorum fidem.

CCCXIX.

III. Sicut in illa specie judex secundum allegata & probata pronunciare tenetur, ita in causis criminalibus secus est. Etenim potestas reipublicæ nulla, licet eminens, ad vitam vel membra innocentis auferen-

da pertingit, judicis autem potestas ex jure reipublicæ accipit mensuram. Si itaque probatus nocens ad mortem, vel mutilationem esset damnandus, judex vero eum innocentem esse sciret, non quidem absolvere poterit: attamen debet potius munus suum deponere, aut extrema quævis pati, quam sanguine innocentis se polluere.

CCCXX.

Quoniam judices five ex malitia, five ex ignorantia legis aut facti erroneam dictare sententiam, ac lædere vel actorem, vel reum possunt, permittitur subditis hac ratione læsis sententiam a judicibus inferioribus latam examini judicum superiorum, vel ipsius Imperantis substernere, id est, *adpellare*, quod *jus adpellandi* subditis ex ipso nexu civili asseritur.

CCCXXI.

Adpellatio haud promiscue concedenda est, ne eadem subditi ad protrahendas lites abutantur, sed ratio *quantitatis*, de qua adpellatur, *personæ & modi* est habenda. Immo potest certis collegiis privilegium

gium *de non adpellando* tribui, quod tamen omnem supplicationem *protractæ* aut *dene-gatæ justitiæ* non excludit.

CCCXXII.

Ubi vero lis in supremo judicio jam decisa est, parti victæ de re, quæ fuerat litigiosa, non amplius disceptare, sed solummodo contra judicum vel fraudes & sordes, vel crassam ac manifestam ignorantiam provocare, & accusationem, quam vocant *syndicatus*, instituere licebit. Quod si in probatione deficiat, eo gravior erit hujusmodi temerarie litiganti dictanda poena, quo magis totius interest civitatis auctoritatem supremorum tribunalium, in quæ utique litigantes ipsi compromiserant, factam tectamque conservari, & esse aliquando litium finem.





CAPUT XI.

DE FORMA IMPERII ET QUIDEM
SIMPLICI.

CCCXXIII.

Imperii civilis naturam hactenus generatim contemplati sumus, varias nunc ejusdem species, seu formas examinabimus. Est autem forma civitatis determinatio subiecti seu personæ, cui *Majestas civilis inhereat*. Quæ determinatio, quando ex uno modo intelligitur, forma *simplex*, *pura*, *regularis*, quando non nisi ex pluribus modis cognosci potest, forma prodit *mixta*, *composita*, seu *irregularis*.

CCCXXIV.

Hinc ubi Imperans est unica persona vel singularis vel moralis, sicut in Monarchia, Aristocratia, & Democratia, ibi formæ sunt simplices; si autem duo vel tria simul ex dictis subiectis imperii civilis plenitudine utantur, forma dicetur *mixta*, seu *composita*; atque hæc determinata regiminis

nis civilis habendi formula & modus nomine *legis vel pacti fundamentalis* insignitur.

CCCXXV.

Quoniam status democraticus, seu regimen popolare tunc adest, quando civile imperium ad omnes cives collectim sumptos pertinet, facile patet: I. in Democratia, licet singuli cives particulam majestatis habere videantur, majestatem tamen in nullo singulatim reperiri, sed singulos potius subditorum jure censer. Quare criminis læsæ majestatis, uti & rebellionis rei possunt fieri.

CCCXXVI.

II. Regimen popolare, in quo socii omnes æquali jure utuntur sine prærogativa, magis ad Anarchiam, & statum naturalem accedit; in ceteris enim formis eadem naturalis æqualitas non ita perdurat. Porro cives in Democratia *liberos se republicanos* adpellant, quia communis semper deliberatio commune *suffragium & conclusum* requiruntur.

CCCXXVII.

CCCXXVII.

III. Populi conventus ad negotia publica ordinanda institutus *comitiorum* nomine venit. Quum itaque in statu democratico cives non singuli, sed uniti imperent, horum jure quilibet gaudet, atque jura majestatica ope præcipue comitiorum exercentur.

CCCXXVIII.

IV. Quum in iis proponenda & tractanda sint negotia civilia, singuli vero ad propositionem eorum ex metu perpetuæ confusionis admitti non possint; necesse est, ut locus, tempus, modus designetur, quo comitia fieri debeant, deinde, ut quibusdam vel in perpetuum, vel ad aliquod saltem tempus detur tam jus *convocandi* populum, quam spectantes ad usum jurium majestaticorum quæstiones *proponendi*. Qui autem sine facta sibi facultate quid cum populo ageret, ejus jura violaret.

CCCXXIX.

V. Nequit populus semper aut omni momento convenire, opus itaque est, ut
cer-

certis personis negotia quotidiana, con-
forumque executiones committantur. Quam-
vis verò officiales aut collegia pertractent
negotia civilia, quia tamen majestatis jura
ab his tantummodo exercentur nomine to-
tius populi, qui acta magistratuum irri-
tare, hosque ipsos punire potest, per se
patet, Democratiam tunc nihilominus ma-
nere.

CCCXXX.

VI. Species Democratiae multum va-
riare possunt, pro diversa suffragia ferendi
ratione, quae scilicet si pendent a numero
capitum, seu personarum, *virilia*, si a distri-
ctu territorii, *curiata*, si a quantitate bo-
norum seu mobilium, seu immobilium, *cen-
turiata*, si ab ætate, *seniora* nominantur.

CCCXXXI.

VII. Quum naturale sit, ut major suf-
fragiorum numerus prævaleat minori, in
Democratia major quoque civium pars im-
perium civile obtinet, atque inde nata co-
mitiorum *decreta* leges sunt, nisi alius in
iis placuerit concludendi modus, veluti si
duo-

duobus suffragiorum trientibus decifionem adligare lubeat.

CCCXXXII.

VIII. In regimine populari præcipue bonus ordo fervandus est, quod multitudo facillime perturbationem pariat. Ne igitur Democratia in *Ochlocratiam*, quæ est status, ubi omnia a multitudine tumultuarie aguntur, aut in paucorum dominatum, seu *Oligarchiam* degeneret, ejus status ratio exigit sollicitam æqualitatis custodiam, fugam ambitionis, amoremque patriæ excellentiorem; porro suffragia potius centuriata vel curiata, quam virilia; & duces aut judices minime perpetuos, ne imperium ad paucos transeat.

CCCXXXIII.

Si in plures transferatur imperium, nascitur *Aristocratia*, in qua majestatem minor quædam civium pars tenet, *Optimum*, *Procerum*, *Ordinum* aut *Primorum* nomine insignita. Atque hæc forma sequentibus continetur regulis. I. Optimum corpus est subjectum, in quo majestas

stas residet, singuli vero optimates subditorum conditione censentur.

CCCXXXIV.

II. Quare hi nihil possunt separatim constituere, sed collectim tantum, ut una persona moralis considerati, qualem in collegio & conventu gerunt, seu *senatu aristocratico*. III. Obligantur perfecte Optimates, ut de loco, tempore, modo habendi senatum inter se conveniant, atque jus convocandi, & quæstionem obvenientem proponendi uni cuidam largiantur.

CCCXXXV.

IV. In negotiis, quæ ad totius civitatis scopum pertinent, non autem in juribus singulorum procerum qua talium major numerus minori præferri debet. V. Senatus decreta sunt leges, quibus proin convenienter vivere singuli tenentur.

CCCXXXVI.

VI. Numerus & qualitates optimatum & quomodo hi constituentur, an ad tempus, sive ad dies vitæ, an ex certa familia, aut ex una urbe, an etiam ex provinciis, an soli prædiorum possessores legendi sint,

id in legibus fundamentalibus definiri oportet, secus ipse senatus arbitrabitur.

CCCXXXVII.

VII. Potest in collegio uni aut pluribus salva æqualitate concedi prærogativa; potest ergo etiam in Aristocratia unus tamquam primus inter pares constitui, modo caveatur, ne tunc Monarchia aut Oligarchia prodeat, & pauci optimates ceteros a regimine excludant.

CCCXXXVIII.

Quare VIII. & in hoc statu virtus, amor patriæ, & æqualitatis civilis enixe commendandus est. IX. Optimates totum populum referunt, senatus comitia repræsentat. Hinc Aristocratia & Democratia quibusdam communi reipublicæ nomine notantur. MONTESQUIEU *Esprit des loix* L. II. c. I. & 2.

CCCXXXIX.

Status ille, in quo duæ simul personæ civile gerunt imperium, *Dyarchia* dicitur; cujus duæ statuuntur species. Una scilicet, quando ambæ in *solidum* imperant; altera dum duæ solum imperant conjunctim

etiam vel communicato consilio, vel certam quisque civitatis partem regendo. Priorem referunt ad Monarchiam, posteriorem ad Aristocratiam. BOEHM. *Jus pub. un. P. spec. L. I. c. 3. §. 19. not. h.*

CCCXL.

Sed una utique ac indivisibilis est in una civitate majestas. Duobus igitur in solidum competere numquam potest, & Monarchia duorum datæ supra status monarchici definitioni repugnat. Quod si dividantur regiones, jam non una, sed duæ fient civitates monarchicæ. Hinc dicendum est, Dyarchiam, in qua mutuo duorum consensu res agitur publica, ad formam magis aristocraticam esse referendam.

CCCXLI.

Dicunt Aristocratiam esse collegium, ad hoc autem tres ad minimum requiri personas; ergo Dyarchiam ad illam referri non posse. Enimvero Aristocratia tunc existit, quando nec unus nec major civium pars imperat, quod ipsum in Dyarchia accidit. Atque ita poterit etiam Aristo-

cratia sine numero trium personarum , & vulgari collegii notione concipi.

CCCXLII.

Quum civitas, in qua civile imperium una singularis tenet persona, *monarchia* fit, seu *regnum*, evidens est, jura omnia majestatica atque officia Monarchæ vel Regi esse tribuenda, quæ supra generatim Imperantibus adseruimus. Itaque in monarchia simplici unum tantum potest, quantum potuissent universi in ipsa imperii origine. Quare Monarcha summitate, & plenitudine potestatis civilis, atque adeo imperio indiviso ac illimitato gaudet.

CCCXLIII.

Hinc ex regni natura specialia hæcce emergunt enunciata. I. Jura, quæ in Rege, qua talis est, reperiuntur, dicta sunt *regalia*, unde regalia Monarchæ sunt omnia jura majestatica. II. Regi subsunt omnes ac singuli subditi civitatis, ergo & personæ, quæ de illius sunt familia, quatenus ut cives considerari possunt.

CCCXLIV.

CCCXLIV.

III. Actiones regiæ ab actibus Regis fecernendæ sunt, in illis enim dumtaxat Rex imperio utitur publico, in his autem ut privatus spectatur. Attamen legibus a se latis ipse, quamquam civis sit, non subest, sed eatenus naturali fruitur libertate, nec alium nisi Deum legislatorem agnoscit. GROTI. II. c. IV. §. 12.

CCCXLV.

IV. Monarcha jura sua ad felicitatem populi externam dirigere tenetur; quare is cum *Despota* confundi non debet, quia hic non solum imperium in personas, sed dominium quoque in res & operas subditorum habet, & despotismus ex abusu monarchiæ fere oritur. V. Sed nec rem publicam gubernat, qui eandem alienat; itaque hæc alienatio in Imperantis potestate per se non comprehenditur.

CCCXLVI.

Atque hinc simul vulgatæ resolvuntur quæstiones, an princeps bona fisci vel ærarii alienare queat, an alienata ei revocare fas sit, an successor factam a suo ante-

cessore alienationem adprobare obligetur? Si enim alienatio medium est necessarium ad securitatem publicam, tum jus alienandi principi nequit denegari.

CCCXLVIII.

Ast si absque necessitate facta sit alienatio, ea non valet, & ideo bona a successore vindicari poterunt; qui tamen, si simul in privatum principis patrimonium succedat, eatenus tenebitur evictionem præstare. GROTI. II. c. XIV. §. 10. & 11.

CCCXLVIII.

Quum vero sæpe oriri queat disputatio, an hæc, quam requisivimus, adfuerit alienandi necessitas, tutissimum erit *ordinum vel statuum imperii*, id est, eorum, qui totum populum, ut subiectum & in classes distributum repræsentant, consensum adhibere; qui etiam semper necessarius tum esset, quando id pactis fundamentalibus fuisset conventum.

CCCXLIX.

Alia, & multo gravior est quæstio, an pars populi in summa saltem necessitate invita alienari possit? Quam quidem GRO-

TIUS

TIUS *) eo fundamento negat, quod qui in civitatem perpetuam coierunt, non ea voluntate se subjecerint, ut jus esset corpori partes & abscindere a se, & alii in ditionem dare.

*) *II. c. VI. §. 4. seqq.*

CCCL.

Contra affirmat Coccejus, *) quod in corpore quoque physico pars abscindi debeat, si totum aliter servari non valeat; quodque ab ipso GROTIUS admittatur parti, si evidenter se aliter servare non possit, aut non defendatur, jus esse a corpore recedere, itaque etiam corpori illi morali jus sit concedendum alienandæ partis, si ineluctabili necessitate prematur. Addit, innumera existare exempla, in quibus alienata quadam provincia pax redimi debuerit.

*) *Ad GROTIUM l. c.*

CCCLI.

Nobis ea quæstio distinctione dirimenda videtur. Scilicet universi tunc partem tueri non amplius obligantur, quando de-

fenſio eſt impoſſibilis. Itaque in eo rerum ſtatu partem projiciendo non tam alienant, quam potius deferunt, ſuoque in illam juri renunciant. Ex quo dein tamen haud ſequitur, partem eam victori parere cogi, ſi modo ſine gravi totius civitatis diſcrimine, propriis viribus libertatem ſuam conſervare valeat, cujus rei Siculi inſigne olim exemplum præſtiterunt. Cf. MURATORI *Annal. d' Ital. ad an. 1296.*

CCCLII.

Adparet inde, quo ſenſu ipſa monarchia in *patrimonialem* ſeu alienabilem, & *usufructuariam*, ſeu non alienabilem diſtribui poſſit. Quas denominationes quum GROTIUS *) prodidiſſet, non aliud voluit, quam id, dari aliquando imperia civilia, quæ cum facultate alienandi ſint connexa, ſi nimirum vel bello juſto occupata ſint, vel ipſe populus hoc juſ in Imperantem tranſtulerit. GENES. c. XLVIII. v. ult.

*) l. c. III. §. 12. & 15.

CCCLIII.

Nemo vero objiciat, cives in monarchia homines esse liberos, & hinc alienationis incapaces; nec enim ipsæ alienantur personæ, sed facultas eas moderandi, quare & libertatem suam contra victorem eos vindicare aliquando posse diximus. Ceterum quomodo regnum alienabile a despotico, seu *regno herili* differat, ex superioribus quoque colligitur.

CCCLIV.

Monarchæ jura ex titulo Regis, Imperatoris, Cæsaris dimetiri haud oportet. Sunt enim multi, qui sine his titulis imperium civile tenent, sicuti contra alii, qui regio decorantur titulo, veri monarchæ nequaquam haberi possunt, quemadmodum duo Spartæ Reges olim ab Ephoris tamen judicabantur. *) Est autem in Imperantis arbitrio, quibus titulis uti velit, ad quos recognoscendos an exteros quoque cogere possit, in jure gentium patefiet.

*) CORN. NEP. *Pausan. c. 3.*

CCCLV.

Nec summa potestas a coronatione, ab insignibus, præstatione *homagii*, qua voce externam subjectionis declarationem significant, aut ab aliis inaugurationum ritibus pendet. Nec ea inde minuitur, si Monarchæ comitia convocent, ut subditorum suorum consilia intelligant, vel facilius sua postulata iis declarent; aut si demum acta sua, nisi a cœtu quodam probentur, rata esse nolint, quum acta, quæ tunc rescinduntur, ipsius Regis imperio pro nullis habeantur. GROTI. *l. c. III. §. 18.*

CCCLVI.

Et quia aliud est de re quærere, aliud de modo eam habendi, Monarcha etiam temporarius ad certos annos, vel menses adstrictus, qualis *regnum æsymneticum* possidere dicitur, summum imperium tenet, uti ante Legem Valeriam romanus Dictator. Quod non æque de regno precario, quod omni momento a populo revocari potest, adserueris; hujusmodi enim Rex nil aliud est, quam nudus mandatarius populi. GROTI. *l. c. III. §. 11.*

CCCLVII.

CCCLVII.

Rurfus alia est de tutore Regis inspectio. Rex enim pupillus imperium habet, quem tutor instar mandatarii repræsentat, ita ut iste non habeat majestatem, sed exercitio solum alieni juris sibi commissi fungatur. Quapropter finita administratione ad reddendam eorum, quæ gessit, rationem compelli semper potest. A qua sententia licet GROTIUS *) & BOEHMERUS **) diffideant, id tamen inde venit, quod illi jus cum juris exercitio confundant, in quod, Rege impedito, sæpe supremum etiam consilium incumbit.

*) I. c. III. §. 11.

**) J. P. U. P. sp. L. I. c. 4 §. 14.

CCCLVIII.

Si Majestas ut summa dignitas considerata in civitate uni inhæret personæ, *personalis*, ubi vero pro ipso civili sumitur imperio, *Majestas realis* vocari solet. Hæc vi originis est penes universos, qui, si Monarchiam ordinant, etiam imperium civile seu Majestatem realem transferunt in Monarchiam,

cham, cui porro & majestas personalis simul obtingit. Quare Regi majestatem realem relicta altera illa denegare est absurdum, tunc enim præter Principis titulum civi uni tributum, vera democratia remaneret.

CCCLIX.

Inde liquet, eos, qui majestatem tribuunt populo, vocis populi fallaciam committere; nunc enim accipitur pro familiarum multitudine, quæ corpus æternum constituunt; nunc pro multitudine civium subditorum distincta ab Imperante, & omnes personas civili potestati parentes complectitur, quo ultimo sensu populo jam nihil majestatis inhæret.

CCCLX.

Itaque facile est, *Monarchomachorum*, qui docent, in monarchia summum imperium penes populum remanere, sententiam profligare. Patet quippe ex definitione Monarchæ, per eum intelligi personam singularem civili donatam imperio, quæ nullo modo ab alieno, ut illi volunt, dependeat arbitrio. Quare repugnat populo

pulo inferiorem eum facere, qui huic imperat, cunctaque populi jura solus complectitur.

CCCLXI.

Neque jam novus audiendus est Diogenes, *) qui putat, hominum multitudinem nobis se subjicientem imperio sana mente carere, adeoque nec pacisci posse. Enimvero, qui in navi sunt, prudenter uni navarcho parent, & integer exercitus ab uno Imperatore tutissime ducitur; infanus igitur is sit, qui patribus familias, dum turbas præcavent, & malum minus præferunt majori, rationem audeat abnegare.

*) J. ROUSSEAU *Contrat. social. Amstelod. 1762.*

CCCLXII.

Sed & unus vel plures homines imperio etiam herili sese submittere possunt, adeoque multo magis cives unius civile imperium eligere. Dein si homo ex læsione illata pœnæ & satisfactionis præstandæ titulo in jugum jure mittitur, cur non & populus justo bello in subjectionem veniet? Neque ratio adparet, cur in monar-

narchia Rex populo subesse debeat, postquam nec optimates in Aristocratia a reliquis civibus, nec in Democratia a confusa multitudine comitia dependent.

CCCLXIII.

Accedit, quod sicut in Democratia pars major minorem excludit, in qua insuper feminæ, homines juniores, alique multi ad deliberationes non vocantur, ita eodem modo in Monarchia multitudo excludatur. Denique si integer populus alium in subjectione habere populum potest, quin nudus ideo alterius subiecti populi sit mandatarius, quonam fundamento Monarchæ idem jus denegabitur? GROTI. *I. c. III. §. 8. seqq.*

CCCLXIV.

Nec obloquantur Monarchomachi, nullam exstare Monarchiam, quod constituens superior sit constituto; ex quo consequatur, populum, a quo Rex constituitur, esse superiorem Rege. Esset enim id verum, si populus in ipsa hac Regis constitutione se non simul eidem subjiceret, & æqualitati naturali renunciaret; quod
quum

quum faciat, non magis manebit superior, quam servus pactitius vel famulus mercenarius sunt domino superiores.

CCCLXV.

Urgent, imperium esse comparatum in populi favorem, itaque semper ad populum pertinere. Id autem sæpius exigebat ipsius populi favor, ut ab uno regeretur, qui vel optimatum vel multitudinis impotentiam & furorem coerceret. Sane & tutor constituitur pupilli causa, hunc tamen ideo illo superiorem esse nemo dixerit.

CCCLXVI.

Provocant nonnulli ad sacras literas, quæ doceant, punitum fuisse aliquando populum ob peccata Regum, quos ille in officio non contineret. Ast populo tum demum poena infligitur a summo Numine, si quocunque modo se male factorum reddat participem. Ceterum omnia mala physica poenæ dici haud possunt. II. REG. c. XIX. v. 11.

CCCLXVII.

Volunt etiam Regem ministrare populo, neque hunc præsumi tantam uni homini

mini concessisse potestatem. Verum, quod Rex jura sua administret, ideo populi minister non est; non enim alieno, sed proprio jure civitatem gubernat, nec alii nisi Deo soli rationem actuum suorum reddit. Unde etiam præsumtio de voluntate populi corrui, si hic semel Regem proprietalem constituit, quum veritas utique jam adsit.

CCCLXVIII.

Sunt autem multæ causæ, quæ populum ad eam subjectionem adigere poterant; quales sunt: summum discrimen a victoris potentia, nec penitus deleatur. Stupiditas aliquarum gentium, quæ se ipsas consilio proprio regere haud possunt; ut olim Cappadoces, Mysi, Getæ. Exemplum vicinorum populorum feliciter sub Regibus degentium, qua ratione Hæbræi allesti Regem postularunt. Metus belli civilis inter procures, quapropter & Augusto summa potestas delata est.

CCCLXIX.

CCCLXIX.

Quando Monarchomachos refellimus, non ideo a *Machiavellistis* minus abhorremus. Debet hæc secta suum nomen Machiavello Florentino, qui in libro italico, quem *Principem* inscripsit, id evincere conatus est, subditos a Principe lædi non posse, quod nullis jam gaudeant juribus, postquam ea omnia in Regem sunt translata. An serio id egerit, an vero principatum dumtaxat Florentinis voluerit reddere exosum, ab eruditis disceptatur. Hisce tamen vestigiis insistere plures & potissimum THOMAS HOBBSIUS.

CCCLXX.

Verum enimvero habent subjecti cives jura sua connata, dein jura socialia, ex pacto subjectionis adquisita, quo singuli universis, & universi singulis ad mutuam felicitatem promovendam se obstrinxerunt. Nec aliam Imperans ex simplici subjectionis pacto adquisivit potestatem, quam illam, quæ universis ad finem civitatis obtinendum necessaria erat, quare

M

fi

si sibi majorem adroget, lædi ab eo socios manifestum est.

CCCLXXI.

Et si autem cives aliquando ab Imperante lædantur, non tamen jus ei resistendi habent, siquidem resistentia utrique pacto unionis & subjectionis repugnaret, quorum vis est, ut singuli bono privato bonum teneantur præferre universorum, & ab omni violenta juris sui persecutione contra Imperantis voluntatem se cohibere. Alias reus quilibet sibi persuaderet, se pœnæ resistere posse. *Cf. I. REG. XXVI. 9. GROTI. I. c. IV. §. 4. seqq.*

CCCLXXII.

Poterit igitur læsus placidis quidem modis, litteris supplicibus, aut tandem fuga sibi consulere, nunquam vero privati sui commodi causa quietem publicam mediis violentis perturbare. Accedit, quod in dubio præsumtio pro Imperante militet, qui, etiam si forte contra jus subjecti faciat, errore magis & ignorantia invincibili, quam dolo fecisse videtur, læsionemque causa cognita tollere velle.

CCCLXXIII.

CCCLXXIII.

Magistratus quod attinet, quamquam hi sunt personæ publicæ, Imperantis tamen intuitu subiecti manent, atque privati. Hinc difficultates quidem iussa executioni dandi oculis Rectoris subicere possunt, non tamen resistere; quia tota, quam ipsi tenent, potestas a Monarchæ nutu dependet, qui porro resistendi facultatem tribuisse nequaquam præsumitur. *Cf. Gæot. I. c. IV. §. 6.*

CCCLXXIV.

Quemadmodum civitatis subiecti singuli, ita tota eorum multitudo Monarcha est inferior. Obedientia enim ab omnibus debetur non tantum bene, sed & male rempublicam gerenti. In translatione quippe imperii populus excipere haud potuit, se recte solum Imperanti parere velle, idem enim foret, ac obligationem ad nutum obligati dissolvendam, adeoque inanem celebrare.

CCCLXXV.

Imperantis itaque iudicio relinquitur, quid e re sit civitatis, & in eo se populus

imperium transferens adquiescere velle declarat. Quod si male regimini præest, fortunæ id adversæ, humanæ imbecillitati, difficillimo Rectoris civilis muneri tribui, ac patienter ferri debet. Quid! quod plebs sæpe mala putat, quæ sunt saluberrima? ut adeo infinitis turbis pateret porta, si quod multitudini displicet, præcipi jam non posset.

CCCLXXVI.

Sane in statu naturali bona nostra immo ipsa vita quovis momento latronum expnuntur injuriis. Satiùs itaque fuerit malo sub Rege vivere; a quo tamen ingens adhuc multitudo fervatur incolumis, neque incommoda imminent continua, sed meliorum interventu pensantur. *TACIT. Hist. IV. 74.*

CCCLXXVII.

In iis deinde negotiis, in quibus cives se Imperanti non subjecerunt, manet quidem libertas civilis, & eatenus statum æqualitatis patresfamilias tuentur. Quoniam vero officiorum violatio, quæ in regimine civitatis continentur, jus belli non tribuit,
ita

ita nec illa læsio, per quam Monarcha, in quædam populi jura involat ab initio reservata, huic bellandi licentiam dat, quod pacto id unionis civilis ac majori bono repugnaret.

CCCLXXVIII.

Patientia itaque utendum est non ex jure Imperantis, sed propter obligationem singulorum erga se invicem, quatenus focii sunt, pactoque unionis colligantur. Quid porro si Imperans negaret a se pacta conventa esse violata? quid sit jus eminens ex necessitate ortum ostenderet? cuinam tunc judicium esset relinquendum? Cf. БОЕХМ. *J. P. U. Lib. III. c. 2. §. 13.*

CCCLXXIX.

Inde autem non consequitur, pacta cum Imperante celebrata esse inutilia, si idem ad fidem servandam vi adigi non possit. Pacta enim Imperantem in conscientia obligant; cujus si præceptis non obtemperet, subjecti jam non gaudent cogendi jure, cui renunciarunt in ipso subjectionis pacto, sed ejus rationem reddet summo Numini. An porro fides violata sit, decidere nequeunt

cives, si id negaverit Imperans. PSALM.
L. v. 6. WOLF. *J. P. U. §. 1047.*

CCCLXXX.

Equidem obedientiam inferiores in eo præstare non possunt superiori, quod legi naturali, aut divinæ certo adversatur. At nec tunc resistere ipsis licet, sed mala ideo illata amore universorum patienter tolerare, aut fuga, aliave defensione innocua, avertere oportet.

CCCLXXXI.

Quare qui religionis vel illatæ injuriæ obtentu turbas foveat, aut arma capiunt, sunt rebelles, ac læsæ Majestatis rei. Hinc aliud est resistere, aliud non obedire; qui non adstringitur ad obedientiam, tamen ad patientiam obligatur. JEREM. XXIX. 7. GROTIUS. *I. c. 4. §. 7. n. 6. 9. seqq.* COCCÆJ. *ibid.* BOEHMER. *L. III. c. 2. §. 6. seqq.*

CCCLXXXII.

Atque hoc sensu *Jus Regis* esse dicitur in sacris litteris: *Agros vestros & vineas, & oliveta optima vobis tollere, & dare servis suis;* non enim Monarcha, qui hoc facit, in foro interno a peccato est immunis,
sed

sed jus eatenus habere declaratur in foro externo, quatenus subditis facultas resistendi denegatur. *I. REG. VIII. 11. seqq.*

CCCLXXXIII.

Regimen Imperantis, qui totius evertendæ civitatis propositum manifestat, est *tyrannis*, & qui exercet reipsa tyrannidem, *tyrannus exercitio* dicitur. Unde adparet, illum nondum esse tyrannum, qui vel imperio utitur illimitato, vel privatim cives lædit; vel demum qui civitati integræ ex culpa, ignorantia, ingeniive defectu, absque hostili animo infligit mala. Uti enim a civis vel partis minoris læsione ad civitatem universam non valet argumentum, ita nefarium hujusmodi propositum non nisi ex defectu voluntatis intelligitur. *DARIES. I. 7. U. 703.*

CCCLXXXIV.

Tali civitatis hosti ejusque everfori armis resistere populum posse, docent *BARCLAJUS*, *) *WOLFIUS* **), *ACHENWALIUS* ***), alique multi his potissimum argumentis; quod eo in casu majus malum sit pati, quam resistere, quodque voluntas

imperandi & perdendi simul confistere nequeant; hinc Rex tum Regis personam exuat, atque imperio civili renunciare videatur.

*) *Adversf. Monarch. L. III. c. 8. L. VI. c.*

^{23. 24.}
**) *J. N. T. VIII. §. 1060.*

***) *J. P. U. §. 204.*

CCCLXXXV.

Enimvero quinam reapse tyrannus existat, definire eo difficilius est, quo minus convenit subjectis iudicium de Imperante ferre; & quo proclivius solet multitudo, vel maiorem quamdam negligentiam perperam pro derelictione habere, vel etiam remedia violenta, sanandis reipublicæ morbis tantum idonea, in crudelibus lanienis numerare. Quid? quod huiusmodi impio obtentu optimi etiam Reges periverunt?

CCCLXXXVI.

Fac autem principem totius populi interitum revera moliri, haud tamen opus fuerit, arma in ipsius personam movere, fatis enim omnium prospicitur securitati, si nemo eidem suppeditet vires, & singuli obe-

obedientiam in re illicita ac turpi abjiciant. Quod si extraneis resistatur hostibus, nulla jam fit injuria Majestati.

CCCLXXXVII.

Denique Monarcha, qui propriam delere cupit civitatem, sanæ mentis non est; illud itaque adhuc præsto est remedium lenius, ut securo loco includi ac custodiri possit, neque enim odium mereretur sed potius commiserationem. Ex quibus omnibus patet, subjectis tam singulis, quam universis jus armorum in personam Regis semper esse denegandum. *Cf. GROT. L. I. c. IV. §. 7. & 11. BOEHM. l. c. L. III. c. IV. §. 34.*

CCCLXXXVIII.

Nec cuiquam faceſſat negotium exemplum Machabæorum, qui arma contra Antiochum legitimū Regem arripuerunt religionis cauſſa, illi enim a Deo, cujus in Reges ſummum jus eſt, mandatum ſpeciale acceperunt, ſecus a crimine rebellionis non poſſent excuſari. Etiam Iſraelitæ vaſa abſtulerunt Ægyptiorum, & Samſon ſibi interitum paravit, inde vero

haud consequitur, licitum esse furtum vel autochiriam. MACHAB. I. c. III. GROTI. L. I. c. IV. §. VI. n. 3. & §. VII. n. 5. cf. *Essai sur le gouvernement civil.* c. XVIII.

CCCLXXXIX.

Ceterum quando subjectis armatam negamus resistantiam adversus Principem, de eo nobis Principe est sermo, qui pollet civili imperio. Si enim nudo utatur Regis titulo; si imperium civile in alterum transtulit, abdicavit, dereliquit; si regnum ad tempus teneat, vel sub conditione, tempus autem sit lapsum, & conditio defecerit, jam desit Majestas, quam unice negamus posse a subjectis jure violari. Cf. GROTI. L. I. c. IV. §. 8. 9. 10. 12. & 14. WOLF. P. VIII. §. N. §. 1047, & 1054.



C A P U T XII.

DE FORMA IMPERII MIXTA.

CCCXC.

Majestas plura continet jura , quorum complexus, ut unum totum ex variis partibus compositum considerari potest. Hæc jura majestatica *partes* imperii civilis *potentiales* adpellantur. Imperium deinde hoc, si nulla sui potentiali parte diminutum est, *plenum*, contra si aliqua tali caret parte, *minus plenum* vocatur. ГЛОТ. I. c. III. §. 16. 17.

CCCXCI.

Porro uti imperium generatim, ita & civile imperium aliud *absolutum* est, si solum ex fine & natura civitatis determinetur, aliud vero *limitatum*, cui nimirum pactis adventitiis inter Imperantes & subditos initis certus modus est positus, quo juris competentis exercitium restringatur.

CCCXCII.

CCCXCII.

Quum promittens non plus in acceptantem transferat, quam se transferre velle declaravit, Imperans civilis majorem haud acquirit potestatem, quam ei per pactum subjectionis a populo tributa est. Quare absurdum foret de limitis pactitii possibilitate, quatenus ab eo jus rempublicam gubernandi coarctatur, dubitare.

CCCXCIII.

Itaque penes populum vi suæ originis imperium semper est plenum, atque absolutum, a quo si in alium transferatur, iterum vel plenum erit ac absolutum, vel tantum *limitatum*, aut *minus plenum*: immo nec repugnat, imperium esse *absolutum* & *tamen minus plenum*, aut denique *plenum*, nec eo minus *limitatum*. WOLF. J. N. T. VIII. §. 95. seqq.

CCCXCIV.

Sume civitatem, in qua Princeps jure belli & pacis solus nullaque adjecta conditione utatur; leges autem prævio tantum populi vel optimatum consensu ferre possit, tributa denique indicere, vel ab optima-

matum, vel a populi arbitrio unice pendeat; & imperium habebis partim absolutum, partim limitatum, partim quoque minus plenum.

CCCXCV.

Quod si singula quidem potestatis legislatoriae, inspectoriae & executoriae jura vel uni, vel pluribus a populo concedantur, ea lege tamen, ut nonnisi juxta certam formulam vel omnia, vel quaedam exerceri possint, & jam imperium quidem plenum prodibit, sed tamen limitatum. Sed etiam Democratia concipi potest limitata, si quorundam jurium usus ad civis unius aut plurium consensum restringatur, vel sit cautum, ut vota non sint virilia sed aut curiata, aut centuriata, nec majora concludant, verum unanimia, aut duo trientes.

CCCXCVI.

Objicit HOBBIUS, *) eum, qui summum imperium retinet, a remediis ad hujus finem adsequendum necessariis non decedere, adeoque Imperantem, dum talis manet, satis ostendere, non obstante pacto-

etorum limite jura imperii pro re nata libere se velle exercere. Enimvero Rex, qui limitatum dumtaxat accepit imperium, nequit absoluto uti, neque ad remedia expresso pacto denegata recurrere; an igitur civium intersit a jure per pactum quaesito aliquid relaxari, id ipsi tantum judicabunt.

*) *De Civ. VII. 17.*

CCCXCVII.

Quoniam forma reipublicæ, in qua jura Majestatis partim ab uno, partim a pluribus, partim a toto populo, aut saltem non nisi duobus modis plene obtinentur, est mixta, patet, talem imperii mixturam non ex jurium majestaticorum limitatione, sed ex partium potentialium divisione oriri, sicuti populo ab initio placuerit. Unde palam fit, multas posse reipublicæ mixtæ formas existere, non nisi ex legibus fundamentalibus intelligendas. Cf. MONTESQU. *Esprit des loix* L. IX. c. 1. seqq.

CCCXCVIII.

CCCXCVIII.

Data republica mixta plures existunt personæ saltem morales, quarum quælibet certam imperii partem vel communem, vel propriam tenet, cujus nomine ab alterius hominis arbitrio non pendet. In tali igitur civitate ii, quos inter commune divisum est imperium, eodem pleno, atque absoluto non nisi conjunctim utuntur.

CCCXCIX.

Prout vero in potestatum civilium mixtura vel unius, vel optimatum, vel populi regimen magis eminet, ita respublica jam Monarchia, jam Aristocratia, jam Democratia mixta nominatur, quæ tamen cum Monarchia, Aristocratia, vel Democratia simplici ac pura, vel tantum limitata confundi non debent.

CCCC.

Igitur illa præmittitur denominatio, ad quam magis hæc forma accedit, quæque prævalere videtur. Quodsi nulla prævaleat, voce *æqualitatis* addita id designatur. Habemus autem has XVI. denominationes: *)

I. Mo-

- I. Monarchico-aristocratica.
- II. Aristocratico-monarchica.
- III. Monarchica & aristocratica æqualis.
- IV. Monarchico-democratica.
- V. Democratico-monarchica.
- VI Monarchica & democratica æqualis.
- VII. Aristocratico-democratica.
- VIII. Democratico-aristocratica.
- IX. Aristocratica & democratica æqualis.
- X. Monarchico - aristocratico - democratica.
- XI. Monarchico - democratico - aristocratica.
- XII. Aristocratico - monarchico - democratica.
- XIII. Aristocratico - democratico - monarchica.
- XIV. Democratico - monarchico - aristocratica.
- XV. Democratico - aristocratico-monarchica.
- XVI. Monarchica aristocratica & democratica æqualis.

*) GUNER. *Com. ad DARIUS*. §. 767.

CCCCI.

Imperantem, qui in republica mixta jus exercet majestaticum sibi non concessum, nihil agere ex facultatis defectu, satis inter omnes convenit; si vero imperium sit solummodo limitatum, actus contra leges fundamentales celebratus injustus quidem GROTIUS *) videtur, sed non invalidus. Enimvero facultas moralis ad id, quod injustum est, semper deest, nec quisquam ex injuria alteri facta jus consequi potest, igitur verius est, in utraque specie actum omni robore destitui.

*) *L. c. III. §. XVI. n. 2.*

CCCCII.

Sunt, quibus reipublicæ mixtæ adpellatio valde exosa est. Concedunt ii quidem jurium exercitium restringi & communicari posse, sed illam formam limitatam adpellare malunt, quam mixtam *). At supra ostensum est, partes potentiales jam dividi, jam restringi posse; si igitur pactorum fundamentalium obligationem admittere co-

guntur, in aperto est, eos de verbis potius quam de rebus disceptare.

*) HEINECC. *ad Grot. I. III. §. 17.* HUBER. *de jur. civ. L. I. c. 28.*

CCCCIII.

Verum ajunt, totum quoddam ex partibus invicem pugnantibus coalescere non posse, ex quo inferunt, formam mixtam non dari, quum monarchiæ definitio Aristocratiam excludat, & vicissim hæc illam. Nos autem non dicimus formam mixtam dari ullam, quæ ex integris simplicibus componatur, sed eam mixtam vocamus, quæ ex illis tribus aut binis aliquid participat.

CCCCIV.

Neque illud obest, quod majestas una sit, & uti supra demonstratum est, individua. Est enim una respectu totius populi, & societatis civilis, & eatenus una semper manet, omnibusque aliis ex unitate resultantibus notis insignitur, quod tamen haud prohibet, ut per partes potentiales inter ipsos cives dividatur.

CCCCV.

CCCCV.

Id mirum est, quod jura majestatica omnia invicem necessario connexa esse, atque adeo alterum ab altero attrahi dicant, nec ullam propterea per partes potentiales divisionem posse concipi. *) Is enim nexus in origine ratione totius populi est necessarius, aut dein imperium veluti dominium, vel penitus, vel confectario quodam excluso, poterit in alterum transferri. Quod si negatur, jam nec amplius imperium quoad exercitium limitari valebit.

*) HOBBS. *de civ. c. VII. §. 4.*

CCCCVI.

Nec etiam ex ea divisione Aristocratia inducitur, quia optimates æquale faciunt collegium, in forma mixta vero plures simul Imperantes pro parte quisque sua deprehenduntur. Demum etsi unio civilis per eam formam facilius turbetur, *nihil tamen in civilibus est*, notante GROTIUS, *) *quod omni ex parte incommodis careat, & jus non ex eo, quod optimum huic aut illi vi-*

detur, sed ex voluntate ejus, unde jus oritur, metiendum est.

*) *L. I. c. III. §. 17. n. 2.*

CCCCVII.

Ratio, ob quam plura inter se connexa sunt, eorum efficit unitatem; itaque & plures civitates unum fieri possunt, si communi cuidam Imperanti subjiciantur. Atque hæc unio vocatur *incorporativa*, si altera civitas veluti pars & accessorium cum altera tanquam toto & principali coalescat, qualis unio olim inter Romanos & Latinos, tum etiam Albanos obtinuit; alia *non incorporativa* est, quum sua quævis jura, suamque formam retinet. GROTI. II. c. IX. §. 2.

CCCCVIII.

Si plures civitates conjungantur absque communi imperio in eum finem, ut perpetuo unitis viribus communia amoliantur pericula, nascitur exinde *civitatum systema*, seu corpus Rerumpublicarum foederatarum, quali olim duodecim urbes Archai-
cæ,

cæ, hodie provinciæ tam Helveticæ quam Hollandicæ continentur.

CCCCIX.

Ex hac systematis civitatum definitione sequentes ducuntur conclusiones. I. Principia supra de patribusfamilias in anarchico statu suppeditata, nunc ad fœderatas respublicas adcommodari debent. II. Systema civitatum civitas haud est, communi deficiente imperio, qua de caussa ab unitis etiam regnis differt. III. Negotia communia per legatos in senatu conjunctos tractari necesse est.

CCCCX.

IV. Quælibet civitas fœderata suam pristinam retinet formam suaque jura majestatica, sed eo ipso, quando ab hoste impetitur, ab omnibus exigere potest, ut se unitis defendant viribus, ne secus systema dissolvatur. V. Quod systema, quum sit societas composita, salus civitatis unius simplicis tanquam subordinatæ præferri non potest. VI. Fœderatio hæc oritur ex pactis, quæ tamdiu sancte servan-

da erunt, quamdiu pars altera facit, quod conventum fuit.

CCCCXI.

Quænam porro ex civitatum formis præstantior sit, vana fere est disceptatio. Etenim ingenium ac populi indoles, clima, natura loci, ac situs variam persæpe ordinationem reipublicæ exigit. Quare boni civis est contentum degere humana, qua parte locatus est in re; formam, in qua vivit, tueri, ac personam, quæ ipsi a divina providentia obtigit, fortiter sustinere. Quamcumque enim eligas formam, sua eam commoda, sua incommoda sequentur.

CCCCXII.

Atque Democratix quidem commoda sunt libertas, & securitas ab oneribus superfluis; at tarda semper sunt consilia, facile insuper propalata, immo & sæpe temeraria; tum, si adsint demagogi vel tribuni plebis, seditiones frequentiores, virtutis denique excellentioris odium, quod Atheniensibus receptus docet Ostracismus.

CCCCXIII.

CCCCXIII.

Fulget Aristocratia consiliorum maturitate, quum plus videant oculi, quam oculus, molliore Imperio civiumque opulentia. Plurima vero sunt ejus incommoda: factiones perpetuæ, consiliorum lentitudo, plebis licet virtute & meritis ornatæ exclusio ab omni honore, magnitudo sumtum ad alendos plures regulos.

CCCCXIV.

Magis denique perditur libertas in Monarchia, perpetuæ conspiciuntur mutationes, resque plena periculi est sub malo & rerum alienarum cupido degere Principem. At præstat omnibus hæc forma, quod remedia ad securitatem externam necessaria in promptu sint, consilia magis occultentur, celeris observetur exsecutio, atque virtuti & meritis facilior via pateat, elegantior insuper in ea vivendi obtineat ratio.

CCCCXV.

Itaque ea est humanarum rerum conditio, ut etsi POLYBIO visum fuerit, *eam rempublicam censeri debere optimam, quæ ex*

*omnibus istis formis sit composita *)*, tamen probe monuerit TACITUS *delectam ex his & constitutam reipublicæ formam laudari facilius quam evenire, vel si evenit, haud diuturnam esse posse ***). Quare si hæc invicem conferantur omnia, perspicuum fiet, inter has formas, si cetera paria sint, facile Monarchiam eminere.

*) *Hist. I. p. 628. CICERO Rep. L. II.*

**) *Annal. IV. c. 33.*

CAPUT XIII.

DE MODIS ADQUIRENDI IMPERIUM CIVILE.

CCCCXVI.

Quemadmodum imperium in genere, ita & imperium civile modis solum derivativis, consensu scilicet vel lege, obtineri potest. Etsi igitur institutio civitatis generatim a naturæ legibus ducatur; quum tamen eadem a pacto subjectionis speciatim pendeat, in propatulo est: Patribusfamilias,
utrum

utrum novam hanc inirent societatem, an vero in veteri statu manerent, consultandi, & porro, quod maxime bonum videbatur, eligendi potestatem fuisse.

CCCCXVII.

Nulla igitur esse potest dubitatio, quin imperii publici tam democratici, quam aristocratici, ut & monarchici origo recte omnino ab hujusmodi expresse vel tacito electionis actu repetatur, quem tamen in posterioribus duabus imperandi formis optimatum Regisve acceptatio consequi debuit.

CCCCXVIII.

Non equidem inficiamur, imperium semel constitutum in alios ex præscripto legis sæpiissime transferri, aut etiam novam aliquando regiminis formam introduci per vim. At præterquam quod leges præcedentium pactorum fundamento nitantur, de ipsa nobis hic sermo est iusti imperii origine; quam etsi nonnulli a violentia repetant, attamen unio voluntatum supervenire debuit; nec enim sine consensu vel

ultroneo , vel secundum quid coactio societatis civilis cogitari potest.

CCCCXIX.

Civitas , in qua persona singularis Imperantis eo fine eligitur , ut illa deficiente per novam electionem alia pro arbitrio substituatur , dicitur *electiva* , quod si citra omnem electionem in defuncti locum subrogetur , *successiva* nominatur. Ubi demum successor haud pro arbitrio , sed ex certa dumtaxat familia , eligi potest , successio obtinet *mixta*.

CCCCXX.

Ut a prima ordiamur , civitatis electivæ naturam hisce explicamus. I. Jus imperii naturaliter solius electi personæ inhæret , quare deficiente illa imperium redit ad populum , cui vel alium eligere , vel veterem etiam immutare formam licebit. II. Effectum non fortitur electio , nisi acceptetur , unde electum inter & eligentes pactum concipitur. III. Nec minus electioni , quam aliis pactis conditiones certæ adjici possunt , ex quibus leges fundamentales prodeunt , quæ speciatim etiam

capitulationis nomine veniunt, & omnino servandæ sunt.

CCCCXXI.

IV. Potest vero populus jus, quod habet eligendi, in certas personas transferre, quæ deinde per excellentiam *electores* nuncupantur; immo electionis requisita intuitu personæ, loci, modi, ac temporis definire, eo fine, ut non nisi his observatis electio fiat *legitima*. Electionem igitur illegitimam populus agnoscere non tenetur. Ceterum solo jure eligendi, jus capitulationem faciendi non comprehenditur, donec id speciatim probetur.

CCCCXXII.

V. Electores qua tales constituunt collegium. Hinc naturale est, ut per plura seu *majora* Imperantem designent suffragia, quæ quidem omnium eligentium respectu, non eorum dumtaxat, qui eliguntur, numerari, seu majora esse debent; nisi populo aliud placuerit.

CCCCXXIII.

VI. Novæ electionis exercitium naturaliter a potestate imperantis Monarchæ
non

non dependet. Quare is nec successorem populo obtrudere, nec futuri alterius Imperantis electionem impedire potest; cui tamen, si vivente adhuc Monarcha eligatur, hujus se regimini immiscere eo invito non licet.

CCCCXXIV.

VII. Monarchia non modo, sed & Aristocratia potest electiva esse. At Democratia, si semel stabilita sit, perpetuo successiva manet, quatenus leges fundamentales aut civium familiis, aut honorum possessoribus jus comitiorum attribuunt.

CCCCXXV.

Quum successiva imperii adquisitio certæ cujusdam legis præscriptum præstruat, lex hæc vel libera erit, antecessoris dispositio, in quem imperium cum jure alienandi translatum fuerat, vel ipsa populi consensus, qua vel ad familiam primi adquirentis, vel ad certum aliud personarum genus jus in imperium succedendi, pactimore, derivatum est.

CCCCXXVI.

CCCCXXVI.

Succeſſionem, quæ priori modo obtinetur, *patrimonialem*, ſeu ſpeciatim hereditariam, quæ poſteriori obtingit modo, *non patrimonialem* nuncupamus. Hæc item vel erit *familiaris*, ſeu hereditaria jure familiæ, vel *non familiaris*, & ſimpliciter legitima, ſi lege cautum ſit, ut alia ſuccedendi ratio habeatur, veluti ſi ſenior civis, vel ſenioris filius ſint vocati.

CCCCXXVII.

Jam vero de adquiſitione imperii ſucceſſiva hæ tenendæ ſunt regulæ. I. Quia in perſona Regis eligenda id ſolum agitur, ut ejus induſtria, fortitudo, prudentia, aliæque individuae ſpectentur qualitates, ut adeo ei ſoli jus populum regendi inhæreat, ideo omnis civitas præſumitur electiva, atque tum demum, quando factum populi modum ſuccedendi definientis acceſſit, ſit ſucceſſiva. BOEHM. P. *ſp.* I. l. c. III. §. 32. *Diſſentit* HOBBS c. VII. §. 15. *ſeqq.*

CCCCXXVIII.

CCCCXXVIII.

II. Civitas successiva non ideo statim patrimonialis est, sed in regula familiaris esse præsumitur; quum utique Imperium & facultas alienandi quam maxime a se invicem disjungantur. Et quoniam non plus translatum censetur, quam quod pacto fuit comprehensum, etsi imperium familiæ generatim concedatur, modo succedendi non definito, civitas poterit adhuc esse *successiva mixta*.

CCCCXXIX.

Si regnum patrimoniale esse constat, illud insuper bifariam est considerandum, aliud enim patrimoniale dicitur perfecte tale, aliud imperfecte tale. Prius est, quum Imperans territoria cum imperio simul dividere potest, scilicet in partes subjectivas tribuere, & ipsam gubernandi formam immutare. Posterius si tantum jus transferendi imperium pro lubitu ad Regem pertineat. WOLF. *J. N. T. VIII. §. 223. & §. 292. cf. SALLUST Bell. Jug. c. 5. 9. & 19.*

CCCCXXX.

CCCCXXX.

Facultas dividendi regnum in partes subjectivas, cum pacto unionis civilis tum primario civitatis scopo, scilicet securitati, quam maxime adversatur; quare etsi quis a populi voluntate Regnum obtineat patrimoniale, attamen perfecte tale illud esse non præsumitur, & porro quælibet civitas natura sua individua est.

CCCCXXXI.

Equidem si regnum patrimoniale ex jure belli descendat, illud perfecte tale simul esse videri posset, quod jus belli ad jura indefinita referatur. At vero uti hominem captivum, qua talem, occidere non licet, ita nec victori civitatem bello subjectam licebit in partes secare; nisi nulla alia ratio finem justo bello intentum obtinendi sit reliqua. *Cf. KEUFFEL. ad. GROT. L. II. c. VII. §. 88. not. l.*

CCCCXXXII.

Etsi vero regnum sit patrimoniale imperfecte tale, poterit tamen Imperans illud, in quem voluerit, per testamentum transferre, ut adeo ei vocare liceat filium

§2.

secundo genitum præ primo genito ; aut filium mere *naturalem* præ legitimo ; dummodo vocetur persona rationis compos, non vero dementia vel furore affecta.

CCCCXXXIII.

Fas quoque erit, filium adoptivum heredem regni facere, dein extraneum, immo feminam instituere, familia exclusa. Sed si testamentum a majoribus jam factum sit, successor, qui ex dispositione antecessoris imperium capit, fideicommisso ligabitur, & successio, quæ antea fuerat patrimonialis, in successionem *non patrimonialem* convertitur. Cf. MURATORI *Annal. d'Ital. ad Ann. 1700.*

CCCCXXXIV.

Rege autem intestato decedente voluntas defuncti ex conjecturis verosimilibus erui debet. Nequit autem præsumi, defunctum regni sui divisionem voluisse, sed contra potius indivisum uni deferri ; qua in re iterum interest, an regnum patrimoniale solo belli jure, an ultronea populi voluntate fuerit acquisitum.

CCCCXXXV.

CCCCXXXV.

Successio enim in regno patrimoniali armis obtento, si quævis alia deficiat iusta dispositio, ex ordine naturali alibi exposito simpliciter est deferenda; ita tamen, ut ordo ille naturalis per regni notionem magis determinetur; quare si cetera omnia sint paria, mas feminam excludet. Ille enim ad arma & judicia plerumque aptior est, hæc vero imperium ad extraneos transferret.

CCCCXXXVI.

Ex eadem causa persona vel linea primogeniti secundogenitum, hinc nepos ex primo patrum jure repræsentationis præcedet; nam quum regnum dividi nequeat, ac primum natus jus prius adquisiverit, id mox ad descendentes suos transmittit.

CCCCXXXVII.

Si vero regnum patrimoniale populus propria voluntate concefferit, non prius ordo succedendi naturalis habebit locum, quam si deficiat hypotheticus; quorsum pertinet & mos succedendi eo tempore, in regno receptus, quo imperium primo Re-

gi fuerat delatum. Eo enim respexisse conjicitur populus, successionem patrimonialem admittens. Atque hæc succedendi ratio duraret, etsi postea inter privatos diversa successionis norma ab intestato esset introducta. GROTI. II. c. 7. §. 20.

CCCCXXXVIII.

Contentione inter filium nothum & adoptivum orta ille in successionem intestata non respicitur, quia naturaliter sequitur conditionem matris; cui consequens est, ut adoptivus tunc omnino præferatur. GROTI. II. c. 7. §. 12. 13. 20. 30.

CCCCXXXIX.

Jus successoris in regno patrimoniali totum a voluntate antecessoris, five expressa, five præsumpta derivatur; illum igitur populus excludere, aut novæ regiminis formulæ adligare non potest. Quod si Princeps regni patrimonialis decedit, nulla prius dispositione facta, & familia penitus extincta est, tunc primum populus ad primævam redit libertatem. Cf. ACHENWAL. *Jus pub.* §. 170.

CCCCXL.

CCCCXL.

Æs alienum in regno patrimoniali sine necessitate ab antecessore contractum quod attinet, solvendum erit a successore, si regnum in partes subjectivas dividi & pars alienari possit. At si regnum manere debeat indivisum, ab hujusmodi debitis solvendis, spectata sola justitia, est immunis.

CCCCXLI.

In civitate successiva non patrimoniali successio ex pacto & providentia populi determinatur. Igitur necesse est pactorum habere rationem, ex quibus principia fluunt, unde persona ad successionem vocanda cognoscatur.

CCCCXLII.

Hinc tot succedendi modi sunt possibiles, quot concipi pacta queunt, eaque successio erit legitima, quam consensus populi per legem fundamentalem invexerit. Narrant Cathramotitas eum nobilioris sanguinis filium ad successionem vocasse, qui a suscepto ultimi Regis imperio primus fuisset prognatus.

CCCCXLIII.

Si porro adfit certa, ex qua successor sumi debet, familia, hæc vocatur *stirps regnatrice*. Quum vero plures sæpe sint ex stirpe regnatrice, quia dividi imperium nequit, ordinem succedendi inter eos lege definire oportet; unde is, quem præscriptus ordo attingit, successor erit legitimus.

CCCCXLIV.

Quare posteriores Imperantes jus suum non ab eo, cui immediate succedunt, sed solummodo per antecessores, ex pacto & providentia majorum, id est, populi & primi acquirentis nanciscuntur. Quare hi debita antecessorum, necessitate publica haud exigente, facta solvere nullo modo obligantur. GROTI. l. c. §. 19.

CCCCXLV.

Successio deinde familiaris est duplex, *gradualis*, & *linealis*. Prior est, in qua non attendita lineæ ratione proximitas dumtaxat spectatur gradus ipsius personæ succedentis respectu ad ultimum possessorem, vel ad primum acquirentem habito; prout nimirum

rum legibus fundamentalibus fuerit definitum. GROT. II. VII. 24.

CCCCXLVI.

Posterior ex lineæ prærogativa pendet, ita ut regnum continuo ab uno ad alterum devolvatur in linea recta, deficiente autem in ea successore, fiat transitus ad lineam ceteris propiorem, ut adeo in ea successione mortui habeantur pro vivis, & jus succedendi a vivis in mortuos, a mortuis in vivos semper transferatur. GROT. I. c. §. 22. KRUFFEL. Exerc. ad GROT. §. 96.

CCCCXLVII.

Linealis porro dividitur in *cognaticam*, *agnaticam* & *mixtam*. In prima primogenitus quidem secundogenitum, & mas ejusdem lineæ feminas omnes indistincte excludit, at masculis deficientibus feminæ in subsidium vocantur, quæ etiam secundæ lineæ maribus præferuntur.

CCCCXLVIII.

In agnatica feminæ & ex iis nati, etiam si mares, perpetuo sunt exclusi. In mixta etiam feminæ sed non nisi post omnes qua-

rumvis linearum mares admittuntur. Quæ tres modo expositæ successiones *Castellana*, *Salica* & *Narbonensis* seu *Austriaca* compellari solent.

CCCCXLIX.

Jam nunc pronum est intelligere varias de successione lineali conclusiones, quæ ex datis principiis derivantur. I. Successio familiaris intra eos stat, qui a primo Rege acquirente descendunt, nullus ergo esse potest filiis adoptivis locus: sed nec ad adscendentes vel collaterales pertinet successio, nisi id expresse fuerit actum. GROT. l. c. §. 15. & 16.

CCCCL.

II. Liberi naturales tantum, & qui non sunt secundum patriæ leges nati, successione incapaces existunt, nec enim ex familia dicuntur esse ii, quorum sanguinis nulla civilis adest certitudo. III. In successione pure lineali nepos ex primogenito præmortuo excludit patrum secundo-genitum; habetur enim, ac si successio mortuo delata ab eo ad nepotem transisset. GROT. l. c. §. 16. & 30.

CCCCLI.

CCCCLI.

IV. Idem obtinet, si nepos tantum adfit ex secundogenito, quia tunc tertio-genito non esset locus. V. Primogenito non obest eum ante regni adoptionem fuisse natum, nihilo enim secius in regia fortuna suscepto potior habetur, quia reapse primogenitus ejus familiæ est, cui toti populus regnum detulit. Exceptio foret, si populo in prima delatione aliud expresse placuisset. GROTIUS. *l. c. §. 28. 29. & 31.*

CCCCLII.

VI. In successione lineali mixta seu narbonensi frater defuncti vel ex fratre nepos præfertur filiæ, aut nepoti ex filia etiam natu majori; sed in cognaticæ filia & patrum & consobrinum excludit. VII. Non tamen filius sororis filiæ fratris præoptari debet, hæc enim jure paterno utitur, illa materno, & delato jam ad feminas regno in ea permanet linea, donec exstinguatur; nisi lege fundamentalis aliud provisum. Cf. GROTIUS. *l. c. §. 32. 33. 34. 36. 37.*

CCCCLIII.

VIII. Quare in hac successione filia ultimi possessoris filias omnes antecessoris præcedit & illarum liberos, nec enim a linea ad lineam fit transitus, nisi sublata penitus linea regnatrice, aut deficientibus personis ad successionem idoneis.

CCCCLIV.

Non obstat in lineali hac successione respici ad primum magis acquirentem, quam ad ultimum possessorem. Nam primus acquirens ideo attenditur, ut constet de eo, an quis inde descendat, quod si confectum sit, respicitur simul etiam linea ultimi possessoris.

CCCCLV.

IX. Sicuti nepos ex primogenito præcedit patrum secundogenitum, ita filia ex primogenito præmortuo amita seu filia ultimi Regis potior esse debet, mortui quippe in transmittenda successione pro vivis habentur, nisi rursus leges fundamentales contrarium præscribant.

CCCCLVI.

CCCCLVI.

X. Ab una linea ad aliam non fit transitus, si in illa etiam personæ ad successionem vocatæ reperiuntur. Itaque si duæ essent filiæ ultimi possessoris, & soror prima feminam pareret, secunda marem, femina, utpote regni capax, & in linea regnatrice constituta, marem lineæ remotioris excluderet.

CCCCLVII.

Fac lege fundamentali marem præferri; fac simul ex mortua sorore primogenita filiam esse superstitem, & sororem secundogenitam liberis adhucdum carere. Tum profecto filia primogenita ad regnum vocabitur, quæ possessione non cadet, si forte deinceps soror secundogenita marem pariat. *Cf. MOSER. de success. in Regn. Boh.*

CCCCLVIII.

Quæ hætenus de successione in regno dicta sunt, facile ad successionem in aristocratia transferentur. Hæc enim erit electitia, si optimates, quos voluerit, cooptet populus, & successiva, si certis tan-

tum familiis, aut prædiorum possessoribus
via ad senatum pateat.

CCCCLIX.

Potest vero etiam fingi Aristocratia cum
jure successionis mixtæ, si jus optimatum
ad electionem certis familiis agrorumve do-
minis adligetur. Ceterum uti electio Re-
gis a populo facta Monarchiam non destruit,
ita salva manet Aristocratia, etsi proceres
aliquando a populo eligantur.

CCCCLX.

Ex his autem perspicuum redditur,
quantum intersit ordinem ac modum succe-
dendi in ipsa reipublicæ constitutione quam
diligentissime sanciri, ne, dum de perso-
na successoris dubitatio oritur, turbis mo-
tibusque acerrimis misceatur respublica.
Quæ definitio nec jure, nec exercitio mo-
narchici aut aristocratici comprehenditur
imperii, sed legum fundamentalium est ma-
teria.

CCCCLXI.

Ac ideo nec ipse, quantumvis eum
absolutum esse ponas, Monarcha rationem
succeedendi determinare, aut semel stabili-
tam

tam immutare, nec vero populus aliam invita stirpe regnatrice, cui secus jus quaesitum adimeret, statuere potest. Licebit tamen iis, qui sunt ex familia regnante, de jurebus ad se pertinentibus sine populi detrimento pactis vel transactione disponere. Quam in rem solida historiae domesticae notitia plurimum proderit.

CCCCLXII.

Quapropter litem de successione nec Regi superstiti decidere fas erit, quod ei causa successionis haud subiaceat, neque tamen judiciali populi arbitrio videtur submittanda, quia is durante stirpe regnatrice omni caret jurisdictione. Attamen si de primæva populi voluntate versetur quaestio, non abs re erit, a populo, qui idem ac olim esse censetur, desuper sensum declarari, cui deinceps stetur.

CCCCLXIII.

Deinde vero, ne bello inter regni æmulos coorto populus in discrimen trahatur, extremæ hic poterit necessitatis favore uti, eique se dedere, cujus causa, re rite perpensa, videbitur probabilior, quo-

quoniam & talem juris decidendi reservationem sibi fecisse præsumitur, postquam turbas vitare quidem voluit, nec tamen jus litem hanc de successione natam decidendi Monarchæ concessit. Optime profecto huic rei consulatur, si lex condatur de modo, quo ejus generis controversiæ vel a populo vel ab ultimo Rege componantur. KEUFFEL. *Exerc. ad Grot. §. 92.*

CCCCLXIV.

Lata successionis lege, qui in ea vocatur, is proprio venit jure absque novo populi consensu, ideoque aliis rursus pactis aut capitulationibus successor adstringi invitatus nequit. Quodsi integra domus regnatricis extincta sit, legi successionis nullus ultra locus erit, sed redibit facultas populo, qua veterem reipublicæ formam retinere, immutare, aliam successionis formulam eligere, aut novam familiam adsciscere, aut denique ultimo Regi jus suum committere possit.

CCCCLXV.

Sed & illud sæpe contingit, ut si is fiat Monarchæ successor, qui in minorenni adhuc

huc ætate constituitur, aliave de causa rempublicam administrare nequit; quæ in specie tutela aut vicaria administratione opus est, ac in eam rem legibus fundamentalibus quoque prospiciendum erit.

CCCCLXVI.

Quæ si non adsint, officium est Imperantis, cui libera administratio competit, regno per officialem publicum subvenire, sine nova populi voluntate, qui ceteroquin, dum nec excludit impuberes, nec tutelam definivit, hanc spartam patris dispositioni reliquisse præsumendus est. KEUFFEL. *Exerc. ad Grot. §. 27.*

CCCCLXVII.

GROTIUS aliique putant, Regis personæ tutorem a patre constitui, regno ipsi dari non posse, quod id non ad imperium, sed ad habendi modum pertineat. Verum jus & modus administrandi regnum pars ipsius est imperii, nec habendi modo continetur. GROTIUS. *I. c. III. §. 15.*

CCCCLXVIII.

Princeps autem, dum vel tutorem, vel vicarium nominat, de administratione dumtaxat

taxat, non de civili disponit imperio. Hoc enim nec tutor nec vicarius acquirit. Quare poterit Rex vicarium aut tutorem regni eodem jure facere, quo alios officiales constituit publicos, post mortem quoque duraturos, nisi legitime fuerint a statione sua revocati.

CCCCLXIX.

Deficiente lege fundamentali aut Regis defuncti declaratione, naturale quidem est filii impuberis actiones generatim ab iis dirigi, quorum, veluti matris, est officium descendantem educare; sed si nec talis persona præsto sit, totius erit populi de idoneo tutore prospicere.

CCCCLXX.

Et si enim sæpiissime ii, qui proximum jus ac spem habent succedendi, tutelam impuberis nanciscantur, id tamen pactis & conventionibus singularibustribuendum potius est, quam legi publicæ universali; quandoquidem non præsumitur populus in hujusmodi tutelam, a qua pupillo nimia imminere possent pericula, ab initio consensisse.

fisse. Cf. BOEHMER. *J. P. U. p. spec. L. III.*
r. IV. §. 27.

C A P U T XIV.

DE MODIS, QUIBUS IMPERIUM
CIVILE DESINIT.

CCCCLXXI.

Restat, ut de modis, quibus imperium civile definit, dispiciamus. Horum alii autem ducuntur a populo, qui regitur, si nimirum is plane fuerit sublatus, alii a persona vel singulari, vel morali, quæ regimen gerit, quum scilicet populo incommuni fundamentum cessat, ex quo quis ut perfectum & affirmativum in personas obtineat.

CCCCLXXII.

Inprimis igitur civile expirat imperium populi interitu, qui contingit I.) si partes omnes, sine quibus corpus hoc artificiale consistere nequit, simul auferantur, nec enim exempla deficiunt populorum, quo-

quorum alii lapidibus obruti, alii terræ motu vel chasmate hausti, alii ponto submersi, alii vel incendiis, vel hostium armis ad interuersionem fuerunt deleti. GROT.
L. II. c. IX. §. 4.

CCCCLXXIII.

II.) Si partes quidem populi supersint, sed ita dissolvantur, ut nulla corporis ratio intelligatur, dum vel sponte a civitate discedunt cives, vel violentia quadam ita distrahuntur, ut convenire impossibilem nequeant; denique III.) si corpus quidem aliquod sit reliquum, sed vel omnis, vel perfecta saltem juris communio evanescat, quorum prius accidit perdita ab omnibus civibus personali libertate.

CCCCLXXIV.

Posterius evenit, quum societas aliqua quidem manet, ast plena & perfecta juris communitas eidem fuit ademta, populo in alterius civitatis ditionem redacto; atque hæc unio illa est *incorporativa*, quæ tollit genti subjectæ imperium civile; si enim amica & æquali conventionem duo se uniant populi, ut una fiat respublica, neutrius

trius amitti jura dicuntur, sed invicem communicari; quemadmodum in simili plurium familiarium unione accidit. GROTI. *l. c.* §. 6. & §. 9. *Dissentit* KEUFFEL *ad* Grot. §. 99.

CCCCLXXV.

Ceterum si partes non simul auferantur, sed successive civium mutatio fiat, tum idein tamen remanet populus, eoque sensu civitates dicuntur posse esse *immortales*. Immo si vel pauci homines liberi superessent, ii etiam non modo dominium, sed etiam, si vellent, commune imperium & porro civitatis jura tuerentur. PUFEND. *VIII. c. 12. §. 8.* GROTI. *II. c. 9. §. 4.*

CCCCLXXVI.

Populus, animo alias terras occupandi vel hostium armis aut inedia compulsus e territorio migrans, potest omnem ac perfectam juris communitatem retinere, ac propterea civile imperium non magis amittit, quam potestatem patriam vel domesticam paterfamilias, qui veterem habitationem commutaret. Sane non statim homo liber fit subjectus, quod per agrum eat vicini, ergo nec populus per alienum tran-

P

fiens

fiens territorium ideo perdit majestatem. *cf.*
 COCCÉJUS *ad Grot. l. c. §. 7.*

CCCCLXXVII.

Multo minus, mutata externa tantum
 regiminis forma, prior esse civitas definit.
 Nam neque partes ejusdem pereunt, ne-
 que totum corpus, neque primævum illud,
 quod sufficere diximus, pactum unionis ci-
 vilis cessat, alio licet pacto formæ specia-
 lis adjecto. Quare populus iisdem utetur
 juribus ac obligationibus generatim in mo-
 narchia, quibus utebatur in democratia aut
 aristocratia, ac vicissim. GROTIUS *l. c. §.*
VIII. cf. tamen PUFEND. L. VIII. c. XII.
§. 4.

CCCCLXXVIII.

Non eadem quidem esse intelligitur
 civitas, si populus, vel armorum jure, vel
 ultronea conventionē, vel Principis regno
 perfecte patrimoniali utentis voluntate in
 duas partes subjectivas dividatur. Attamen
 tunc non tam cessat civile imperium, quam
 potius pro una duæ existunt majestates;
 quod ipsum accidit, si colonia a populo
 ea lege discedat, ut non urbis matricis

no-

nomine, sed suo jure suisque auspiciis sibi novas ædes quærat. GROT. l. c. §. 10.

CCCCLXXIX.

Populo incolumi cessat civile imperium Regis morte, quod tamen uti in civitate successiva ad legitimum successorem transmittitur, ita in electiva ad populum pertinet, quod idem obtinet extincta tota stirpe regnatrice. Quare tunc populus nec in systema civitatum, nec in anarchiam incidit, quia in forma etiam democratica societas civilis durat, atque vi unici patris puri, quo singuli se universis subjecerunt, sustinetur.

CCCCLXXX.

Ex quo ipso illi refutantur, qui civitatem generatim duobus nonnisi pactis & uno decreto coalescere docent, quod eam absurdam admittere conclusionem cogantur, Rege electivo mortuo, vel deficiente familia regnatrice, civile disjungi vinculum, atque jura populi majestatica interim expirare. Sed nos trium pactorum necessitatem supra explosimus *cf.* LYNKER

ad Huber. jus civit. L. I. c. VII. §. 7. not. e.
BOEHM. §. P. U. L. III. c. 4. §. 5.

CCCCLXXXI.

Status Monarchiæ, in quo sedes regia vacat, seu tempus illud, quod a decessu ultimi Monarchæ usque ad novi electionem, excurrit, vocatur *interregnum*. In hoc majestas penes populum residet, in cujus voluntate situm est, an jura majestatica sibi perpetuo retinere, an novum Regem eligere, an rempublicam interea per alios, id est, *regni vicarios*, administrare velit. Horum utpote reipublicæ administratorum, publicorumque regni officialium jura ex lege fundamentali & populi concessione dimensionem accipiunt.

CCCCLXXXII.

Et si deinde populus electoribus quibusdam jus eligendi concefferit, id jus majestatem haud comprehendit, alterum enim ab altero facile potest separari. Nec putandum est, quum a nulla civitate subiectum majestatis excludi valeat, penes electores eam tunc reperiri oportere, quasi
 ipsi

ipsi imperium civile gerant, nec secus aliis id conferre posse videantur.

CCCCLXXXIII.

Subjectum etenim majestatis est populus, cujus nomine electio peragitur. Ac licet electores imperium civile concedant, non tamen id jure proprio, sed ejusdem populi eos designantis nomine fit; quemadmodum civis, in quem compromittitur, hujus compromissi potestate eligit. Plane, si electores majestatem haberent, juribus quoque majestaticis nequaquam destituerentur, quum tamen vicario regni administratio dari, & contra aliis jus eligendi tribui possit. *Dissentit Daries. I. J. U. J.*
780.

CCCCLXXXIV.

Abdicat imperium, qui populo expressim declarat, se juribus renunciare majestaticis, *derelinquit*, qui factis indubitatis monstrat, se in posterum populum gubernare nolle. Utroque actu imperium amittitur, atque post amissionem Rex in territorio manere pergens statum subditi amplectitur. Ita præter alios Carolus V. Cæsar impe-

rium abdicavit. Contra Poloniam tacite dereliquit Henricus Salesius, quod idem de Carolo XII. Rege Sueciæ ad Turcas profugo adfirmari nequit.

CCCCLXXXV.

An monarcha invito populo regno discedere possit, disceptatur. Qui negant, pacti urgent vinculum, a quo nisi mutuo consensu resiliri nequeat. Qui adfirmant, his moventur rationibus, quod populus etiam ab alio æque bene possit gubernari; nec qui regimen suscipit idèò ad ultimum vitæ momentum, se id retenturum esse promittat, quod ipsum neque populus intenderit. WOLF. *J.N. T. VIII. §. 366.*

CCCCLXXXVI.

Igitur innoxia abdicatio omnino licet, non autem intempestiva, qualis imminente bello vel in ætate futuri successoris pupillari susciperetur; quæ etiam tum esset illicita, si expresse conventum foret, ne jure quis abdicandi utatur. Tale pactum Polonis cum Michaele Wieznowiczio intercessit.

CCCCLXXXVII.

CCCCLXXXVII.

Cessat etiam imperium alienatione vel cessione jure facta; si nimirum Rex patrimoniali regno gaudebat. Quod si regnum fuerit usufructuarium, alienatio invito populo irrita & nullus est effectus. Imperans tamen majestatem ideo non amittit; nec enim derelinquendi animum simpliciter, sed tantum sub conditione habuisse censendus est, si in alium translatio permittatur. Ceterum an pars territorii five alienari, five deferri aliquando possit, supra dictum est. *cf. BOEHMER. L. III. c. 4. §. 9.*

CCCCLXXXVIII.

Verum illud sæpe acerrime disputatum est, an seu renunciatio seu derelictio liberis noceat. Res distinctione dirimitur; pro liberis nondum natis, nec in utero materno existentibus, quod isti nec jus, nec juris acquirendi spem habeant, renunciatio valet. Pro jam natis, aut saltem conceptis Regi fas non erit, renunciationem interponere, quia jam natis jus, foetui spes juris per nativitatem acquirendi interverti nequit.

GROT. II. c. IV. §. 10. & II. c. VII. §. 2.

KEUF. ap Grot. §. 91.

CCCCLXXXIX.

Ad renunciationem pro liberis nondum conceptis faciendam non opus est consensu populi, nec enim in prima regni delatione jus a populo in necdum conceptos transferri potuit, quod iis ab eodem sit adimendum. Sed nec nuda patris abdicatio sine liberorum mentione facta his nocebit, quod eos pater, si possit, & velit, expressis verbis excludere debeat. WOLF. §. N. T. VIII. §. 366. *seqq.*

CCCCXC.

Sed ais: venire jus liberorum a populo; eique adeo renunciari a patre non posse. At quamvis a populo jus profiscatur, id tamen ita fuit concessum, ut ab adscendentibus ad descendentes transmittatur. Jam vero si, eo, quo liberi concipiuntur, tempore, pater nullum jus habuit, nihil quoque fuit, quod transmitti potuerit.

CCCCXCL

CCCCXCI.

Porro adimitur jus imperii exheredatione in regno patrimoniali, de quo Rex pro arbitrio disponere potest. Nihil vero operatur exheredatio paterna in regno non patrimoniali. Quum enim tunc filius jam conceptus jus suum a populo per patrem adquisiverit, nihilominus ad successionem veniret; neque patris est determinare regni habendi modum, nec jus de regno disponendi ad majestatem spectat.

CCCCXCII.

Dicunt quidem, filium rebellem a patre morte omnino puniri posse, adeoque multo magis poenam mortis in exheredationem commutari. Enimvero jus vitæ & necis jus est majestaticum, quo imperans pater sicut cujuslibet alterius civis, ita quoque filii intuitu gaudet, ast jus disponendi de successionem imperio civili comprehensum non est.

CCCCXCIII.

Sed etiam furore vel dementia Regi superveniente imperium desinit, modo nulla plane spes adfulgeat, eum ad sanam

mentem rediturum. Eo enim statu impossibile fit finem societatis adsequi, atque ea-
tenus imperans pro mortuo est habendus. Qua ratione nuperrime Carolus Hispaniarum Rex auditis imperii ordinibus Philippum filium regni incapacem declaravit, filiisque natu minoribus successionem detulit.

CCCCXCIV.

Contra majestas non definit tum, quum leges fundamentales ab imperante violentur. Non enim ex ea violatione plus sequitur, quam imperantem plura, ac sibi concessa fuerint jura adrogasse, unde porro inferri nequit, eum etiam jura, quæ vere habuit, amisisse. Igitur satis est, irritum esse actum susceptum ab eo, qui facultate agendi carebat.

CCCCXCV.

Pactum Reſtoris civitatis cum civibus initum, ut violatis legibus fundamentalibus imperio cadat dicitur *clausula*, vel *lex commissoria*. Quæ utique salvis legibus naturalibus regiminis delationi superaddi potest, quum paciscendi modus a solo contrahentium arbitrio pendeat.

CCCCXCVI.

CCCCXCVI.

Quoniam vero, an leges fundamentales violatæ sint, facti est quæstio, dein licet ipsum factum manifesto commissum sit ab imperante, tamen jus eminens ob summam reipublicæ necessitatem obtendi potest, neque addita lege commissoria imperium statim amittitur, etsi aliquid fiat, quod pactis conventis adversatur. Ideo viri a principe & populo designati, debitaque ad id potestate instructi de facto eo cognoscant, & leges fundamentales custodiant.

CCCCXCVII.

Factum esset manifestum, si Rex contra conventionem a regno discederet, si ve uxorem duceret peregrinam: igitur si factum princeps ipse fateatur, negatque necessitatis causam, tum tacite se regno abdicat. Aliter si statuas lex commissoria erit inefficax; deesset enim modus sufficiens de facto judicandi, idemque foret, ac si res pro pretio ab incerta persona determinando venderetur.

CCCCXCVIII.

CCCCXCVIII.

Etiam depositionem a subditis attentatam, *dethronizationem* vocant, ad modos amittendi imperii referre aliqui non dubitant. Quum tamen subditi iudicium sibi in Imperantem adrogare nunquam possint, ille vero, qui totam evertere civitatem molitur, eo ipso furore aut dementia correptus esse videatur, ut eum non jam deponi, sed velut incapacem custodiri oporteret, evidens est, depositionem ad modos, quibus majestas pereat, minime pertinere.

CCCCXCIX.

Neque magis error, malitia, aut dolus in religione commissus principem throno dejicit, quod nemo in terris eo civiliter sit superior, atque licet peccet, modo alios non lædat, jure suo aut rebus privari nequeat. *) Sed & illi, qui licitam putant esse resistantiam, propterea & depositionem admittere necesse non habent, quod ab illa ad hanc nulla valeat consecutio.

*) Cf. EGINH. *Annal. ad. a. 750.*

D.

Quæritur & illud, an veniente usurpatore regnum perdatur. Usurpator autem vel invasor is dicitur, qui sine justa belli causa, vi vel dolo majestatem sibi præripere conatur; qualis etiam ut a tyranno separetur exercitio tali, *tyrannus titulo tenus* dici solet. Hic si sit extraneus, *invasor* in specie, si subditus, *rebellis* est. Ita Alexander M. invasor, Cæsar & Cromvellus rebelles adpellantur.

DI.

Quum ex sola majori virium physicarum quantitate fortior facultas moralis haud intelligatur, nec detur jus victoriæ, nisi accesserit pactum pacis, consequens est: ut secuta invasione ac usurpatione totius territorii, propterea non desinat civile imperium, sed tantum ejus impediatur exercitium, donec inita pace & ipsi civitatis regimini legitime fuerit renunciatum.

DII.

Quia vero Rex ejectus rempublicam administrare nequit, ideo subditi, qui sese invasori subjecerunt, ubi is in quietam fuerit pos-

possessione, eidem tenentur obedire, non quidem ex invasoris jure, quod nullum est, sed ob universale bonum, ex quo ille etiam, qui jus imperandi habet, velle non potest, ut populus intereat potius, quam invasori se submittat. Quare & vi obligationis rectoriæ tenetur juramentum fidelitatis interim non urgere.

DIII.

Quamprimum autem subditi a legitimo suo imperante defendi possunt, jam obligantur ad eum redire, quia juri alteri quaesito in perpetuum præjudicare nequeunt. Quodsi populus ipse antea in democratia constitutus fuisset, vitium, quod ab initio usurpationi inerat, subsequente saltem tacito populi consensu deleteretur.

DIV.

Itaque fides invasori data jus legitimi Regis minime tollit, sed propter conflictum obligationis se conservandi cum obligatione Rectori civitatis, qui jus suum exercere nequit, præstandi obedientiam, ita fieri oportet exceptionem, ut minus malum majori præferatur. Sane si pereat popu-

populus, jus quoque imperantis penitus exstinguitur, si autem vitandi interitus causa obediat usurpatori, spes tamen adfulget legitimo Regi, ut mutato rerum statu, pristina majestatis jura exercere possit.

DV.

Inde intelligitur, an & quando usurpator jure occidi queat. Si enim ipsa daret invasio, omnia belli jura in extraneum aggressorem exercere, contra civem rebellem vero simul executionem juris puniendi, non minus quam contra viarum grassatorem cuilibet committere licebit. Postquam autem invasor jam rerum potitus est, & armata populi desit resistentia, standum omnino erit expresso vel tacito parendi pacto, neque quidquam hostile interea tentandum. Quare lex fundamentalis, aut expressum Regis ejecti mandatum de occidendo usurpatore tunc demum valebit, si quieta imperii administratione nondum utatur. GROTI. *l. c. IV. §. 16. 19.*

DVI.


Quod demum ea concernit, quæ usurpator gessit, hæc tenenda est regula: quæ
ad

ad imperii administrationem pertinent, si-
quidem quasi nomine legitimi Imperantis su-
scepta videntur, nonnisi eo modo rescindi po-
terunt, quo etiam ea, quæ a legitima po-
testate geruntur, ob utilitatem publicam,
vel necessitatem immutari, aut ob justam
pœnam irrita reddi valent. Reliqua firma
manent, ne alias respublica summis per-
turbationibus misceatur.



POSITIONUM
DE
JURE CIVITATIS
PARS II.
SEU
JUS GENTIUM.






C A P U T XV.

DE JURE GENTIUM GENERATIM.



DVII.


Absoluta illa parte juris civitatis, quæ
 mutua Imperantium & subditorum
 officia, sive jura majestatica *imma-*
nentia complectitur, ad alteram jam par-
 tem progredimur, quæ de officiis agit di-
 versarum civitatum inter se, seu de juri-
 bus majestaticis *transcuntibus*, quorum com-
 plexus nomine *Juris Gentium* jam inde a
 vetustissimis temporibus innotuit. LIVIUS
 XXI. 10. CORN. NEPOS, *Themistocl.* VII. 4.

DVIII.

Scilicet gentis adpellatione integra familiarum multitudo continetur, quæ vel genere & agnatione, vel patrio solo ac moribus, vel simul perpetuo liberæ societatis vinculo ad mutuam securitatem sub eodem commui imperio inter se colligatæ sunt. Atque hæc postrema significatio propria est hujus loci. *Cf. L. 195. §. 2. de V. S. L. 6. de capt. & post. rev. SERVIUS ad Virgil. Æn. 1: 67.*

DIX.

Igitur nationes, populi liberi ac civitates, five regna sint, five respublicæ etiam fœderatæ, quacunque demum regiminis forma utantur, communi gentium nomine veniunt; cui quidem nec nexus clientelæ, nec pactum de alterius majestate commiter veneranda, nec obligatio ad annum tributum, nec contractus feudalís, sed status tantum subjectionis obfistit. Unde provinciæ, quæ alterius imperio parent, etsi singularibus prærogativis sint instructæ, gentium nomen tueri haud possunt.

DX.

Patresfamilias, qui convenerunt in civitatem, quoad actiones suas permittas ab arbitrio quidem totius societatis pendere, atque eatenus statum adventitium amplecti voluerunt; quod autem ad peregrinos homines vel cœtus attinet, quibuscum nulla inita est subjectionis, seu unionis civilis pactio, cum his antiquus, hoc est; naturalis status invicem retentus est, qui non omnem quidem societatem, sed illam tantum, quæ cum imperio humano copulata est, excludit.

DXI.

Inde compertum est, naturalia jura, quibus gaudebant singuli ante unionem civilem, facta hac unione, intuitu extraneorum non fuisse diminuta, sed quoad ejus fieri poterat, cum fociis communicata, integra semper apud cives universos permanfisse.

DXII.

Sed nec ulla oriri potest dubitatio, quin obligationes ac leges naturales, quæ ad unumquemque hominem segregem ante

tea pertinuerunt, etiam omnibus in civitatem congregatis, totique adeo genti, tanquam corpori mystico & personæ morali incumbant, ut hæc non modo curam habere debeat religionis ac philautiæ, sed etiam prodesse aliis gentibus ac potissimum ab earum læsione abstinere.

DXIII.

Sane rationis præcepta ab omni mutatione abhorrent, ut nec institutis hominum conciliis tolli, nec arbitrio potestatis civilis everti ullo modo possint; quin immo societatem naturæ regulis adversam vetitam irritamque esse satis constat. Unde conficitur, jura & obligationes gentis, quasi totum quoddam ex juribus & obligationibus singulorum veluti totidem partibus coalescere, gentem itaque fortius, quam hominem obligari, nec eandem prorsus unius atque alterius obligationem esse.

DXIV.

Et quia cuilibet homini, ac societati nova quædam jura adipisci, novasque contrahere obligationes licet, nil profecto repugnat, quin etiam gentes eodem modo
fibi

sibi ipsis prospicere, vel fidem suam aliis populis adstringere valeant. Immo vero sunt multa jura, multæque obligationes, quæ etsi non cadant in singulos, tamen in totam cadunt societatem, utpote quæ conjunctis viribus ampliora loca occupandi, & possidendi jus habet, atque aliorum necessitatibus excellentiori quadam ratione subvenire apta est.

DXV.

Ita partem maris, fluvium, insulam in potestatem suam redigere gentes possunt, homines singuli non possunt; contra hi celebrant nuptias, patria utuntur potestate, alios adoptant in filios, quæ jura toti genti, ut uni personæ morali & corpori mystico convenire nemo dixerit. Quare etiam suum gentis a suo hominis esse diversum facile est intelligere.

DXVI.

Atque hoc pacto confectum esse arbitror, ut in quacunque demum significatione juris vocabulum usurpetur, etiam jus gentium existere intelligamus. Est enim & inter gentes, vel quæ easdem repræ-

sentant, comitia civium, senatus optimatum & Monarchas aliquid, quod convenit, ac oportet facere, cujus porro agendi vel omittendi facultate morali populi omnes & eorum Rectores utuntur; sunt leges, quibus iidem suas actiones attemperare debent, atque istarum legum complexus, seu *scientia eorum, quæ inter gentes licita sunt, vel illicita, jurisprudentiam gentium* constituit.

DXVII.

Equidem officia civitatis & gentis tam erga Deum, quam erga se ipsam in jure publico universali cum juribus majestaticis internis examinavimus; ea igitur hujus non sunt loci, in quo jura majestatica externa pertractanda veniunt; nec si quis a prioribus discesserit populus, ideo dicitur jus gentium violasse. *Cf. ICKSTATT. J. G. L. I. c. I. P. 7.*

DXVIII.

Neque huc pertinet illa juris gentium acceptio, qua *jus, quod naturalis ratio inter omnes homines constituit*, designatur, quasi quo jure omnes gentes utantur; hoc enim nil aliud quam ipsum est jus naturale
ho-

hominum simpliciter tale, atque idcirco nomine juris gentium a nonnullis insigniri consuevit, ac si juri naturæ brutorum, si ita adpellare fas est, opponatur. §. 1. *Inst. De J. N. & G. L. 2. D. de J. & J. L. 84. D. de R. J. CICER. Off. III. 1.*

DXIX.

Quoniam jura ac leges populorum inter se, vel ex ipsa eorum essentia atque natura, sive simpliciter, sive sub certis circumstantiis considerata, vel ab aliis externis tantum factis derivantur, tenemus causam, cur jus gentium aliud *naturale* seu philosophicum, aliud *positivum* seu historicum dicatur, curque jus naturale gentis, æque ac jus naturale hominis primo in *absolutum* & *hypotheticum* abeat, dein vero iisdem generalibus existendi ac cognoscendi principiis, iisdemque proprietatibus utatur.

DXX.

Itaque jus naturale gentium in divina essentia & voluntate fundamentum habet, rationis usu intelligi, atque ex finibus rerum creatarum manifestissimis deduci, & de-

monstrari potest, eidemque immutabilitas, necessitas, æternitas, atque universalitas non minus ac juri naturali hominum recte tribuitur.

DXXI.

Nunc ad illam perplexam ceteroquin quæstionem, utrum jus naturæ & gentium sit unum, idemque jus, an vero uti objecto, ita & regulis ab invicem distinguantur, in promptu erit respondere. Jus enim gentium *positivum*, si aliquod esse admittatur, ab omnibus juris naturæ partibus differre, nemo sanus negaverit; contra jus gentium *naturale* ex eisdem profluere fontibus, e quibus jus naturæ hominum hauritur, & easdem porro esse generales utriusque disciplinæ regulas rursus apud omnes in confesso est. Quum tamen natura hominis a natura gentis utique sit diversa, ideo fit, ut existant omnino conclusiones non paucæ, quibus etsi actiones singulorum hominum haud regantur, iis tamen facta integrarum gentium applicanda sint.

DXXII.

DXXII.

Scilicet uti ex uno fonte plures rivuli promanare possunt, ita & jus naturale in quatuor partes distribui alibi vidimus. *Prima* actiones hominum, *secunda* actiones foeciorum generatim, *tertia* officia civitatum interna, & *quarta* officia civitatum externa explanat, quas singulas partes non satis distinxerunt primi hujus disciplinæ conditores *). Sane aliter nascuntur homines, aliter gentes, hæc aliter ac illi vivunt, crescunt, atque intereunt, & porro aliter etiam perfici, aut violari possunt. CICERO. *de rep. L. III. Cf. DARIUS. §. N. IV.*

*) GROTIUS. *L. I. 14.* HOBBS. *XIV. 4.* PUFENDORF. *J. N. §. G. II. III. 23.*

DXXIII.

Utrum vero jus gentium dicatur jus naturæ ad negotia gentium adplicatum uti volunt HOBBSIUS *) HEINECCIUS **), alii an jus naturæ per notionem gentium magis determinatum, ut placet DARIUSIO ***), inanis est verborum velitatio, quoniam conclusiones inde deductæ ideo non sunt in
du-

dubium revocatæ. At utrumque potius conjungendum videtur, ut adeo rectius jus gentium definiatur, esse *jus naturæ ad negotia gentium applicatum*, atque per notionem earum magis determinatum.

*) XIV. 4.

**) *El. J. N. L. I. §. 21. seqq.*

***) *Obs. VI. §. 14.*

DXXIV.

Nec minor est doctorum hominum dissensus, in statuendo jure gentium positivo, quippe quod nonnulli merum putant esse figmentum, contra alii in peculiarem redegerunt disciplinam: quamquam & hi duplici ratione discrepant inter se, primo an hujusmodi leges communes sint, ac universales, an vero tantum particulares, & quorundam populorum propriæ, deinde quibusnam principiis, & fundamentis eadem potissimum innitantur.

DXXV.

Qui primus jurisprudentiam gentium voluntariam fundavit HUGO GROTIUS *) pacta expressa & mores adduxit omnium vel saltem multorum populorum, quibus,
ut

ut majus adderet robur CHR. WOLFIUS **), naturalem gentium Democratiam finxit, cujus ea esset vis, ut quidquid majori numero placeret, aut non placeret, id etiam reliquæ personæ morales maximæ hujus civitatis amplecti, aut repudiare tenerentur. Quæ duæ opiniones, quoniam haud satis firmæ videbantur VATTILIO ***) ipse ad conventiones ob mutuam necessitatem, atque utilitatem præsumtas provocavit.

*) *De J. B. & P. I. l. §. 12. n. 2.*

**) *J. G. Prol. §. 19. 20.*

***) *Droit des gens proleg. §. 21.*

DXXVI.

Enimvero pacta inter omnes populos diserte aut tacite celebrata in medium produci eo minus possunt, quo plures sunt nationes, quæ vix nomine nedum societate & commercio aliis innotescunt; Democratiam vero naturalem quod attinet, ea tunc primum firmo staret talo, si uti unusquisque paterfamilias toti civili coetui, ita & singulæ gentes earum universitati suas voluntates subjecissent, quod quum
fa-

factum fuisse ostendi nequeat, naturale est, ut hæc civitas maxima non a populari, sed a Dei unius imperio pendeat.

DXXVII.

Denique pactorum præsumtio, quoniam hæc veritati semper cedere debet, etiam contraria cujuslibet populi declaratione infirmari posset, aut si consensus lege naturali præscriptus, & ideo firmus & irrevocabilis esse dicatur, leges existent necessariae solius rationis lumine & sine alio facto cognitæ, perperam porro cum juri-
bus miscebuntur positivis. Unde intelligitur, jus gentium voluntarium & universale esse nullum.

DXXVIII.

Illud tamen nemo iverit inficias, esse magnum hujusmodi conventionum aliarum super alias coacervatarum cumulum, esse etiam consuetudines, usu & moribus inter Europæ populos potissimum introductas; ad quarum custodiam singulæ gentes eo fortiori justitiæ vinculo obstringuntur, quo minus juris semel agniti possessione alios destrudere licet.

DXXIX.

DXXIX.

Equidem talium pactorum morumque complexum leges esse negant PUFENDORFIUS, HEINECCIUS, alique, quod eo nomine non nisi præcepta superioris venire arbitrantur; ast jam alibi ostensum est, hos non tam rerum, quam verborum controversia torqueri. Quamquam quas inter consuetudines sæpe recensent corruptelas, probe ab invicem secernere oporteat. ICKSTATT. *J. G. L. VI. c. I. seqq.*

DXXX.

Pluribus indiget subsidiis ista disciplina, siquidem præter jus naturæ, jus publicum universale, & jus gentium philosophicum comparandæ etiam sunt notitiæ rerum publicarum, & historiæ populorum, tum pacta, sædera, sanctiones pacis, ceremoniæ & observantiæ regionum penitus sunt noscendæ, quod non nisi magno cum acumine longaque praxi obtineri potest. *)

*) Cf. EV. OTTO *Not. Rerump. Trajecti* 1739. MOSER *Jus gentium temp. pacis. Tubing.* 1752. *Et tempore belli. Franc.* 1763. ACHENWALL. *Constit. Regnor. Europ.* lingua germ. edit. Gotting. 1762.

DXXXI.

DXXXI.

Quam præstabilis autem sit juris gentium naturalis scientia, quamque interfit humani generis eandem rite pertractari, vel inde satis colligitur, quod homines jam admodum pauci sint, qui post introductas civitates lege tantum utantur naturali: contra gentes primævi adhuc status tenaces communi hoc omnium jure potissimum censeantur, cujus porro ignorantia aut violatio non uni modo alterive homini, sed integris societatibus infelicitatem, ipsumque interitum maturare posset. GROTI. *J. B. & P. proleg. §. 2.* BOEHMER. *J. P. U. P. sp. cap. III. §. 17. sch. a.*

DXXXII.

Ceterum cum jure gentium *ratio & status* confundi non debet; hæc enim non id, quod justum, sed quid in speciebus obvenientibus utile sit, declarat. Quapropter, quæ alibi de discrimine inter jus naturale & politicum generatim tradita sunt, etiam speciatim ad jus gentium & rationem status oportet adplicare.



CAPUT XVI.

DE ÆQUALITATE GENTIUM,
ALIISQUE CUM EADEM CONNEXIS
JURIBUS.

DXXXIII.

Quandoquidem gentes singulæ ut totidem personæ morales, quæ vivunt in statu naturali, quæque adeo juribus primævis fruuntur, considerandæ sunt, consequens est, ut eædem tum sese immunes ab omni periculo conservare, tum vero independentiam ab alterius arbitrio & plenam cum reliquis gentibus æqualitatem moralem tueri jure possint. Quare quidquid aliæ aliarum in causis justum aut æquum credidissent, id in suis quoque causis ut valeat, etiam pati tenebuntur. PHÆDR. *I* 25.

DXXXIV.

Inde manifeste conficitur, ut quisque populus non modo animo, corpori, bonis, rebusque singulorum civium ab exter-

R

nis

nis etiam injuriis præcavere obligetur vi unionis civilis, sed etiam ut juribus iis gaudeat, quibus efficere possit, ut hæc ipsa unio & forma reipublicæ, leges fundamentales, jura majestatica, & eorum usus perdurent; contra illa omnia, quæ vinculum civile dissolvere, & ita interitum sibi adferre possent, averruncantur.

DXXXV.

Ex æqualitate civitatum earum quoque independentia facile intelligitur. Quare illæ actiones, suas libere, ac nemine alio consulto determinare possunt, dummodo ab aliarum læsione abstineant; hinc in his terris nulli Domino aut superiori, nulli judici aut jurisdictioni subjiciuntur, ac porro ab obsequio & pœna stricte tali sunt immunes.

DXXXVI.

Denique & formam imperii, quæ magis placet, eligere, eandem mutare, titulos, quos volunt adsumere, juraque omnia majestatica ex proprio arbitrio exercere valent, ita ut nemini sive homini, sive
gen-

genti factorum suorum rationes reddere obligentur.

DXXXVII.

Itaque inspecto jure gentium absoluto titulum Imperatoris, Regis, Ducis in suo & ab aliis independente territorio impetrare non oportet. Quod vero aula romana Reges *Apostolicos, Christianissimos, Catholicos, Fidei defensores, Fidelissimos* nominaverit, aliis ex principiis, nimirum societatis ecclesiasticæ natura repetendum est. Ex eodem quoque fundamento consequitur, ut cives alterius nationis in loco nullius vel tertii deprehenso, aut eorum naves vel merces gens suæ jurisdictioni subicere haud possit.

DXXXVIII.

Quum denique inter gentes, si primævus spectatur earum status, omnimoda æqualitas moralis obtineat, nulla cujusquam prærogativa, nulla præcedentia habere locum potest, quin potius durante eo statu pares de omnibus obligationes, juraque paria enunciari debent. Itaque unicuique eadem existimationis simplicis,

justæ ignorantiae, suasque mediis non inju-
stis perfectiones augendi jura suffragantur.

DXXXIX.

Sane quisque populus, quæcunque de-
mum fuerit regiminis forma, iisdem juribus
majestaticis tam immanentibus, quam trans-
euntibus gaudet; quæ igitur in singulis se-
junctis existit, diversitas nulla est, si præ-
termissa omni hypothesi inter se comparën-
tur. Id ipsum valet de gentium Re-
ctoribus, qui per ingressum in alienum ter-
ritorium nec majestatem amittunt pro sua
regione, nec propterea alterius jurisdictioni
subjiciuntur.

DXL.

Ad istas autem gentium perfectiones
tam cultura virtutum intellectualium & mo-
ralium, quam novæ hominum & virium
accessiones pertinent. Quare neminem pu-
to fore tam plumbeum, qui neget, posse
unamquamque gentem fovere artes bonas
moresque, suam sine aliarum læsione au-
gere potentiam, & civibus suis, nè justa
eis lucra intercludantur, patrocinari. Inde
& jura promanant, tam res, si sint nullius,

occu-

occupandi, quam si quorundam sint propriæ, modis legitimis, veluti pactis, commerciis externis, ac hereditatibus conqui-
rendi.

DXLI.

Fuere quidam, qui a gentium antiquitate earum quoque proedriam, ab artium & disciplinarum flore, ac puritate religionis majorem existimationem, a vehementiori autem potentia, aut plurium regnorum nexu etiam prærogativam comprobari posse judicarunt. Enimvero a sola inæqualitate temporis ad inæqualitatem juris non valet collectio, virtutes vero intellectus aut voluntatis non simplicis ac naturalis, sed adquisitæ & accidentalis existimationis sunt mensura.

DXLII.

Denique uti major potentia physica majorem potentiam moralem haud involvit, ita ceteris qualitatibus non tam jus perfectum, quam aptitudo & meritum ad aliquam prærogativam adventitiam innititur. Ecquis enim id sustinere auit? homini do-

cto, vel giganti plura competere naturalia jura quam indocto vel pygmæo.

DXLIII.

Nec dicas cum DARIUSIO *) & VATTILIO **), principem sedem non esse nisi prioritatem loci, quo, qui prius eum occupavit, nequaquam sit expellendus. At nil profecto vetat æqualem cujusvis locum judicare, mensæ adfidere rotundæ, vel eodem loco alternatim uti. Porro uti nemo jure coget invitos populos cum aliis in idem territorium convenire, ita nec vi externa compelli alter ab altero potest, ut suam religionem judicet esse puriorem.

*) L. J. U. §. 956.

**) L. II. c. III. §. 37.

DXLIV.

Fas autem civitates in illum casum demitti, unde nisi res vel bona aliarum civitatum usurpent, exitum videant nullum: utique illæ ex jure, vel ut alii loqui malunt, *favore* necessitatis salutem expedire, & rebus alienis uti, aut etiam abuti poterunt, dummodo observent limites, quos

quos ab hominibus in pari discrimine verfantibus transiliri posse alibi negavimus.

DXLV.

Itaque naves alienas arripere , detinere, iis uti, aut loca munita seu fortalitia vicinorum occupare, accedere ad portus vicinos pro aqua & alimentis , sedes quærere, si propriæ vi nobis sint ademtæ, emere merces necessarias , jure perfecto licebit, quoties non commoditas aut utilitas , sed vera ac summa necessitas id postulat. Modo omnia prius remedia adhibeantur leniora , alter populus eadem necessitate haud prematur , & quamprimum fieri poterit, plena succedat restitutio. Cf. ICKSTATT. *Jus gent. l. II. c. VIII.*

CAPUT XVII.

DE GENTIUM HUMANITATE.

DXLVI.

Quum paullo antea ostensum sit a nobis, obligari omnes populos sibi invicem

R 4

pro-

prodesse, tantoque magis a mutua læsione abstinere, palam fit, officia gentium alia esse *humanitatis* seu imperfecta, & coactionis expertia, alia *iustitiæ* seu perfecta, & quæ vi quoque possint extorqueri. Priora hoc capite, posteriora capite sequenti exponemus.

DXLVII.

Certe nulla in medium proferri gens potest, cui non aliquando ab aliarum gentium rebus vel operis saltem aliqua major perfectio adferatur; igitur hoc cuique natura præscripsit, ut omni conatu ad communes utilitates conspiret. *Namque magis est secundum naturam pro omnibus gentibus, si fieri possit, conservandis aut juvandis maximos labores molestiasque suscipere, quam vivere in solitudine, non modo sine ullis molestiis, sed etiam in maximis voluptatibus abundantem omnibus copiis.* CICER. de Off. III. 5.

DXLVIII.

Ex his aperte consequitur, etiam gentes omnes, humanas, misericordes esse oportere non modo erga amicos, verum etiam inimicos; siquidem & horum odium

a lege naturali penitus abhorret. Ideo fit, ut tam in prosperis rebus, veluti nuptiarum, nativitatis, coronationis, pacis, quam etiam in adversis, ut mortis, perduellionis, incendii, terræ motus, vicini populi ac eorum Rectores, aut gaudium aut dolorem, sibi invicem testari consueverint.

DXLIX.

Atque hæc amoris significatio nec propter bellum, quo duo populi inter se sunt implicati, nec ob oppositas de modo colendi Deum sententias, exceptionem admittit; uti enim vetitum est odium inimicorum, ita & hujusmodi officia non in determinata religione, sed in ipsa gentium natura satis fundantur.

DL.

Tum vero mutuus populorum amor sese prodit potissimum, si alter alterius intellectum, voluntatem, ac statum externum perficere adlaboret, quorsum inprimis pertinet cura, ut veræ de Deo ejusque attributis sententiæ omnibus & doctrina & exemplo instillentur. Præterquam

quod enim contrariæ in religione opiniones manifestum errorem aut ignorantiam saltem alterutrius gentis arguant, perpetuis etiam litibus atque odiis præbent occasionem; quum contra ex uniformi rectaque divini cultus cognitione novum quoddam idque fortissimum societatis vinculum ducatur.

DLI.

Atque duplex quidem hic concurrit officium, unum scilicet erga supremum Numen, cujus gloriam uti a singulis hominibus, ita & ab omnibus gentibus illustrari oportet; alterum vero erga alios homines, quos ab errore adeo pernicioso liberari maxime interest humani generis. Quare collegium de propaganda vera religione institutum laudari satis nequit. *PSALM. CXVI. v. 1.*

DLII.

Ast quanta non est illorum impietas, qui proprii commodi causa fovere satagunt errores, & quamcumque Dei colendi rationem satis purant esse idoneam, si modo physica civitatis potentia inde accipiat incrementum! Sane, quæ a nonnullis adductæ sunt

sunt rationes pro promiscuæ religionis tolerantia, id unice probant, vim, metum, ac coactionem ad tradendam notitiam summi numinis ineptos esse magistros.

DLIII.

Proximum huic est, ut populi scientias atque artes ad communem felicitatem propagare; & novas in dies veritates collata opera detegere contendant. Ideo viros doctos, veluti Geometras, Astronomos, Medicos, Historicos ad peregrinas regiones sæpe ablegari novimus, quibus porro liber accessus, ceteraque ad optatum finem perveniendi remedia non nisi summa iniquitate denegantur.

DLIV.

Neque vero defunt exempla populorum, qui bonas leges ab aliis acceperunt. Sufficiat hic Romæ materiam XII. tabularum e Græcia accersentis meminisse. Ac profecto studia literarum & ingenuæ artes homines reddunt cultiores, atque mores solent emollire. OVID. *Pont. II. IX. 48.*

DLV.

DLV.

Perfectio status externi in aucta gentis existimatione & gloria, rerumque omnium abundantia continetur; nihil igitur prætermittere oporteret, quo æquius aliorum de aliis sit iudicium, quoque nullæ non nationes ea, quæ ad suam necessitatem, utilitatem, aut etiam jucunditatem pertinent, facilius consequantur. Quum vero non omnia omnis ferat tellus, consequens est, ut ex copia unius regionis alterius inopiæ sive gratis & ex beneficentia, sive saltem ex contractu permutatorio succurrendum sit.

DLVI.

Postulat igitur humanitatis ratio, ut aliis non ea præstentur modo, quæ accipientibus sunt utilia, dantibus autem parum damnosa, veluti consilium in dubio negotio, medicina grassante morbo, opera pro pace concludenda, sed etiam quæ non sine detrimento tribui possunt, uti esset annona penuria ingruente, aut miles, quo injustus hostis depellatur. *Cf. LIVIUS XXXIII. 33.*

DLVII.

DLVII.

Quum in mutua rerum communicatione, quæ per contractus explicatur, consistat *commercium*, hoc non modo inter singulos homines, sed etiam inter populos maxime esse utilitatis elucet; secus enim rerum multarum usu, quas vita humana desiderat, locorum intervallo arcerentur. Et quia obligatio ad finem necessitatem idonea impendendi remedia involvit, nulla gens de eo, quod ad commerciorum florem conferre posset, quidquam a se desiderari patiatur.

DLVIII.

Quamobrem I. emporia, nundinæ, & portus constituentur tuti, quo merces invehi, evehi, commodeque permutari sine magna mora possint. II. Privilegia si-ve emendi res invectas, antequam aliis eas emere liceat, si-ve sistendi merces in flumine publico, ut eas vendere aut secus tributum præstare necesse sit, vulgo *pro-poliū*, & *jus stapulæ*, non facile concedantur, leges vero in extraneos injuriæ, nimiaque vectigalia abrogentur.

DLIX.

DLIX.

III. Nominentur *Consules*, seu personæ, quæ in emporiis, & portubus privilegia nationis suæ custodiant, & lites inter mercatores ortas breviter & sine magnis sumtibus definiant; & si quæ sunt alia, quæ commerciorum florem promovere apta sunt, a singulis populis constituentur.

DLX.

Sed dicet fortasse aliquis stultum fore, atque a politices regulis alienum, iis præbere auxilia, qui hæc ipsa in nostrum interitum convertere aliquando possunt. Enimvero non aliud inde conficitur, quam ut tenendus sit beneficii & permutationis modus. Sane facilius populi, quam homines suis se viribus sustinent, aliorum itaque indigentiam ita sublevare oportebit, ut tamen officia, quæ quisque sibimet ipsi debet, haud prætermittantur.

DLXI.

Nemo igitur tam male suas secum inhibet rationes, ut arma hostibus suppeditet, aut annonam, vel ut artem aptiora conflandi tormenta, construendi habiliores na-
ves

ves bellicas, fale condiendi pisces, aliaque arcana opificia cuiquam statim prodat. Et enim prodesse aliis haud obligamur, si gravius inde in nos redundaturum est incommodum. PHÆDR. *Fab. V., in app.*

DLXII.

Quapropter cujusvis populi iudicio relinquendum est, an & quomodo valeat aliis opem ferre; & quoniam nemo adhuc inventus est, cujus vires omnium necessitatibus levandis essent pares, licebit profecto, quod uni tribuitur, id ipsum alteri sine ulla injuria denegare. Qua in re gratitudinis potissimum est habenda ratio, ut paribus in causis ii, a quibus plura in nos sunt profecta beneficia, ceteris præferantur.

DLXIII.

Ex quo facile comprehendere licet, populi esse iudicium, an arbitri munus inter duos, qui bellam gerunt, ipse suscipere possit, an commercia nullo pacto speciali definita cum vicinis prosequi, vel restringere, mutare, aut etiam penitus tollere velit. Quid enim si merces æquo pretio emi vel vendi nequeant, aut si res vel personæ
mor-

morbo quodam pestilenti forent adfectæ , nonne in finibus nostris XXX. vel XL. dierum mora detineri aut plane arceri possent? GROTIUS *) igitur non adsentimur , dum nimis generatim profugis receptum deberi , & quod uni concessum , alteri quoque concedendum putat.

*) *J. B. & P. l. II. c. II. §. 16. & 22.*

DLXIV.

In eo quoque mutua sese exserit comitas , atque facilitas populorum , si negotia in alieno territorio gesta , quæque propriis non adversantur legibus , in suo pariter quisque firma , validaque esse patiatur ; qui enim id facere detractat , conqueri minime debent , si & aliæ gentes acta , quæ alibi perfecta sunt , alicujus valoris & roboris esse negaverint. Quod quum commercia atque amicitias civitatum mirum quantum perturbare posset , omnium sane interest , nulla hujusmodi inhumanitatis exempla unquam præberi.

DLXV.

DLXV.

Atque inde est, quodabilitas & qualitas, quæ personæ in una civitate competit, veluti jura nobilitatis, pubertatis, majorennitatis, aut familiæ, etiam in alia civitate agnosci consueverint. Porro testamenta, matrimonia, aliosque contractus, si ad formam loci, in quo celebrantur, sint adcommodati, parum æquum foret, alibi effectum suum haud sortiri.

DLXVI.

Denique nec dispositio de bonis sub alterius potestate fitis impugnatur, nisi a legibus, quæ ratione rerum immobilium ibi perlatae sunt, abhorreat. Uti enim civibus nuptiæ cum peregrina, ita & extraneis comparatio immobilium juste posset prohiberi. Quare non simpliciter cum CHR. WOLFIO * facimus putante testamentum judiciale apud unam gentem factum ab alia quoque esse admittendum, quod ea nostram debeat jurisdictionem agnoscere; valet enim gentis jurisdictio in suo cujusvis territorio, non extra illud.

* *Inst. J. N.* §. 1137.

DLXVII. //

Quamquam vero officia, quorum hoc capite meminimus, tantum imperfecta sint, & a coactione libera, quippe quæ in propositione de juvandis aliis continentur, ut porro, qui iis non adhærescit, iniquitatis quidem, non autem injuriæ argui possit: quum tamen multæ sint cum harum legum cultu connexæ utilitates, & contra earum transgressoribus non levia incommoda ab aliis populis immineant, fortissimæ semper adsunt rationes, quæ gentes ad comitatem & humanitatem reciproce exercendam exstimulent. *cf. KOEHLER J. N. spec. VII. §. 16. 48.*

DLXVIII.

Ex quibus satis demonstratum existimo, esse officia imperfecta, quæ a gente qua tali aliis gentibus præstantur, quamvis in alia omnia eat DARIUSIUS *. Ast negari tamen nequit, officia hæc aliquando perfecta fieri posse, si summa ingruat necessitas, vel pactum accesserit, ut alio in loco a nobis fuit ostensum.

* I. J. U. §. 950.

CAPUT XVIII.
DE JUSTITIA GENTIUM
ABSOLUTA.

DLXIX.

Quas ad candorem & humanitatem factas esse intelleximus gentes. quin etiam justitiæ regulis a natura sint imbutæ, nullo modo potest dubitari; constat enim, præcepta de non lædendis aliis & de suo cuique tribuendo ad easdem æque ac ad singulos homines pertinere, ex quo infama illa quorundam doctrina de naturali bello nationum omnium in omnes abunde exploditur.

DLXX.

Atque jus istud, quod perfecta populorum inter se officia exponit, jus gentium *cogens*, sive proprie tale nuncupatur, & in illa continetur propositione: *Quod sibi fieri nolunt gentes, aliis ne faciant*. Quæ vero gens hæc officia violaret, ea in regu-

las justitiæ impingere, atque adeo alias lædere censenda esset.

DLXXI.

Itaque injustæ sunt gentes I. quæ de aliarum æqualitate & independentia, vel alio quodam jure majestatico quidquam detrahere conantur. II. Quæ legitimam imperii formam a populo quopiam electam mutare, aut quaqua ratione evertere student. III. Quæ territorium turbant alienum. IV. Quæ externorum civium personas aut etiam res violant. V. Denique, quæ facultati, qua nulla non civitas pollet, justis modis majores adipiscendi vires, adferunt impedimentum. Si quid porro horum fiat, gens læsa eadem habebit jura in lædentem, quæ homini injuria adfecto contra injuriantem competere alibi demonstravimus.

DLXXII.

Atque ex his liquet, gentem non modo nihil, quod in alterius gentis contemptum aut contumeliam vergeret, facere, sed neque majora honoris ac existimationis signa, titulosque peculiares naturaliter
ab

ab altera prætereundere posse, præterquam si pacto vel morte manentem quemdam titulum aut prælationem jam sit adepta.

DLXXIII.

Quum vero, qui in unum liberalis est, alteri propterea injuriam non faciat, etiam populus uni populo novum adscribere titulum, certum assignare locum, res inter suos cives permutandi facultatem dare potest, quæ tamen omnia reliquis gentibus sine injuria denegabit. *cf. GROTI. I. III. 21. 1.*

DLXXIV.

Nec minus inde colligitur, eam gentem ab injustitiæ labe liberari non posse, quæ exterorum negotiis ultro se immiscens judicium de iisdem adfectat, quæ proprium Dei colendi modum aliis vi obtrudere nititur, aut peregrinam religionem cum contumelia ac vituperio gentis illi addictæ detestatur, quæ demum alienorum subditorum querelas suæ cupiditati prætexens re opera aut consilio eorum sustentat contumaciam. Si enim arma in imperantem sumere subditis nunquam licet, quomodo

horum nomine aliis, quibus nulla infertur iniqua conditio, id facere licebit?

DLXXV.

Ex eodem quoque fundamento consequitur, ut populo uni licitum haud sit, alteri populo qualitates Regis eligendi præscribere, aut eum Regem damnare, qui plures haberet uxores, vel durioribus pœnis quosdam subditos adficeret. Sane nemo sibi iudicium in actiones aliorum potest adsumere, quin eorum æqualitatem atque independentiam lædat.

DLXXVI.

Quum porro tam turbatio alieni territorii, quam violatio civium incitat in læsionem gentis, consequens est, ut jus regionem ac res civium possidendi, iisdemque utendi, ac fruendi salvum cuique relinqui debeat, & hinc ut nemo, refragante Rectore civitatis, sibi harum rerum possessionem adrogare, aut personas civium, vel militiæ, vel nuptiarum, vel cujusquam alterius scopi causa abducere jure possit. Quodsi hujusmodi actus ceteris populis permittantur, quisque facile intelliget, etiam

con-

conditiones, sub quibus ea permissio facta est, rite esse implendas.

DLXXVII.

Et quoniam non ii modo nos laceffunt injuria, qui rem nostram vel ejus partem subtrahunt, sed etiam, qui ne jure nostro utamur, nobis ponunt impedimentum, perspicuum plane est, nullam gentem, ne cum extraneis commercia excolat, aut ab amicis obtineat auxilia, aut aliter modis licitis suam augeat potentiam, posse prohiberi.

DLXXVIII.

At si populo res suas cum hac potius, quam cum illa gente permutare placeat; si propriis mercibus majus statuatur pretium, quam eas comparare volentibus æquum esse videatur; si denique ab actibus, quos promiscue aliis civitatibus indulget, unam civitatem sine contumelia excludat; quia id jure suo facit, ideo aliæ gentes læsiones sibi illatas esse frustra quererentur.



CAPUT XIX.**DE JURIBUS GENTIUM CIRCA
DOMINIA ET PROPRIETATEM.****DLXXIX.**

Qui rerum dominia a mutuo tantum hominum consensu repetunt, nec tamen ad communem hujusmodi conventionem ab universo humano genere initam provocare audent, ii nullam inter diversas gentes proprietatem dari arbitrantur. Quoniam vero originem proprietatis sine peculiari ulla conventionem ex jure occupandi profluxisse alibi docuimus, ambigere profecto non licet, quin etiam civitates & populi, quippe qui singularum personarum jure utuntur, proprietatis modis vel originariis, vel derivativis adipiscendæ sint capaces.

DLXXX.

Perperam itaque BYNKERSHOEK * rerum dominia juri civili adscribit, quod civium sit conventio, ut quisque sua habeat tuita
fe-

seperatim, etiam citra possessionem præcise naturalem; quem fere sequutus est GRIBNERUS **. Quis autem gentibus abjudicabit dominium, quas territorium suum possidere, omnem inde utilitatem percipere, ac de eodem pro arbitrio disponere posse constat? At inane foret hoc dominium, si illud a perpetua detentione physica rei cujuslibet penderet. Etsi igitur id corpore & animo adquiratur, solo tamen animo retineri poterit. cf. BARBEYR. *ad Puf. L. IV. c. VI. §. I.*

* *De domin. mar. c. I.*

** *Pr. J. N. L. III. c. III. §. VI. n. 2.*

DLXXXI.

Adquiruntur autem dominia a gentibus modo originario, quando I. res nullius II. actu adprehenduntur III. animo sibi habendi; quæ adprehensio per universitatem facta, condominium producit, seu communionem positivam tamdiu duraturam, donec vel in minores societates, vel in singulos cives certæ portiones describantur.

DLXXXII.

Inde petere licet rationem, cur res aliæ dicantur communes seu *nullius*, aliæ *publicæ* seu populi, aliæ *universitatis*, id est, societatis minoris, aliæ *singulorum*. Sed uti publicæ res possunt fieri singulorum propriæ, ita & singulorum in publicum res suas conferre non repugnat. *Pr. Inst. de rer. divis. l. 2. pr. D. eod.*

DLXXXIII.

Quemadmodum paterfamilias fundo occupato non modo fructus omnes sive industriales, sive naturales inde percipere, sed etiam in eo venari, piscari, aucupari, thesaurum fodere cum exclusione aliorum potest, ita quoque populus, qui regionem vacuum animo ibi sedes figendi ingreditur, certisque limitibus circumscribit, tum totius terrarum & aquarum tractus possessionem, & proprietatem generalem acquirit, tum præterea jus occupandi omnia, quæ supra & subter sunt, antevertere præsumitur, ut adeo nihil in eo territorio sit inclusum, quod non ad illud uti pars ad totum spectare, sive de territorio esse videatur.

DLXXXIV.

DLXXXIV.

Igitur SAM COCCEJUM* non moramur, cui dominium generale videtur, purum esse figmentum, ficulneo enim illo utitur argumento, quod possessio actu corporali adprehensa, ratione totius regionis deficiat. Etenim ad hancce possessionem acquirendam satis fuerit, populum terminos vel *arcifinios*, uti montes, fluvios, vel *limitatos* veluti leucas pedesve fixisse. Nam neque patrifamilias opus est, ut singulas glebas teneat, vel circumambulet, modo limites ponat aut sepem.

* *Not. ad Grot. II. II. 4.*

DLXXXV.

Quapropter, quidquid in territorio reperitur, five suapte id existat *natura*, uti sunt montes, sylvæ, pascua, & quævis inculta loca, dein flumina, rivi, alvei, insulæ; stagna, lacus, paludes, quæque his accedunt bestię volatiles, terrestres, ac nantes, nec non metalla & alia fossilia, five hominum *industria* producantur, uti casæ, domus, arces, villæ, oppida, urbes, vine-

neta, agri, ceteraque manu & arte facta, & cuncta rerum jura, id omne proprium est totius gentis, qua invita porro nec res jacentes seu adespotas occupare, nedum in regione morari, immo nec illam ingredi licebit.

DLXXXVI.

Equidem GROTIUS * in ea fuit opinione, posse advenas solum vacuum & sterile intra territorium populi situm recte occupare, quod occupatum non videatur, quod non excolitur, & hinc non nisi imperium priori populo salvum permaneat. Enimvero quidquid est in territorio inclusum, etiam esse de territorio nec GROTIUS diffiteri potest, siquidem occupationem etiam per universitatem fieri ipsemet agnoscit **. Læderet igitur gentem, qui hasce res vacuas ei adimere conaretur, quæ vel pascendis gregibus, vel saltem avertendis hostium incursionibus inferviunt. Quod si animalia fera ex altera regione in alteram se transferant, quoniam hæc incertæ sunt originis, naturam novi
ter-

territorii, velut accessorium sequentur. *cf.*
LIVIVS V. 36.

* L. II. c. II. §. 17.

** L. II. c. II. §. 4.

DLXXXVII.

Quum vero occupatio in rebus nullius tantum fieri possit, nemo non intelligit, eam ad loca ab alio populo, vel etiam familiis segregibus inhabitata nequaquam pertinere; immo siingas nationem maxime stupidam, proprietate abutentem, religionis denique atque humanitatis expertem, ea tamen rerum a se adquisitarum non excidit dominio, ut adeo nefas foret, hoc tantum nomine eam suis fortunis spoliare. *cf.* LEIBNITIUS *Cod. dipl. p.* 165. & 203.

DLXXXVIII.

Et quoniam, quæ nullius sunt, non ante fiunt propria, quam ubi sufficienti facto a nobis adprehenduntur, manifesto consequitur, ut quamvis tota societas majora terrarum spatia occupare, & adquirere possit, quam singuli focii, tamen quæ a civili multitudine in potestatem physicam redi-

digi ac possideri nequeunt, ea quoque abhorreant a gentis proprietate; cui porro nec fundos cultura & cura, omnique alio usu vastiores, multoque adeo minus oceanum adprehensionis & custodiæ impatientem primævæ communioni subtrahere licebit.

DLXXXIX.

Contra portus, littora, navium stationes, vadossæ oræ, sinus, freta minora, aliæque maris partes, quæ territoria populorum adlunt, iisque sunt inclusæ, libertatem a dominio non omnino tuentur. Præterquam quod enim mare terræ proximum non fit inexhausti usus, sed capiendis piscibus, margaritis, cochleis, corallis, fucino, ambrae faciendoque sali maxime inserviat, illud etiam gentes teste experientia certis terminis definire, tum vicinis classibus ac tormentorum explosione possidere ac defendere consueverunt. Atque inde fit, ut possessoribus invitis ab exterorum navibus ea loca non modo non teneri, sed neque prætervehi permittantur.

DXC.

Solus animus acquirendi, nisi & vera sequatur adprehensio, nullum cuiquam tribuit peculiare jus; igitur aliquid vidisse tantum vel scire; ubi illud sit, vel medio non idoneo adprehendere ad obtinendam possessionem corporalem haud sufficiet. Quare si gens una insulam vacuum detegeret, aut etiam grandioris tormenti globum in illam vibraret, altera vero eandem ingrederetur animo sibi habendi, hujus, non illius insula fieret propria.

DXCI.

Imperium in regionem vacuum cum dominio occupari communis quidem est doctrina, verum non satis, ut videtur, adcurata, siquidem imperio in res non proprie utimur, sed in personas, quæ etsi per loca deserta vagari deprehendantur, pristinam tamen tueri possunt libertatem, atque ab omni occupatione semper sunt immunes.

DXCII.

Quod si nulli homines segreges in terris occupatis reperiantur, tunc gens non
tam

tam novum occupare imperium, quam potius vim antiqui in eos proferre videtur, qui provincias ita adquisitas, five perpetuæ habitationis causa, five etiam ad tempus accessuri sunt.

DXCIII.

Scilicet alienum ingrediens territorium honestas conditiones, sub quibus est admissus, tenetur implere; quum igitur gens nemini aditum ad suas terras aliter concedere intelligatur, quam si primo legibus negativis de non nocendo civitati generatim, dein etiam legibus affirmativis, quæ diserte in advenas feruntur, morem gerat, consequens est, ut quicumque degit in territorio, nisi manifeste probetur exceptio, etiam sub territorio esse, hoc est, ab imperio & jurisdictione domini territorialis pro tempore commorationis pendere censeatur.

DXCIV.

Ex quo conficitur, ut I. imperans causas controversas in suo territorio agnoscere, atque decidere jure possit, ac porro, ut ejus sententia in peregrinos lata
ju-

justa præsumi debeat; II. ut delinquens in alieno territorio pœna in foro delicti statuta adficiatur; III. ut jus albinagii, quo exteri jure successionis in bonis defuncti civis, vel peregrini excluduntur, humanitati quidem gentium repugnet, non autem justitiæ, si noverint peregrini sub hoc tantum onere aditum sibi in alienam regionem patere. *WOLF. Inst. J. N. §. 1138.*

DXCV.

Inter dominii consecratoria & illud numeratur, ut quisque rerum suarum moderator sit & arbiter, quæ porro in alios in totum vel pro parte jure transferuntur; nulli igitur dubitamus, quin populis de montibus, insulis, pascuis, aliisque publicis rebus pro lubitu disponere, hinc easdem cum vel sine pacto antichretico oppignorare, servitute affirmativa vel negativa adficere, aut etiam penitus alienare, immo & derelinquere sit permissum. * *GROT. II. XV. §. VII. n. 3.*

* cf. *ENGELBRECHTI Commentat. De servit. jur. pub. recusa Lipsiæ 1739.*

DXCVI.

Ex his autem colligitur, patrimonia gentium modis derivativis, veluti conventionibus aut testamentis sumere incrementum quidem posse, frustra vero huc revocari usucapionem, aut præscriptionem, postquam inventum id esse juris civilis alibi satis est ostensum. Interea tamen in pari causa gentes vi dominii putativi vel possessionis, cujus nulla in contrarium existat memoria, sufficienter se tuentur.

DXCVII.

Quoniam vero negata usucapione prætensiones gentium majorem vim obtinent, ac firmitatem, optandum, sane foret, ut voluntate populorum arbitraria quædam usucapio statueretur, idque eo magis, quod etiam ii, qui usucapionem juri naturali adscribunt, eam inter gentes longe difficilioris esse probationis, quam inter singulos homines haud diffitentur.



C A P U T XX.

**DE OFFICIIS INTER GENTES,
QUÆ UTILITATIS SUNT INNOXIÆ.**

DXCVIII.

De officiis innoxie utilitatis inter gentes ardua est controversia, an ex iustitia vel solum ex æquitate debeantur. Et si enim plana ac facilis est generalis regula in prima parte juris naturalis tradita, ad quam & actiones hominum adplicandæ sunt, scilicet officia adfirmativa imperfectis, negativa perfectis esse accensenda; tamen duæ plerumque nascuntur facti quæstiones, primum an alterius desiderio sola patientia nostra satisfaciat, deinde vero an non hancce patientiam multa, eaque gravia incommoda consequantur. Hæc igitur prius sunt penitus dilucidanda, quam quisquam in iure libertatis naturalis se interpellari conqueratur.

DXCIX.

Nullum sane adparet periculum, si viæ, fluvii, aut portus publici pateant extraneis, veluti studiosis, artificibus, aut mercatoribus, qui tantum transire, aut sibi de aqua dulci aliisque alimentis prospicere, fractasve naves reparare cogitant; quod ipsum & in mercibus nec vetitis nec nocuis, & quarum commercium gens territorii domina sibi non reservat, immo & in milite per manipulos diviso, atque inermi videtur obtinere.

DC.

Quum vero sæpius contingere soleat, ut justa adsit causa recusandi officium, quod postulatur, veluti si contagii vel exploratorum metus sit, aut congruum vectigal non solvatur, hinc petere prius oportet præstationem officii, ut adpareat jure, an injuria denegetur. Quodsi tamen navis reparatio vel alimenta essent necessaria, tum propter statum collisionis etiam gratis & cum detrimento hæ præstationes possent vindicari.

DCI.

DCL.

Atque his potissimum ambagibus involuta est frequens illa quæstio, utrum exercitus, qui vel novas quærit sedes, vel contra injustum hostem movetur, facultatem per alienas regiones transeundi invitis habitatoribus jure adripiat? qui enim armatam multitudinem in suum territorium admittit populus, ei majus tum ab ipsis transeuntibus, tum ab horum adversariis impendet periculum, quam quod datis pignoribus, conducto idoneo præsidio, vel aliis etiam cautelis propulsari posse videatur. Itaque nisi transire volentes omnimodam regioni securitatem præstent, a transitu utpote non innoxio sine injuria arcentur.

DCH.

Neque hisce adversatur, quod ajunt, jus unius alterius metu haud infirmari, dein vias publicas in communione primæva utique permanissè. Jus enim ab utilitate ducitur innoxia, at in nostra specie semper fere aliquod aliorum subest detrimentum; communio autem viarum, quas populus

aperire in suo solo, & propriis sumtibus reficere debeat, vanum est commentum.

DCIII.

Illud autem nunc in propatulo est, perperam injustitiæ accusari populos, qui domo ejectis domicilium, advenis solum desertum ac sterile, peregrinis feminarum inopiâ laborantibus connubia cum suis denegarent; hæc enim officia semper ejus sunt generis, ut rarius sine majori molestia, nunquam nuda patientia præstentur.

DCIV.

Sane si rex regi, & cives concivi filiam negare jure possunt, nulla videtur esse ratio dubitandi, quin eodem etiam jure uti possint gentes, intuitu aliarum gentium, præsertim barbararum. Accedit æqualem fere nasci numerum marium & feminarum; si igitur major harum copia ex regione extraheretur, multi ex propriis subditis sine uxoribus esse deberent. *Dissentit* GROTIUS II. II. 13. 4. & VATTIEL. II. c. IX. §. 112.

DCV.

Et quamquam improba necessitas jus quærendæ habitationis tribuere expulsiis possit, nuptias tamen armata manu expetere eo minus unquam licebit, quo minus eas a singulis hominibus, aut etiam a singulis virorum societatibus iniri absolute est necesse. Sed & ipse matrimoniorum finis exigit, conjuges non violentia & odio, sed precibus atque amore inter se conciliari.

DCVL

Et si vero gentes injustæ non sint, quæ peregrinos secluso statu necessitatis in suum territorium haud recipiunt, tamen contra æquitatis regulas peccari ab iis aliquando posse certum est. At nec inhumanitatis quidem alicujus argui possent, si angustum esset territorium, si a religionis diversitate turbæ metuerentur, si ignava foret multitudo vel infida, quæ abuti beneficio & ipsos antiquos habitatores expellere posset.



C A P U T XXI.

DE CONVENTIS ET SPONSIONIBUS PUBLICIS.

DCVII.

Quemadmodum gentes etiam, quæ opibus, armis & potentia maxime valent, tamen aliarum gentium auxiliis aliquando indigeant, & porro eadem sibi invicem polliceri atque accipere permittantur, fatis, ut arbitror, explicatum est superioribus capitibus; proximum igitur est, ut de variis hisce promissionum acceptarum, seu *conventorum* generibus agamus, quæ quoniam inter populos aut eorum Rectores qua tales fanciuntur, *publica* nominari consueverunt. *Cf. l. 5. D. de pact.*

DCVIII.

Ab hisce vero probe secernere oportet pacta, quæ civis cum cive, aut civis cum populo extero, immo & imperantes inter se ineunt in negotiis privatis, veluti si filia a rege alteri regi despondeat.

deatur. Quamquam & hæc; quatenus quælibet gens civium suorum injurias avertere, & præcavere debet, eatenus ad publica referri posse videantur.

DCIX.

Publicæ illæ conventiones, si ad singularem tantum & transitoriam præstationem tendant, generale *pactionis* nomen retinent, si vero obligationem quamdam durabilem & specialem societatem inter duas vel plures gentes stabiliant, *fæderum* adpellatione continentur.

DCX.

Quoniam pactionum innumeræ prope-modum sunt species, communi illa regula omnes dimetiendæ sunt; nihil scilicet tam congruum esse humanæ justitiæ ac fidei, quam ea; quæ semel placuerunt, servare, ne secus jura in populos rite translata iisdem cum injuria & læsione invitis auferantur.

DCXI.

Fœderum autem summa partitio inducitur, quod alia *simplicem* tantum & naturalem *amicitiam*, alia *arctiorem* quamdam

& arbitrariam *conjunctionem* inter pacificantes inducant. Ac priora quidem, etsi nihil præter id constituent, quod jam juris est naturalis, & hinc infamiam aliquam habere fuerint visa, tamen cum hostibus, & iis, qui peregrinos hostium accensent numero, utiliter sanciri consueverunt.

DCXII.

Posteriora naturalibus officiis aliquid saltem superaddunt, & vel ad commercia, navigationem, transitum, vel ad juris defensionem aut persecutionem, aliaque plurima belli & pacis negotia spectant. v. PUFEND. de J. N. & G. VIII. c. IX. §. 2.

DCXIII.

Uti vero ad fœdera prioris generis, quæ etiam *pudenda* a nonnullis nominantur, referri debet pactum de non lædenda gente, seu *fœdus amicitie*, ita *non pudenda* plene sunt innumera, veluti I. de vectigali pro mercibus non solvendo, vel non ultra certam quantitatem, II. de alterius subditis suis sedibus non recipiendis, III de delinquentibus mutuo extradendis, IV. de arce in
con-

confinio alterius populi non habenda, aut aliis monumentis.

DCXIV.

V. Tum ut aliquod mercium genus genti tantum stipulanti vendatur. VI. Ut mutua sit inter duas gentes successio, seu fœdus confraternitatis. VII. Ut alteri populo in propugnaculis alterius populi præsidium habere liceat pro tuendis finibus VIII. Ut certus equitum, peditum; vel navium numerus ducatur contra communem hostem. IX. Ut res vel personæ captæ soluto certo pretio restituantur. X. Ne iter alterius hosti præbeatur, & quæ sunt reliqua.

DCXV.

Quæ arctioris conjunctionis causa iunguntur fœdera, ea iterum *equalia* sunt, vel *inequalia*. Æqualitas a paribus & æquis utrinque conditionibus, inæqualitas vero aut solum a discrimine præstandorum, aut etiam ab honoris, particulæ libertatis, imperiive civilis imminutione proficiscitur, de quorum altero salva sæpe pristina fœderatorum dignitate, de altero eadem incolumi conveniri nullo modo potest.

DCXVI.

DCXVI.

Quoniam vero inæqualitas præstationum ab inæqualitate contrahentium , & horum inæqualitas physica a morali admodum est diversa , patet , æqualia fœdera etiam a potentiore cum minus potente pangi posse , si ambo scilicet ad æquipollens obstringantur. Contra inæquale foret fœdus , si inæqualis esset præstatio , vel ex parte potentioris , ut si solus nummos , subsidia , milites , naves , aut saltem in majori numero præbere teneretur , vel ex parte minus potentis , si hic tributum pendere cogatur. *PROCOP. B. P. p. 105.*

DCXVII.

Ex parte autem minus digna oritur inæqualitas I. ratione honoris , si fœdere sit comprehensum , ut alter populus alterius populi majestatem comiter conservet. II. Ratione libertatis , si unus mœnia diruere , navigatione abstinere , loco quodam decedere , certam gentem bello non adgredi , aliamve servitutem juris gentium constituisse debet.

DCXVIII.

DCXVIII.

III. Ratione imperii, si pars quædam potentialis majestatis vel ejus exercitium a voluntate vel consensu alterius gentis dependens efficiatur: veluti ne bellum cuiquam facere, vel copias conscribere liceat injussu alterius gentis. *l. 7. §. 1. 8. de capt. & postl. revers. LIV. XXX. 37. DIONYS. Hal. VIII. 15.*

DCXIX.

Porro fœderum quædam *in rem* fieri dicuntur, quædam *in personam*; horum duratio vita paciscentium circumscripta est, illa etiam ad successores pertinent. Quum tamen fœdera omnia tendere debeant ad utilitatem publicam, eorumque jus fluat ex imperio civili, quod non nisi sublata penitus gente exspirat, naturale est, ut fœdera etiam a monarchis nomine totius populi percussa, & realia esse intelligantur, donec vel ex verbis, aut ex causa contrahentium, vel ex natura negotii contrarium adpareat. *GROT. II. XVI. §. 16.*

DCXX.

Ex *verbis* colligitur personale fœdus, si ad dies vitæ principis ineatur, ex *caussa* contrahentium, si militari imperium senior vel peritior fœderatus obtineat, denique ex *natura* negotii, si, ut hoc utar, tutelæ gestio promittatur. Aft nomina tantum pacifcentium fuisse adjecta minime sufficit, quum plerumque persona pacto inferatur, non ut personale pactum fiat, sed ut demonstretur, cum quo pactum initum sit. Nec personale ideo efficitur fœdus, si ad tempus, veluti ad quinquaginta annos, vel ad certum reipublicæ statum fuerit restrictum; siquidem in utraque specie obligatio ad successores transire potest. *v. l. 7. §. 8. D. pact.*

DCXXI.

Ad quamcunque autem classẽ fœdera revocentur, illud apertum est, omnia esse publicarum conventionum species, & porro fidem in iis legitime datam, si *casus* existat *fœderis*, omnino servari oportere. Immo vero quia fœderati non solum præstationes transitorias sibi stipulantur, sed du-

durabilem quamdam societatem, quam incorruptam esse atque inviolatam eo magis interest humani generis, quo magis publicæ vel communi gentium saluti ejusdem abruptio adversatur, ideo fœdera eminentiore quodam modo seu κατ' ἐξοχὴν *sancta* nominari meruerunt.

DCXXII.

Etsi vero ad mutua gentium officia & illud pertineat, ut æquitatis habeatur ratio in fœderibus pangendis, ea tamen, quæ sine errore ac dolo & a consentientibus facta sunt, æqua censentur, licet fuerint inæqualia; plures enim subesse possunt justæ causæ, ob quas ab æqualitate recedatur. Quare nulla tunc competit restitutio prætextu læsionis.

DCXXIII.

Si fœdera in dubitationem adduci contigerit, omnium primo verba eorum rite perspicere oportet; uti vero in ceteris pactis, ita & in fœderibus ea tenenda est verborum significatio, quam recta interpretatio suggerit, & ideo fœdus, ne populo bellum incio altero facere liceat, necessariam

riam defensionem haud excludit. Quodsi bellum contra alterius socios susceptum non iri promittatur, præsentes intelliguntur socii, non futuri. GROTI. II. XVI. 13.

DCXXIV.

Et quemadmodum alia pacta, ita fœdera quoque non expresse modo, sed & tacite fieri possunt; nam & in his quædam natura insunt, quæ impleri justum est, licet haud fuerint expressa. Hinc præstare promissa auxilia nequit, qui domi suæ hostem habet. Ex eadem causa, qui receptus est a gente, tacite promittit, se adversus ejus societatem nihil esse facturum, & petens colloquium hoc ipso etiam pollicetur, id collocutoribus innoxium fore.

DCXXV.

Quum officia de non lædendis aliis, sed iis adjuvandis ipsa nitantur naturæ lege omnibus populis communi, sine ullo religionis discrimine, consequens est, primum, ut & cum gentibus a veri Dei cultu alienis fœdera non modo nudæ amicitiae & commerciorum, sed etiam bellica propter salutem publicam naturaliter pangere liceat, deinde

dein ut si hæc fuerit rite facta, non minus sint implenda; quam contractus, qui a privatis Christianis hominibus cum Saraceno vel Judæo inirentur.

DCXXVI.

Qua in re quoniam nihil immutatum reperitur in lege divina positiva, quæ ejusmodi fœderibus plerumque inesse solent vitia, ab aliis externis causis repetenda sunt. v. GEN. XIV. 13. & XXXI. 44. I. MACC. c. 8. & 12. II. REG. XXVII. 2. III. REG. 12. cf. GROT. II. XV. §. 8. 11.

DCXXVII.

Concurrunt aliquando plura fœdera, potissimum bellica, atque inter se confligunt, quocirca quodnam præferri debeat, dubitatur. Sciendum igitur est, priorem tempore fœderatum, nisi ejus causa aperte injusta sit, jure esse potiolem, siquidem jus ei ex fœdere quæsitum per pactum cum secundo initum auferri nequit. Qui tamen fœdus init secundum, & prius ei contrarium dissimulat, dolo malo agit, omnemque adeo indemnitate læso præstare tenebitur. v. LIV. VII. 31.

DCXXVIII.

Si autem nulli faveat temporis prærogativa, tum vel arma moventur in extraneum, & auxilia utrique fœderato, eadem simul imploranti pro rata sunt præstanda; vel vero ipsi fœderati invicem se bello laceſſunt, & in cauſſis dubiis, quales plerumque præſumuntur; neutri fas erit milite ſuccurrere, ne ſecus copię ejusdem gentis contra primum pactum unionis inter ſe committantur.

DCXXIX.

Ne autem populi facile a ſuis conventis diſcedant, cavetur tam modis communibus, quam publicarum pactionum propriis. Quoniam modi communes, ſcilicet *adſeveratio*, *jusjurandum*, *pignus*, & *fidejuffio*, alibi ſunt expoſiti, eos quiſque nullo negotio huc poteſt adplicare.

DCXXX.

Inter modos proprios vero primum referuntur *obſides*, ſeu perſonæ conſenſu unius Imperantis in alterum translatae, ut apud eum *obſideant*; rerum præſtandarum quaſi pignus; quod quum vitam innocentis adſi-

cere

cere nequeat, evidens est, illud non nisi in libertate obsidis, si eum dans fidem fefellerit, obtinere. *cf.* LIV. XXVIII. 34. GROTI. III. XI. 18. SCHILTER. *Comment. de jure obsid.*

DCXXXI.

Ex data definitione colligitur, veri nominis obsides non dari nisi a republica, tam *voluntarios*, quam *invitos* etiam feminas; *) quæ vero & armis in securitatem contributionum abducuntur, personas mancipii magis quam obsidis jure censer. Ceterum quoniam peregrini non nisi pro eo tempore, quo commorantur in territorio alieno, se subjiciunt ejusdem Imperanti, nec ad aliud se obligant, quam ad non turbendam securitatem illius territorii, hi etiam obsides dari invitæ non poterunt.

*) LIVIUS II. 13.

DCXXXII.

Itaque etsi obses tamquam accessio obligationis honesta accipientis custodia jure contineatur, e qua porro nec ipsi evadere, nec fugientem recipere reipublicæ liceat, attamen is statim servus non fit, atque adeo, & res suas, & actiones ceteras li-

beras pro arbitrio moderatur. Cogere enim illum velle ad præstandas operas idem foret, ac creditorem re oppignorata uti. Quamprimum vero gentis, a qua traditus est obses, adparuerit perfidia, hic etiam talis esse definit, & in captivitatem ac servitutem redigitur sine injuria.

DCXXXIII.

Putaverat quidem GROTIUS. *), tunc tantum non licere obsidi fugere, si ab initio aut postea, quo laxius haberetur, fidem dederit. Sed pauci ejus opinioni subscripsere; siquidem Imperans voluit, potuitque civem suum generatim obligare, ne aufugeret. Illud vero Imperatore commodo dignum fuit rescriptum: *Obsidum bona sicuti captivorum omnimodo in fiscum esse cogenda*; hæc enim præter libertatem, tunc tantum debentur pro eo, quod interest, quando obses fidejussor simul vel expromissor fuit. L. 31. D. de jur. fisc.

*) III. XX. 54.

DCXXXIV.

Ex quo non difficile est intelligere, quatenus obside mortuo ad hæredes ejus obli-

obligatio transeat. An vero obses, si fiat successor ejus, qui dedit, præstita alia cautione dimittendus sit, id ex circumstantiis singularibus determinari debet. *L. 15. D. de capt. & postl. revers. cf. PUFEND. VIII. c. VIII. §. 6. & VATTIL. II. c. XVI. §. 2.*

DCXXXV.

Porro ex dictis efficitur, ut, si causa, ob quam datus fuerat obses, sit secuta, vel etiam is, cujus ad tempus redimendi gratia venerat, moriatur, ipse soluto ære alieno a se contracto discedere omnino permittendus sit. Sane injustum foret, obsidem etiam sine consensu suo, & ita alterum ex solo facto alterius obligari, aut eum in unam causam datum in aliam retineri posse.

DCXXXVI.

Nec quidquam in contrarium probat paritas pignoris, quoniam denegata illius restitutio soli noceret debitori, aut incommoda esset nova hæc detentio obsidi, qui eatenus fidejussori potius comparandus est. Quid quod id nimis cavillationibus aperiret viam? Quodsi tamen contraria opinio nonnullis præplaceret, certe civi ita de-

tento redemptio, & plena indemnitas, a suo Imperante indistinctim deberetur. *cf. VATTEL. II. c. XVI. §. 249.*

DCXXXVII.

Firmantur quoque pactiones publicæ promissione adjectitia, *guarantiam* vocant, uni vel utrique contrahentium ab extraneo populo potissimum facta fidem datam servatum iri; qui enim hoc modo se in conventionem interponit, vulgo *guarandus*, is tacitum simul init fœdus de ope illi ferenda, qui contra pacta læderetur, adversus injuriæ auctorem.

DCXXXVIII.

Illud autem ex hujus fœderis natura intelligitur, non deberi auxilium, nisi imploretur ab indigente, nec in alia causa, quam de qua conventum est, nec contra alias personas, quibus fœderati nequeunt intercedere, ne jure suo utantur. Atque hoc est, quod ajunt *guarantiam* non intelligi præstitam, nisi salvo jure tertii, resque inter alios actas aliis non præjudicare.

DCXXXIX.

DCXXXIX.

Differt tamen guarantia a fœdere defensivo, illa enim proprie alteri principali conventioni adjicitur, hoc etiam per se iniri & intelligi potest; differt etiam a fidejussione, qua gens in subsidium se soluturam, quod altera debet, pollicetur. Commune vero id est omnibus hisce conventis, quod & eo inconsulto, de cujus fide metuitur, celebrari possint. *cf. J. L. WALDNER de Freudenstein diss. de firmam. convent. publ. Gießæ 1753.*

DCLXI.

Obligationes & jura fœderatorum cessare generatim remissione, mutuo dissensu, lapsu temporis, re jam peracta, atque ob alterius perfidiam, ex regulis alibi traditis abunde liquet. Speciatim porro definunt fœdera personalia interitu personæ, realia populo penitus extincto. Perperam vero a mutatione rectoris civitatis formæ regiminis, vel diverso imperii modo introducto ad dissolutionem fœderis duceretur conclusio, nisi voluntas paci-

scientiam ad certum reipublicæ statum adligata fuisse doceatur. *v. LIV. V. c. I.*

DCXLI.

Remittere obligationem creditor potest debitori, non autem tertius, nisi jure imperii, a quo quum gentes sint liberæ, foederatus quidem ipse recte juri suo renunciat, non pro eodem alius. Et quum in ipso foedere satis sit efficaciam, durat illud etiam sine jurejurando, quod in foro naturali ii tantum relaxant, quorum est vinculum justitiæ remittere.

DCXLII.

Regi a tota natione expulso deberi auxilia, quæ ipse sibi vel ejus antecessores in hunc eventum fuerant stipulati, non autem ea, quæ tantum contra externos hostes foederati promiserant, extra dubitationem est; aut si neutrum horum fuerit dictum, an rex exul suppetias a foederatis gentibus jure perfecto implorare valeat, disputatur. Adfirmant nonnulli, quia jus regni manet penes ejectum, utcumque possessionem amiserit. *Vid. Grot. II. XVI. 17.*

DCXLIII.

DCXLIII.

Sed verior videtur negantium sententia ; qui enim genti opem ferre pollicitus est , is quidem in id consensit , ut vires suas cum viribus illius conjungeret , non vero ut contra easdem omnes aut majorem partem dimicaret. Quare ratio prius obiecta id tantum evincit , fœdus non prodesse rebellî populo , aut usurpatori. *cf.* LIV. XXXIV. 32.

DCXLIV.

Quum vero expulsio rectoris civitatis semper illicita esse præsumatur , utique a gente , quæ eidem succurrit , rebellibus inferri injuriam perperam arbitratur VATTÉLIUS *). Urget quidem COCCÉJUS , **) fœdus initum esse cum capite & membris , igitur regem adjuvari non posse magis , quam subditos , quod neque id facere liceat , si duo eodem tempore fœderati inter se decertant. Enimvero præterquam quod Majestas , cui jus fœderum competit , non in subditis est , sed in Monarcha , etiam exem-

plum de foederatis fallit, si unius causa praesumatur injusta.

*) II. c. XII. §. 196.

**) Ad Grot l. c.

DCXLV.

Distant a foederibus *sponsiones* publicæ; quæ sunt conventa a ministris civitatis de rebus ad eandem pertinentibus sine ullo mandato Imperantis & ultra fines præpositionis celebrata. Quoniam Magistratus non majori gaudent potestate, quam ipsis fuit concessa, nec quisquam alterum invitum pactis obligare potest in aprico est, Imperantem ex hujusmodi sponsione, nisi expressa, vel tacita ejus accesserit ratihabitio, ad nihil prorsus teneri, nec ad id, quod interest, nec ad rem reponendam in eum statum, in quo erat ante sponsionem. Attamen lucrum, quod spe ratihabitionis ex re alterius perceptum est, restitui justitia naturalis exigit. cf. GROTI. II. XV. §. 16. n. 1. 2.

DCXLVI.

Rem saltem in pristinum statum esse restituendam plures arbitrantur, ast hi justitiam confundunt cum æquitate, cujus sane

ne immemores esse videntur gentes, quæ sponfionem non iniquam improbant. ci tamen hoc acciderit, imputare sibi debent, qui occasionem rei bene gerendæ imprudentes incautique prætermittunt. *Cf. LIV. IX. 9. SALLUST. Jug. c. 42. seqq. PUFEND. VIII. IX. §. 12.*

DCXLVII.

Cui potestas aliqua data est, ei quoque concessa videntur illa, sine quibus potestas explicari non potest: quare quæ geruntur, intra fines mandati saltem taciti, sponfiones non sunt, sed conventiones publicæ. Contra si Imperans conventionem faceret legibus fundamentalibus adversam, quoniam ea sine ratihabitione populi esset invalida, ac nullius roboris, naturam sponfionis indueret. *cf. WALTHER diss. de contract. summorum Imperant. Giessæ 1728.*

DCXLVIII.

Quanta vero sit sponforum obligatio, generatim definiri nequit, sed ex diverso conventionis modo declarari debet. Qui enim tantummodo factum incertum, & ab alie-

aliena voluntate pendens promiserunt stipulantibus ejus rei conscis, omni adhibita industria, ne improbetur sponso, fidem suam videntur liberasse. At si rem ratam habitum iri diserte pollicentur, ac forte præferunt facultatem contrahendi publico nomine, ii, nisi certa pactitia pœna defungi possint, omne damnum culpa, dolove datum, vel proprio ære, vel si hoc non sufficiat, etiam libertate luere cogendi sunt. *)

*) LIV. IX. 5. & IO. XXI. 18. & *supplem. lib. LV. 16.* VALER. MAX. IV. c. 8. n. I. cf. VATTEL. II. XIV. §. 2. II.

CAPUT XXII.

DE LEGATIONIBUS.

DCXLIX.

Quoties populi liberi vel eorum rectores communicare inter se debent, debere autem sæpissime de fœderibus, commercio, aliisque humanitatis & justitiæ officiis supra vidimus, Ministro *internuncio* ple-

plerumque agere coguntur. Sane litteris conficere negotia res est plena ambagibus; colloquia vero cum singulis instituere, si inter ipsos principes non minoribus laborat incommodis, certe inter cives universos plane repugnat.

DCL.

Personæ, quibus tamquam subditis gentes sua negotia cum aliis gentibus coram & solenniter gerenda committunt, *Legati* vel *Oratores* vocantur. Jura igitur & obligationes illorum, qui legatione seu munere legati funguntur, ex duplici officio dignoscenda sunt, nimirum procuratoris & ministri publici.

DCLI.

Ex quo recte arguitur, I. legatorum nomine haud cenferi, qui subditi nullo modo sunt ejus gentis, cujus agunt internuncios, nec qui subditi quidem sunt, & negotia gentis externa tractant, sed in territorio, nec qui extra territorium res agunt suæ gentis, sed sine solenni mandato; II. missionem in legatis non semper requiri, siquidem nonnunquam ii eliguntur, qui degunt in
terri-

territorio gentis, cum qua tractari jubentur; III. feminas legationis haud esse incapaces.

DCLII.

Tam procurator quam minister publicus negotia sibi commissa non proprio, sed populi committentis jure & nomine administrant, illius sustinent personam, hanc porro in rebus suæ curæ demandatis repræsentant, atque ista repræsentationis qualitas est, quæ legati *characterem*, quem vocant *repræsentatitium*, constituit. *Vid Cic. Philip. VIII. c. 8.*

DCLIII.

Est autem hæc vis repræsentandi alia *generalis*, & communis omnibus legatis, quæ nimirum a ratione solius negotii, alia *specialis* & arbitraria, quæ simul a ratione dignitatis mittentis, missi & mittendi modo derivatur. Variat igitur hæc æstimatio pro diversitate negotiorum, formulæ missionis & populorum moribus; hincque variis externis honorum significationibus insignis est.

DCLIV.

DCLIV.

Ex ea, quam dedimus, legati definitione non obscurum esse arbitramur, jure legationum illos tantum inter se gaudere, qui summæ potestatis sunt compotes, sive regna sint, sive respublicæ, sive proceres imperii electivi durante interregno, immo & qui dispari junguntur fœdere vel vinculo feudali. Quando vero in bellis civilibus duo inter se decertant regni æmuli, tum jus legationis vela possessore, quem in re dubia sequi debent gentes, vel diviso in duas partes populo, quoniam duæ pro tempore fiunt respublicæ, ab utraque factione separatim exercetur.

DCLV.

Unde jam facili negotio cognosci poterit, qua ratione differant a legatis veri nominis *agentes*, *deputati*, & *commissarii*; illi enim negotia imperii vel civium privata, intra vel extra civitatem procurant, isti vero a subditis ad Imperantem, & hi ab Imperante ad subditos mittuntur. v. Livi^{us} VI. 7.

DCLVI.

DCLVI.

Ne autem cuique personam legati per fraudem induere liceat, oportet oratores certa quadam muniri *tessera*, quæ testimonium sit publicæ fidei, unde Imperans, ad quem venit legatio, cognoscere possit, quis, a quo, in quam rem, quonam denique charactere & potestate legatus mittatur; quæ tesserae, quoniam instrumentorum tabulis seu codicillis publicis continentur, etiam *literæ credentiales* audiunt. Ab his vero secernenda sunt illa scripta *mandata*, sive manifesta sint, sive arcana, quorum scopus est, legatos idoneis consiliis & legibus ad negotia gerenda instruere.

DCLVII.

Quum tamen nemo magis alterius facto vel contractu obligetur, nisi quatenus se obligare vel ipse declaraverit: ideo si fines mandati in literis credentialibus expressos legatus egrediatur, civitatem mittentem non obligat. Aliud foret, si conventio secretæ tantum instructioni repugnet.

DCLVIII.

DCLVIII.

His præstructis proum est intelligere varias legatorum, differentias. Qui enim personam & dignitatem repræsentant mit-
tentis cum charactere speciali, ii legati *primi ordinis*, reliqui *secundi ordinis* dicun-
tur. Porro ambo vel *ordinarii* sunt, *adsidui*,
seu perpetui, si animo residendi apud gen-
tem veniant, & rebus variis obvenientibus
adhibeantur, vel *extraordinarii*, tempora-
les, si unius potissimum negotii gestio,
veluti celebratio nuptiarum, gratulatio, illis
fit commissa. Denique vel cum plena mit-
tuntur potestate *plenipotentarii*, vel sine il-
la *formularii* dicti; his tractare tantum, il-
lis etiam concludere sub conditione, si ra-
tum habeatur, licet. *Vid. CANZIUS di-*
scip. mor. §. 3415.

DCLIX.

Quoniam verò legatorum est, vel cum
Imperante, ad quem mittuntur, vel cum
primariis ejus ministris tractare negotia, fa-
cile patet, cur huic muneri præsertim cum
charactere speciali illi potissimum sint ad-
movendi, qui dignitate eminent inter suos,

ne secus naturali utriusque gentis æqualitati detrahi aliud videatur. WOLF. *J. G. §. 1050.*

DCLX.

Is est, vel esse debet omnibus, qui legatos mittunt, propositus finis, vel læsionem illatam aut inferendam avertere, vel alterum populum sanctiore quodam amicitiae & societatis gradu sibi devincere; igitur legationis inauditæ rejectio nunc justitiæ stricte tali, nunc tantum æquitati repugnat,

DCLXI.

Ast neutrius officii immemor esset gens, quæ legatos cum charactere speciali & rei gerendæ non necessario, vel ab hostibus missos dicis caussa, vel sibi minus gratos, eoque indignos munere, vel in rem publicam periculosos, vel denique honestis conditionibus subscribere nolentes aditu prohiberent. Quid! quod etiam lubenter olim receptos, cum eisdem caussis territorio amovere, tum re jam peracta comiter dimittere licet? qui enim hodie invaluerunt legati adfidui, quoniam continua non sunt negotia, moribus & decoro gentium

tium arbitrario unice debentur. *cf.* GROTII. II. XVIII. §. 3.

DCLXII.

Atque hoc pacto adversas sibi multorum sententias conciliari posse arbitramur. Neque enim admissio legati semper est voluntatis, ut docet GUNDLINGIUS *), nec semper necessitatis, quod DARIUSIO **) visum est. Scilicet a cujusvis pendet arbitrio, alterum domo sua recipere, cum eo colloqui, deliberare, pacisci; at sine injuria impediri nequeunt, ne causam suam exponant, qui agunt de avertenda læsione, veluti si bona naufragio amissa quærunt, subditos fugitivos persequuntur, de re dubia transigere cupiunt, vel rem repetunt ex fœdere.

*) *J. N. c.* XXXVI. §. 169.

**) *Jurispr. Un.* §. 273.

DCLXIII.

Non ergo dicas cum GUNDLINGIO *), uti nemo cogitur, ut legatum mittat, ita nec quempiam obstringi, ut accipiat; debitum enim exigere est meræ facultatis, non vero debitum solvere. Quare in dubio

legati saltem in finibus territorii non jure gentium voluntario, ut putat GROTIUS**), sed jure gentium naturali erunt audiendi. LIVIUS XXI. 10. XXX. 26.

*) *loc. c.*

**) II. XVIII. §. 1.

DCLXIV.

Commeatus est *facultas alicui facta, ut ad locum certum ire, & inde redire tuto possit* *). Nemo itaque dubitaverit, quin quod juris vinculum gentes tenet in admissione legatorum, illud etiam in concedendo commeatu easdem obstringat. An autem & quatenus legatis per alterius populi territorium iter facere volentibus liber ac securus transitus naturaliter debeatur, vel an semper a gentis arbitrio & pacto id juris repetendum sit, hoc traditæ supra de officiis innoxie utilitatis regulæ docebunt.

*) *Vid. FESTUS voc. remeare.*

DCLXV.

Quemadmodum dato commeatu populus pleniorē facultatem suam ingrediendi territorium indulget legato, ita acceptis
li-

literis credentialibus jus quoddam fir-
mius personam agendi publicam, suamque
civitatem repræsentandi eidem impertitur;
tunc porro legatus non modo desideria suæ
gentis exponere, ejus nomine promittere,
acceptare, atque adeo ad mandati formu-
lam publica pangere conventa, sed etiam
ea omnia facere posse credendus est, sine
quibus delato sibi muneri commode præes-
se non liceret. Caveant itaque summæ
potestates, ne hancce legatorum dignita-
tem & jura vel infringant ipsæ, vel a suis
subditis infringi patiantur.

DCLXVI.

Ast si orator sine literis commeatus al-
terius ingreditur territorium, jure utitur
solummodo privati peregrini; non ergo pro-
tinus sufficerent literæ credentiales, quibus
alterius gentis subditi fidem habere non
tenentur. Quare si more privati quis ab
hoste veniat, vel ad hostem mittatur, illum
comprehendi posse minime est dubitandum.

DCLXVII.

Quo eminentiora vero legatis compe-
tunt jura, eo gravior quoque illorum est

violatio. Præterquam quod enim cuilibet homini jus securitatis lege naturali ubique terrarum debeat, sunt legati non modo subditi, sed etiam mandatarii alterius gentis, tum summæ potestatis, cujus publica negotia administrant, effigies.

DCLXVIII.

Quamobrem quæ ipsis inferuntur læsiones, non possunt non in ipsam Imperantis civilis majestatem redundare. Sed etiam hujusmodi facinora arctissimum laxant humanæ societatis vinculum, quod nusquam fieri omnium interest populorum; & hinc mirum non est, *sanctos* semper ac inviolabiles habitos esse legatos, quos ab injuria jus gentium tutos præstat, vindicatque.

DCLXIX.

Ex quo illud jam manifesto colligitur, sanctitatem legatorum non modo gentium moribus, sive hominum præsidio munitam, sed etiam lege naturali, seu divino jure vallatam esse, quod præsidium nec ipsis etiam hostium legatis denegatur, si semel sunt admissi. *Cic. de arusp. resp. c. XVI. cf. l. fin. D. de legation.*

DCLXX.

DCLXX.

Violatur autem sanctitas hæc legatis competens non solum dictis factisve læsionem inferentibus, verum etiam solo neglectu, si nimirum cum honore aliis ministris exhiberi solito non recipiantur. Rector enim civitatis alterum, cujus imaginem repræsentat orator, ut sibi æqualem spectare tenetur. *cf. II. Reg. X.*

DCLXXI.

Equidem majorem esse obligationem admittentis legatum, ne eum violet, quam illorum, per quorum terras tantum transit, non est dubitandum; attamen & gentibus, quæ literas dederunt comiteatus, immo & aliis, quæ legatum norunt Imperantis non hostis, gravius imputatur læsio, quam si legatum esse ignorarent. Atque hoc sensu character legati ubique videtur obtinere. *cf. GROTI. II. XVIII. §. V.*

DCLXXII.

Et si hanc legatorum sanctitatem nemo jam negare audeat, acriter tamen de eorum independentia in utramque partem & rationibus & exemplis disputatur. Sed ve-

rior nobis videtur eorum sententia, qui legatum ab imperio & jurisdictione ejus, apud quem degit, pronunciant penitus immunem.

DCLXXIII.

Primum enim oratores, proprii Imperantis sunt ministri, ab hujus nutu pendent, eique omnium actionum suarum rationem reddere tenentur; dein gentem nullius arbitrio subjectam & cuique alteri æqualem durante legatione repræsentant; denique non ut peregrini privati, sed ut personæ publicæ, quæ cum extraneis in statu naturali vivunt, alienum ingrediuntur territorium. Nefas igitur foret, rerum privatarum obtentu eos in negotiis publicis gerendis perturbare.

DCLXXIV.

Sunt, qui legatorum fori privilegium restringunt ad usum & scopum legationum, ceteros vero privatos actus jurisdictioni loci subjiciunt, tam civili, quam criminali, quia, ut ajunt, negotia legato demandata nihilominus perfici possint. *) Enimvero necessariam non esse omnimodam immunitatem

tem ad legationis essentiam facile largimur, at si nulla facta sit exceptio, eam per se inesse omnino statuendum est.

*) COCCEJUS *ad Grot. II. XVIII. 4* WOLFIUS. *J. G. §. 1059.*

DCLXXV.

Uti enim peregrinus privatus non nisi sub lege subjectionis admitti præsumitur, ita pro legato, qui etiam in loca transitus imaginem Imperantis æqualis refert, contraria pugnat præsumtio, ut quamvis sit in territorio, tamen sub territorio non esse censeatur, quæ legati conditio *extraterritorialitas* vulgo audit, *ne ab officio suscepto legationis avocetur, & ne impediatur legatio.**) Quod ipsum etiam gentium moribus comprobatum est, quamvis multi veteres interpretes, legibus romanis, quæ de legatis urbium municipalium loquuntur, sint decepti.**) *cf. BYNKERSH. de foro legat. c. VI. seq.*

*) *L. 24. §. 2. & l. 26. D. de Jud.*

**) *L. 22. & l. 25. eod.*

DCLXXVI.

Ne tamen modo adserta independen-
tia in perniciem civitatis, in qua degunt,

legati abutantur, & sub hac tanquam umbra impunes deliteſcant, ſufficientia adhuc lege naturali prodita ſunt remedia, quibus æqualis contra æqualem jura ſua perfequatur. Scilicet læſione jam illata, aut contracto ære alieno, legati nunc urbe & finibus facere jubentur, nunc coram proprio conveniuntur Imperante, qui ſi juſtitiam adminiſtrare recuſaret, ea adhibenda eſſent remedia, quæ læſo in lædentem naturali jure competunt*).

* LIV. V. 36. GROTI. II. 18. §. 4. WICQUEFORT. in *Libro L'Ambaſſadeur. l. I. ſect. XXVII. ſeqq.* VATTTEL. l. IV. c. 7 §. 94. ſeqq.

DCLXXVII.

Atque in hoc quidem melior videtur eſſe legati conditio, quam ipſius Imperantis; hunc enim in læſione deprehenſum, quum caret ſuperiore, cui reddat rationem ſuarum actionum, meritasque perſolvat pœnas, remittere haud eſt neceſſe, ſed ſtatim ad præſtandam debitam ſatisfactionem jure compelli poteſt.

DCLXXIV

DCLXXVIII.

Verum si læsio a legatis nulla illata sit, sed inferenda justis ex causis metuatur, tum periculi avertendi gratia, publica tenentur custodia, & interrogationibus subjiuntur. Quod si in vim armatam sese efferat eorum audacia, hæc etiam morte adgressoris non per modum judicii, sed per modum necessariæ defensionis cohibetur. *Vid. GROT. WICQUEFORT. & VATTEL. ll. cc.*

DCLXXIX.

Sed etiam juris æqualitati, ut & aliis favoribus pro se introductis renunciare gentes possunt. Quare si sub iis tantum conditionibus admitti dicatur orator, ut vel criminali, vel civili, vel etiam utrique foro territorii, ad quod accedit, subjiatur, atque in id consentiat gens mittens, nemini est obscurum, naturalem illam, & subintellectam immunitatem restringi aut omnino cessare posse. Nec ideo tollitur legationis essentia, quæ in eo saltem consistit, ut possint gentes sua desideria sibi invicem tuto exponere.

DCLXXX.

DCLXXX.

Porro restricta censetur legati conditio, si subditus sit loci, in quo legationem obit, quum non sit in ejus arbitrio priorem conditionem exuere; aut si consensu suæ gentis munus quoddam in eo territorio, in quo est legatus, susceperit. Perperam vero huc referunt nonnulli jus talionis, seu paris vindictæ, hanc enim, supra traditum est, fere semper legi naturali repugnare. *cf.* BYNKERSH. *l. c. cap. XI. & XXIII.* GROTI. *l. c. §. VII.* VALER. MAX. *l. VI. c. 6. §. 2.*

DCLXXXI.

Quum admissio legato ea omnia concessa intelligantur, quæ ad finem sui muneris obtinendum requiruntur, per se patet: ea, quæ de sanctitate & immunitate legatorum dicta sunt, ad *comites* quoque, *uxorem*, *liberos*, *scribas*, *famulos*, *cursores*, *veredarios*, tum ad *vasa* seu *suppellectilem*, nec non ad *ædes*, quas inhabitat, & *currus*, quibus utitur, pertinere. Hæc enim omnia communi veniunt legationis nomine, donec legato vel personas access-

fo-

forias missas facere, vel res alienare visum fuerit. *v. Liv. l. 24. l. 7. D. ad Leg. Jul. de vi publ.*

DCLXXXII.

Itaque comites legati domestico sub-
sunt imperio, a quo coerceri, non tamen
pœna capitali adfici possunt, si delinquant,
sed vel vincti mittuntur in patriam, vel
judici loci extraduntur, ut ferat ipse sen-
tentiam, aut latam executioni mandet.
Contra secretarius & scribæ legationis,
quum officiales sint mittentis, non jam fa-
milix, sed legati jure censentur.

DCLXXXIII.

Quoniam vero solutio vectigalium non
tollit æqualitatem, quæ inter gentes obti-
net, ea etiam a legato præstari debent,
si exigantur; hæc enim ipsa exactio osten-
dit, eum non nisi sub hac conditione ad-
mitti. Ex eadem quoque causa merces
vetitas vel periculosas introducere ei mi-
nime est permissum.

DCLXXXIV.

Quod ad bona legati mobilia attinet,
ea pignoris causa, aut ad solutionem debiti
capi

capi non possunt, ut omnis vis absit a legato, & plena securitate fruatur. Quod si æs alienum solvere detrectat, ea remedia usurpantur, quæ adversus debitores extra territorium positos usurpari solent. *Vid. GROTI. l. c. §. IX.*

DCLXXXV.

At bona immobilia, quum jam antea juri territorii fuerint subjecta, veniente legato naturam suam haud immutant. Hinc quamvis legatus proprias ædes inhabitans tutum in iis habeat præsidium, tributa tamen eum pendere non minus oportet, quam si alibi haberet domicilium.

DCLXXXVI.

Potest etiam legatus in suis ædibus religionem suam exercere, sed perfugium dare, & asylum delinquentibus idem foret, ac iisdem delicti gratiam facere, & se alieno regimini immiscere. Nulla igitur gens talem tenetur perferre injuriam. Quare ad avertendum publicum periculum tentatis nequidquam mediis lenioribus, subditos, ni dedantur, ex ædibus legati extrahere licebit.

DCLXXXVII.

DCLXXXVII.

Finitur legatio, si negotium fuerit impletum, si avocetur legatus a suo Imperante, vel ab eo, ad quem missus est, dimittatur. Non vero si ipse muneri suo renunciaverit, quum non nudus is sit mandatarius, sed simul officialis publicus. Finitur porro morte vel legati, vel quodammodo Rectoris alterutrius civitatis. Et si enim interea aut populus, aut successor in locum defuncti veniant, tamen legatio novis literis credentialibus muniri & instaurari debet. Ædes autem etiam mortuo legato servant immunitatem, donec scripturæ & vasa legationis sint in tuto.

DCLXXXVIII.

Si bellum inter ambas gentes ante ori contigerit, quam legati discesserint, nihilominus illi sunt inviolabiles, eorumque læsio *hostium jus*, & *sacra legationis*, & *fas gentium rumperet* *). Ceterum privilegia legatorum non ante expirant, quam dum in patriam sunt reversi.

*) TACIT. *Ann.* I. 42.

DCLXXXIX.

DCLXXXIX.

Atque hæc de officiis legatorum in jure gentium naturali fundatis, dixisse sufficiat; quod enim attinet legatorum numerum, ingressum, audientiam, primam salutationem, stipendia, titulos, gratuita hospitia, ceremonias, munuscula, rationem tractandi negotia, lites de principe sede, & alia hujusmodi, hæc omnia ex pactis & moribus populorum arbitrariis repetenda sunt. Idcirco plura de his commemorare nostri non est instituti. *cf. MOSER Jus. gent. temp. pac. Lib. III. c. 1. sqq.*

CAPUT XXIII.

DE EO, QUOD JUSTUM EST INTER GENTES CIRCA BELLII INITIA.

DCXC.

De bello ac variis illius divisionibus egimus generatim in jurisprudentia simpliciter naturali; reliquum est, ut traditas ibi regulas ex natura & notione gentis latius

tius evolvamus. Qua in re nova statim sese offert belli partitio in *publicum*, *privatum*; & *mixtum*; publicum est, quod inter civitates, *privatum*, quod inter privatos propria auctoritate geritur, *mixtum*, quod ex una parte publicum est, ex altera privatum.

DCXCI.

Et quia in societate civili jus decernendi de bello non ad singulos cives pertinet, sed ad supremam potestatem, ideo ratione formæ bellum publicum apud probos auctores *justum* quoque, *privatum* vero *injustum* nuncupatur.

DCXCII.

Quamobrem etiam romani hostem in sensu stricto eum vocabant, qui habet *republicam*, *curiam*, *ævarium*, *consensum*, & *concordiam civium*, & *rationem aliquam*, si res ita tulerit, *pacis* & *fœderis*. *) Reliqui vero, qui arma arripiunt, nisi necessaria subsit defensio, vel *rebeldes*, vel *latrones* nominantur. Quorsum etiam magistratus, qui sine concessione Imperantis saltem tacita, ac milites,

Y

qui

qui sine consensu præfectorum exercent hostilitates, referendi sunt.

*) CICERO, *Philipp. IV. c. 6. l. 19. §. 2. l. 21. §. 1. l. 24. D. de captiv. l. 118. de V. S.*

DCXCIII.

Sed alio significato etiam bella publica nunc iustis nunc iniustis accensentur, prout vel cum legitima ratione, vel sine illa sunt suscepta. Quum igitur iustifica bellandi causa sit sola læsio aliter indeclinabilis, siue eadem immineat, siue actu inferatur, consequens est: ut nec gentes bellum iustum gerere aliter censeantur, quam si illud remedium evaserit necessarium, quo securitatem, indemnitatem, aut defensionem iurium vel ad universos simul, vel ad singulos saltem cives pertinentium consequantur. Quare si nulla inferatur populo iniuria, aut hæc aliter possit evitari, bellum fiet ratione causæ seu finis iniustum.

DCXCIV.

Ex quo prono fluit alveo, duo potissimum sub belli initiis in conspectu esse habenda, primo an vera subsit læsio, dein an non alio modo possit declinari: ac por-

ro ad finem belli justum spectant ea tantum, quæ *defendi, repetique & ulcisci fas sit*, *). Inde justitia vel injustitia belli, tam defensivi, quam offensivi, sive hoc *reparativum* fuerit, sive *punitivum*, abunde colligitur. Ceterum cognitis causis belli justificis, quænam sint injustæ, contraria ratione facile concludi potest.

*) LIVIUS V. 49.

DCXCV.

Inde quoque est, quod bellum justum esse possit *ratione formæ*, sed *ratione causæ* injustum, & vicissim; immo in prima acceptione plerumque utrinque est justum, nunquam in secunda, jura enim non dari sibi invicem repugnantia alibi docuimus. *) Sed & bella justa in intuitu causæ sæpe sunt iniqua, & *hæmus aureus piscantibus*. AUR. VICT. de mor. Imper. c. I. cf. GROTIUS II. c. 24. & MONTESQUIEU *essrit des loix* l. X. c. 2.

*) *Dissentit DARIUS Observ J. N. LXVIII.*

DCXCVI.

Quamquam gentes, quæ pietatem, philautiam, & humanitatem neglectui habent, etiam a justitia strictius accepta facillime recedant, illud tamen satis cuique perspectum est, actiones impias, inhonestas, vel iniquas ab actionibus injustis, five læsionibus proprie discrepare. Quamobrem nec gentis idololatria, superstitio, hypocrisis, aliaque in Deum crimina, nec ejusdem stupiditas, aut rei familiaris incuria, nec denique summa in adjuvandis aliis torpedo legitimæ sunt bellorum causæ. Atque adeo falluntur summopere illi, qui hoc sensu bella statuunt punitiva.

DCXCVII.

Equidem bellum ad pœnam licere docet GROTIUS *), si delicta manifestis naturæ legibus adversentur, quem sequitur DARIUSIUS **) ex illa ratione, quod obligatio alios perficiendi jus uet ad media ad hunc finem ducentia. Enimvero primo media officiis contraria esse non debent, dein
fal-

falsum est, religionem & humanitatem armis promoveri.

*) II. XX. §. 38. *seqq.*

**) *Obs. J. N. LXVI.*

DCXCVIII.

Nec quidquam juvat adversarios Hebræorum exemplum, qui varios populos facinorosos vi destruxerunt. Aderat enim expressum Dei mandatum, quod uti per se non præsumitur, ita nec falsa fingere vaticinia, nec vera in eum sensum detorquere licebit. GROTI. II. XXII. 15.

DCXCIX.

Sed ex eo quoque, quod blasphemia, & aliquando ingratitude puniantur legibus civilibus, nulla potest duci ad bellum punitivum conclusio. Nam pœnæ ideo in republica decernuntur, quod hæc vitia ipsi sunt perniciofa societati, cui singuli se subjecerunt cives; ut porro si Imperanti, cujus est obligationes naturales imperfectas perfectas facere, non paruerint, pœnam omnino mereantur.

DCC.

Illud tamen facile concesserim, causam bello justam præbere religionem aliis injuriosam, veluti ut immolentur peregrini & humanæ victimæ; quo sensu Christianis fœdera contro infideles ineunda, scilicet *grassante armis hoste impio*, verissime tradidit GROTIUS *) male a quibusdam reprehensus.

*) *L. II. c. XV. §. 4.*

DCCI.

Et si vero concederetur expedire populo; ut alteri pareret, hocce imperium tamen nemo sibi potest adrogare in invitatos, quum cogere alterum non liceat ad id, quod ipsi est utile futurum, nec solum alterius commodum jus perfectum in ejusdem actiones nobis tribuat. GROTI. II. c. XXII. §. 11. *seqq.*

DCCII.

Et quoniam qui obligationi suæ satisfacit, aut jure suo utitur, nemini infert læsionem nefas certe foret, arma adversus eos populos sumere, qui bona & personas

nas fuorum civium, veluti nuptiis ac commerciis augere, & fines imperii occupatione, pactis, hereditatibus aliisque modis legitimis dilatare fatagunt. Neque enim mala statim inferre velle præsumitur, qui inferre potest. Quare tum demum nimiam potentiam pro futura securitate imminuere licebit, si *formidabilis* sit, & *tremenda*, ea scilicet, quæ aliorum damnis crescat, vel saltem animum prodat hostilem.

DCCIII.

Unde jam corruiT DARIËSII *) argumentum, quod pateat ab experientia, debiliores a potentioribus opprimi. Nam hoc verum est de iis, qui mediis injustis nimiam potentiam sunt adepti; secus fatius fuerit, se domi munire, pangere fœdera, petere cautiones, & signum hostilis animi præstolari, cetera vero divinæ committere providentiæ.

*) *Obs. LXVI.*

DCCIV.

Sane qui alterum impedit, ne vires suas justis mediis augere possit, ei facit in-

juriam, & jus belli tribuit, quod ratione
causæ justum esse nequit ex utraque parte.
Ac profecto contraria doctrina viam ape-
rit perpetuis bellis, illudque parit absur-
dum, etiam hominem debilem vel paupe-
rem jus belli in divitem & robustum sem-
per habere. v. GROTI. II. I. §. 5. & 17.
II. XXII. §. 5. PUFEND. VIII. VI. 5.

DCCV.

Stant in *æquilibrio* gentes, quarum vi-
res ita inter se sunt divisæ, ut aliæ aliarum
impetum sustinere satis valeant. Quoniam
multa & majora fieri possunt potentiæ in-
crementa sine turbatione aliorum, sola
æquilibrii conservatio justam non tribuit bel-
li causam, quæ tum primum sese exferit,
quum illum, qui rumpit æquilibrium, po-
tentia acquisita abuti, & in aliena jura eva-
gari velle est compertum. Cf. NEUBER-
TER *diss. J. N. de justis æquilibrii finibus.*
Mogunt. 1746.

DCCVI.

Quæ quum ita sint, id quisque explo-
raturum habere debet, rationes suasorias,
quæ nimirum a solo privato commodo &
uti-

utilitate ducuntur, veluti cupiditate amœnioris sedis, inventione rerum ab aliis occupatarum, desiderio libertatis, non sufficere ad bellum jure inferendum; hæc enim non ante deliberationem habent, quam si quærat, an satius sit dissimulare, quam depellere injuriam. Bella autem gerere solius voluptatis ac vanæ gloriæ causa, immanis feritas est, quæ belluarum, ne dicam hominum excedit modum: JUSTIN. XXV. 4.

DCCVII.

Itaque jus solius convenientiæ, sive opportunitatis, quam *rationem status* perperam dicunt nonnulli, merum est commentum; nec enim utilitas ex parte tantum est metienda, sed ex toto ac consequentibus, ne jura secus fingamus repugnantia. Si vero ad id, quod mihi ab altero tribui est utile, jus habeo perfectum, alteri idcirco, quia idem a se non auferri sibi expedit, jus perfectum sit non patien- di, ut adimatur, necesse est. Quare ratio status tum demum valebit, si quærat, num

num bellum per se justum etiam cum utilitate suscipi possit.

DCCVIII.

Quoniam autem rationes justificæ palam proferri, suasoriæ vero a belligerantibus occultari maxime solent, satis in aperto positum est, cur illæ *prætextus*, hæ vero *caussæ* a POLYBIO & SUTTONIO nominentur. Cf. GROTII. II. XXII. §. I.

DCCIX.

Et quum non ex quacunque læsione, sed ex ea demum, quæ aliter declinari nequit, jus belli efflorescat, cavebit profecto arma imperare populus, quamdiu præsidium aliud, quo se tueatur, inventurus est. Hinc si de jure dubio sit quæstio, & neuter litigantium idonea fungi probatione possit, illas inire leniores vias oportebit, quas naturæ leges singulis hominibus nullius jurisdictioni subjectis præscribunt.

DCCX.

Etenim incommoda status naturalis, quamvis ea inter focios sustulerit societas civilis, inter plures tamen civitates hodiedum perdu

durant, nec eadem per commune Christianarum gentium tribunal jam a GROTIUS*) propositum, nec per comitia statuum Europæorum Abbati S. PETRI probata, nec per monarchiam universalem, quam optaverat GUNDLINGIUS**), satis videntur præcaveri posse.

*) II. XXII. §. VIII. n. 4.

**) *Diff. de statu nat. in fin.*

DCCXI.

Igitur ad eum finem adhiberi deberent sermones aut concilia legatorum, & ideo vel audiendus arbitrator, vel conciliatori, *meditatore* vocant, locus in congressu dandus, vel etiam arbiter seu disceptator deprecandus, ut si non liceat amice litem componere, transactionem inire, facere compromissum, sorti denique honestæ rem totam committere permittatur.

DCCXII.

Ad fortes licitas perperam refertur certamen inter singulos, binos, ternos, pluresve conductum ea lege, ut, cujus populi athletæ illa pugna vicissent, huic alter populus rem litigiosam præstaret, quasi

fi probatione jam sequuta. Et si enim innumera extant hujusmodi dimicationum exempla, tamen quum in causis controversis leniora præsto sint sortium genera, nefas foret utrique parti ad duriora provocare. Duellis vero proprie accenseri nequit illa pugna, qua populus, cujus res jam desperata est, certam cladem incerto paucorum periculo redimere tentaret, hoste hanc optionem permittente. Cf. GROT. II. XXIII. 10. & III. XX. 49.

DCCXIII.

Equidem non pauci inveniuntur, qui, utut damnent certamen singulare inter privatos, tamen cum *ALCIATO* *) existiment, illud inter populos decerni posse, ut sine magna clade & sine multo sanguine controversia finiatur. **) At speciosa hæc corrui argumentatio, si cogitemus, licere quidem inter duo mala minus eligere posita vera conflictatione officiorum, non extra illam.

*) *De duell. l. III.*

**) *ICKSTAT J. G. l. IV. c. II. §. 25. DARIES obs. LXVIII. §. 36. seqq. CONCINA Theol. Chr. T. II. p. 101.*

DCCXIV.

DCCXIV.

Neque pro contraria sententia quidquam probant pugnae Davidis cum Goliatho, & S. Wenceslai Regis Bohemiae cum Radislao comite de Garime. Uti enim prius exemplum speciali Dei inspirationi tribuunt sacrae literae, ita & posterius, ni falsa sit tota illa historia, eidem causae ab historicis adscribitur. *cf. P. GERDIL traité des combats singuliers c. VII. p. 112.*

DCCXV.

Ubi igitur certa est & aliter indeclinabilis juris gentium violatio, vel in re dubia nullus placido litem finiendi modo relinquitur locus, jus existit violentae executionis; in quo genere tamen illud maxime fugiendum est, ut ne remedia duriora prius, quam leniora impendantur, & ne belligerantes malis gravioribus, quam quae ad avertendam laesionem necessariae sint, hostes suos adficient. Inde fit, ut populi, antequam incursionem faciant in adversariorum fines, bellumque gerant offensivum, prius amico modo injuriae cessationem postulent, & porro si fieri possit, ad
re-

binagii in Gallos antea usurparunt. Quid vero si consueti honorum tituli Imperanti vel transitus innoxius subditis denegetur, nonne & aliis hæc ipsa poterunt denegari?

DCCXVIII.

Sed quoniam talio seu par vindicta inepta est defensionis ratio, manifestum fit, eam jure retorsionis haud contineri. Quare legatos vel obsides alienos occidere nefas foret, etsi nostri ab aliis interficiantur. Sane hujusmodi factum malo, quod jam illatum est, avertendo, aut reparando minime esset idoneum. Nec ulla fingi species potest, in qua homini alterum hominem innocentem, & a quo nulla imminet læsio, liceat sua auctoritate trucidare. GROTI. III. II. 6.

DCCXIX.

Pignorationes sunt actus, quibus res vel personæ subditorum populi unius ab altero populo *prensantur*, id est, pignori capiuntur, donec sibi de injuria satisfiat. Itaque duplex est pignorationum genus, aliud rerum seu *repressaliæ* in specie, aliud personarum seu *androlepsia*.

DCCXX.

DCCXX.

Quum populus persona sit, ac corpus morale, in quo cives singuli, veluti totidem membra, eorum vero bona tamquam partes in toto civitatis patrimonio continentur, consequens est, ut si de mitioribus debiti consecretandi remediis desperetur, tam repressaliæ, quam androlepsis non tantum moribus, sed etiam naturali gentium jure recte usurpentur.

DCCXXI.

Obtinent potissimum repressaliæ in specie, si suprema gentis tribunalia legitime requisita justitiam administrare denegent, vel protrahant injuste. Contra si homines nostri sine causa in alterius territorio detineantur, adhibetur androlepsia. Quare bona per repressalias capta jure rerum oppignoratarum, personæ vero per androlepsiam prehensæ jure obsidum censentur. *)

*) Cf. ZIEGLER *de jurib. maj.* I. c. 43 n. 10.

DCCXXII.

Scilicet uti res, & operæ hominis naturaliter obligatæ sunt creditoribus in securita-

tatem debiti, ita etiam obligatæ sunt res & operæ civitatis non jure gentium arbitrario, ut putat GROTIUS *), sed necessario. In eo tamen est differentia, quod jure naturæ in specie res auferantur tantum debitori, aut jure naturali gentium bona civis pro debito civitatis sint obstricta.

*) III. II. § 2. & §. 5. n. 2.

DCCXXIII.

Quoniam autem jus cogendi in civitate est majestaticum, perspicitur jure repressaliarum non gaudere nisi imperantes, vel horum auctoritate subditos, literis, quas vocant *marcæ*, obtentis. Hinc duo cives ejusdem civitatis, quum communia habeant judicia, læderent procul dubio Imperantis majestatem, si repressaliis inter se uterentur.

DCCXXIV.

Sed actio civis non imputatur civitati, nisi & hæc sit ejus moralis causa. Quare civitas non tenetur ex debito a suo cive cum extraneis contracto, nisi & ipsa, velu-

ti jus non reddendo, se ea de re obstringat. Eo vero magis absurdum foret, quosvis peregrinos vexare pignorationibus.

DCCXXV.

Et sicut quisque expresse vel tacite renunciare potest juri suo permissivo, ita hoc nomine pro certis rebus vel personis veluti ratione depositi, legati, obsidis, pignorationes sunt illicitæ: ea enim est harum rerum vel personarum natura, ut quoad has populus juri pignorandi renunciassse videatur. Contra cessare non intelligitur paulo ante exposita juris retorsio, quæ etiam cum legatis, obsidibus, rebusque depositis omnino exerceri potest. *cf. GROT. III. II. 7.*

DCCXXVI.

Læsionem refarcire tenetur, qui ejus est auctor. Et ideo si lædatur civis per pignorationes, indemnitas ei debetur a propria civitate, nec enim ab illo, qui exercet repressalias, sed ab eo, qui debitum non solvendo, vel jus non reddendo est

ea-

earum caussa, patitur injuriam. GROTI. III.
II. §. 7. n. 4.

DCCXXVII.

Nunc pronum erit ad gravem illam
quæstionem respondere, an justum sit bel-
lum, quod nulla prævia clarigatione aut
denunciatione est susceptum. Quum enim
*clarigatio sit rerum vel cujuscunque alterius ju-
ris clara voce facta repetitio*, *) verborum au-
tem disceptatio præcedere debeat decer-
tationem per vim, abunde intelligitur, ad
justitiam belli offensivi aliquam semper cla-
rigationem pertinere.

*) V. PLIN. XXII. 2. SERV. ad Virg. *Æn.* IX.
53. & X. 14.

DCCXXVIII.

Contra quia *bellum denunciare* populus
dicitur, qui alteri populo voluntatem jus
suum vi armata persequendi expresse de-
clarat, utique prætermitti poterit diserta
belli denunciatio, si gens, quæ clarigatum
misit, jus, quod habet belli inferendi, in-
juræ auctori satis promulgaverit; nec ma-
jus quoddam pondus pro avertenda læsio-
ne in minis inesse speretur.

Z 2 DCCXXIX.

DCCXXIX.

Equidem omitti posse clarigatio visa est Coccæjo *), primo jure talionis, dein si inutilis credatur, aut damnosa futura, in quo & GUNERUS **) ei assentitur. Enimvero talionem generatim injustam esse supra vidimus; quis vero inutilem dixerit juris repetitionem, si nusquam adhuc facta? Itaque verbis prius disceptandum est quam vi; secus enim populus armis laesifitus posset contra aggressorem iusta ignorantia se tueri.

*) *Ad Grot. III. III. 6. p. 74.*

**) *Ad Daries. §. 962.*

DCCXXX.

Quod si tamen nec legatis, nec literis ullus pateat ad hostem aditus, res ipsa loquitur, impossibile tum esse clarigationem; quam neque adhibere oportebit in bello defensivo, quippe in quo omni esset destituta effectū.

DCCXXXI.

Ex eo vero, quod quis jus suum repetat, probetque, alter intelligere satis potest, modis placidis violentos esse successu-

furos; & ideo in clarigatione tacita fere belli denunciatio continetur. Ceterum ex scopo clarigationis manifestum est, inter hanc & belli initia tantum interesse tempus debere, quantum requiritur, ut alter possit debitum vel agnoscere, vel denegare.

DCCXXXII.

Omissa autem clarigatione necessaria est belli indictio, vel sub expressa conditione, *si non satisfiat*, vel etiam sine illa, quum per se hujusmodi conditio subintelligatur, modo justa bellandi causa fuerit addita. Non igitur quisquam juste ageret, qui sub colore amicitiae vel praestandi auxilii accederet alienas terras, & vi bellica eas sibi subjiceret. Quare nullum esse bellum justum potest, nisi *quod aut rebus repetitis geratur, aut denunciatum ante sit & indictum*. CICERO. Off. I. II.

DCCXXXIII.

Sed etiam necessaria erit belli indictio, si spes sit fore, ut alter metu ad jus tribuendum impellatur, aut si ea fuerit promissa. Nimis generatim vero GROTIUS *) adferebat, non opus esse interpellatione, si do-

minus rei suæ manum injicere velit; quid enim, si res ab altero bona fide possideatur, nec ulla domini probatio sit sequuta? Id ergo tum solummodo verum erit, si apta præcesserit rerum repetitio.

*) III. III. §. 6. n. 1.

DCCXXXIV.

Modi bellum indicendi, ac ritus sunt arbitrarii. Olim legatos ac præcones, hodie edicta seu libellos publicos, vulgu *manifesta* adhibere solitum est, quorum insignis in eo statim sese exferit usus, ut quisque de justitia nostræ causæ persuadeatur. Solent autem ea aliquando bellum inchoatum subsequi, si facta clarigatione ulterior & aperta denunciatio fuisset justæ causæ nocitura.

DCCXXXV.

Itaque non prætereunda videtur illa belli publici divisio, qua prout denunciatio facta est, vel prætermissa, aliud *solemne* dicitur, aliud non *solemne*, cujus divisionis declaratio ex iis, quæ paullo ante tradita sunt, abunde intelligitur. cf. JÖH. CONV. LOCHER, *Diss. de indict. belli. Akorf. 1754.*

DCCXXXVI.

DCCXXXVI.

Differt a belli indictione ejusdem *publicatio*. Belli enim indictio fit ab adgressore ei, cum quo manu armata congredi cogitat, at belli publicatio fit ab utraque parte belligerante tam propriis subditis, quam etiam aliquando summis potestatibus aliis; ut illi nimirum cognoscant, quid sibi durante bello in personas & res hostiles liceat, & quomodo sibi ab hostium impetu præcavere teneantur, hæ autem ex justitia causæ sumant momenta nobis adfistendi, vel saltem hostibus nostris nulla præstandi auxilia.

DCCXXXVII.

Atque hunc in finem etiam edicta seu *manifesta*, & *antimanifesta* in lucem emitti solent, in quibus, cur rationibus pugnandum sit, non injuriis, res est apertior quam ut probatione indigeat. Non raro quoque publicationi adduntur *literæ evocatoria*, quibus subditi, ut redeant ex territorio hostili, admonentur.



C A P U T XXIV.

DE EO, QUOD IN HOSTEM
PUBLICCUM LICET.

DCCXXXVIII.

Bellum publicum justum quidem ratione potestatis, causæ & indictionis, tamen ratione modi, quo geritur, injustum adhuc esse potest, si nimirum vehementiora, quam scopus belli postulat, mala hosti inferantur: quod nonnisi propter conflictum officiorum, ubi scilicet impossibile est remedium lenius, majoribus malis alterum adficere sit permissum.

DCCXXXIX.

Quamvis vero hujus rei æstimatio in dubio a cujusvis gentis læsæ judicio vi naturalis libertatis pendeat, & ideo etiam jus belli ad jura indefinita referendum sit; attamen uti vis omnis, quæ ad injuriam declinandam haud est accommodata, *crudelitas bellica* dicitur, & justitiæ etiam externæ adversatur, ita quoque si remediis de se
li.

CAP. XXIV. DE EO, QUOD IN H. P. LI. 361

licitis populi belligerantes abutantur, pœnas saltem fori interni & conscientię haud evadent. *cf. GROT. L. III. c. I. & c. IV.*

DCCXL.

Ex hisce vero intelligimus, omnes molitiones, quæ natura sua ita comparatæ sunt, ut hosti injusto lædendi voluntatem vel vires adimere, atque ad præstandam integram satisfactionem eum permovere possint, etiam, durante conflictu officiorum, esse licitas. Quare non prius hæc concertandi facultas definit, quam si oblati, vel accepti, aut etiam vi extortis æquis conditionibus securitas atque indemnitas gentis læsæ sit obtenta.

DCCXLI.

Sane damna quæcunque ex bello orta, quorsum subditorum & rerum jacturæ, omnesque impensæ bellicæ pertinent, hosti injusto imputantur; negari itaque nequit, horum etiam rationem, antequam arma deponantur, esse habendam.

DCCXLII.

Et quoniam qui sufficiens sit atque efficax ad jus suum consequendum modus,

ipse justus bellator perpendere potest; nihil profecto interest, quonam loco, aut quonam tempore, porro an vi aperta, vel occulta, aut etiam alio ad hostem domandum idoneo momento, veluti metu, siti, inedia, istum conetur dearmare.

DCCXLIII.

Caveant tamen sibi civitatum rectores & belliduces, ne justam causam incertæ committant alicui, & ne vita hominum aut sanguis sine necessitate profundatur; & ideo primum ingenio, arte, ac prudentia, & demum prælio, in quo *amplius solet fortuna potestatis habere, quam virtus,* *) ipsis dimicandum est.

*) *VEGET. axiom. III. 26.*

DCCXLIV.

Porrigitur autem vis bellica cum in personas, tum in res hostiles, hoc est, tam in omnes & singulos civitatis, cum qua bellum geritur, subditos sine sexus aut ætatis discrimine, quam in totum patrimonium, quod ab universis vel immediate vel etiam mediate obtinetur, quo etiam
res

res incorporales, quæque hosti a tertio debita sunt, continentur.

DCCXLV.

Contra parcendum erit peregrinis, atque eorum bonis, in solo hostili deprehensis, si tamen se non esse de territorio ostenderint. Quin etiam personam hostilem in territorio pacato deprehensam violari vetat jus gentis, ad quam ea regio pertinet.

DCCXLVI.

Quum vero quantitas violentiæ, quæ in personas hostiles licet, ex remedii necessitate æstimetur, nemo non videt, eas aliquando capi, & vel ad modum androlepsiæ detineri, vel etiam ad subjectionem fervilem cogi, aliquando vero, si nimirum se opponant, invadi, vulnerari, immo & interfici posse. In eorum enim sævire corpora, a quibus utpote inermibus nullum metuitur periculum, summa foret injustitia & crudelitas bellica.

DCCXLVII.

Igitur recte capiuntur non milites modo, qui finem belli impediunt, sed etiam
iam

iam alii veluti viri dignitate conspici, illustres feminae ac virgines, ut hostis ita ad eos redimendos & pacem amplectendam compellatur. Quare captivos statim servos fieri nulla solida ratione demonstrari potest.

DCCXLVIII

At ii hostium subditi, quos exorto bello in nostro territorio deprehendi contigerit, protinus capi minime possunt, sed discedere volentes intra certum temporis spatium omnino dimittendi sunt, siquidem permissio peregrinis ingressu in territorium, & tuta discedendi facultas concessa esse intelligitur.

DCCXLIX

Quod si personae in captivitatem veniunt justam, imperium in eas adquisitum, nisi aliter conventum sit, tale esse praesumitur, quale origine sua in populo residebat. Quum tamen societas sine unione voluntatum nulla intelligatur, opus semper esse aliquo consensu subditorum facile quisque concesserit.

DCCL.

Quoniam omnis crudelitas a bello etiam justo exulare debet, ratio perspicua reddi poterit, cur injustum sit occidere I. fenes, effoetos, infantes, pueros, feminas aut religionis ministros, qui ab omni vi abstinent, nec ullum produnt nocendi animum; II. captos aut sine conditione deditos, nullius præcedentis delicti reos; III. arma deponentes, vitam salvam pactos, aut pacisci volentes, etsi ita reliquos terrefieri opus esse videretur; aut IV. eos, qui fortiter restiterunt in obsidione, vel etiam sine pugna sese dediderunt; temeritas enim ac pertinacia bellantium aliis adhuc viis coerceri potest.

DCCLI.

Multa tamen eveniunt indirecte & extra agentis propositum, ad quæ per se nullum competeret jus. Ita navis, domus, urbs petitur tormentis, etsi hac ratione & personæ inermes in vitæ discrimen adducantur. His igitur mala non tam inferuntur ab justo adgressore, quam ab eo, qui sine jure resistit.

DCCLII.

DCCLII.

Quæ de personis hostium dicta sunt, eadem quoque obtinent intuitu rerum hostilium. Has enim debitas hostibus retinere, tum mobiles eripere, immobiles sibi subjicere, fortalitia expugnare, & demoliri, contributiones militares pro viribus cujusque loci devicti exigere, immo & totum territorium cum imperio eidem adnexo injuriæ declinandæ causâ in suam potestatem redigere, seu occupatione bellica acquirere, naturæ legibus minime est adversum.

DCCLIII.

Ast nefas foret agros sine necessitate depopulari, incendere urbes, aliasque res vastare, seu corrumpere & destruere, quarum conservatio ad bellum faciendum, ducendum, ac renovandum nihil habet momenti, quo fere templa pertinent, imagines, sepulchra, & res, quæ religionem unice respiciunt.

DCCLIV.

Sicut personas hostiles in territorio pacato morantes violare non licet, ita &
res

res hostium in terra pacata existentes occupans injuriam faceret loci domino, cujus etiam est pars maris tantum ad globi tormentarii jactum a territorio remota.

DCCLV.

Præda sunt res mobiles a militibus hosti ablatae. Quum belli jura non unicuique civi competant, sed universæ genti, bona quoque, quorum prædam fecerunt milites, in gentis veniunt dominium, a cujus porro voluntate pendebit, an aliquid & quantum singulis prædatoribus relinquendum sit, præscribere.

DCCLVI.

Sed quoniam personas ac res ab injusto hoste ablatas iterum auferre licet, quin ambo pristinum recuperare statum, seu *postliminii* jure naturaliter gaudere possint, non est dubitandum.

DCCLVII.

Simulatio, aut dissimulatio ad hostem circumveniendum adhibita *stratagema* nuncupatur. Quum fas sit belligerantes arte & ingenio magis, quam vi aperta dimicare; dubium non habet, licita esse quæcun-

DCCLIX.

Rectius itaque alii utramque hanc damnant bellandirationem, quam sane humaniorum gentium mores nusquam comprobaverunt, *) ut adeo ad GROTII **) distinctionem, quam inter jus gentium naturale & voluntarium adduxit, confugere haud sit necesse. At inopinum militis superventum ab immisione percussoris differre haud recte quisquam negaverit.

*) VATTTEL. III. c. VIII. §. 155.

**) III. c. IV. §. 15. seqq.

DCCLX.

Multo vero minus stupra, adulteria, aliaque hujusmodi flagitia cum victis commissa congruunt armorum juri, quod nec patitur, ut feminæ impuræ ad inficiendum hostilem militem submittantur. Sane & is peccat, qui alteri peccandi causam dat, & ideo illicitum quoque erit, hostiles subditos ad prodicionem impellere, etsi operam ab iis sponte oblatam acceptare haud ita repugnet. cf. GROTI. III. I. §. 21. & 22.

DCCLXI.

De usu magiæ in hostem licito vel illicito sæpius disputatum est. Enim vero quin ad magiam naturalem recurrere liceat, nemo inficias iverit; cetera vero magiæ genera jam inania sunt commenta *). Quod si quis tamen huic veritati non assentiatur, & nos velit responsum dare non subterfugere, is cogitet, officia erga Deum negativa omnium esse antiquissima.

*) Cf. CONSTANTIN. FRANC. DE CAUZ *de cultibus magicis. Vindob. 1767.*

DCCLXII.

Inter remedia, quibus hostium vires franguntur, armorum auxilium imploratio reperitur. Itaque quælibet gens jure hujusmodi implorandi auxilia, & hinc bellicam societatem ineundi, seu belli foedera percutiendi gaudet. Quum vero, qui meum hostem adjuvat, belli fiat particips, quæ hætenus de justo vel injusto hoste tradita sunt, ea omnia ad belli socios adplicanda sunt.

DCCLXIII.

DCCLXIII.

Sicut ergo præstare homini auxilia licet in bello justo ex solo humanæ naturæ vinculo, ita etiam succurrere genti bello injusto laceffitæ omnino est permiffum, etfi nullum præcefferit fœdus; nec ideo gens judicium in alteram gentem sibi videtur usurpare. Distinctiones a KOEHLERO adlatæ *) rationibus pollicitis magis, quam juridicis nituntur. v. KEUFEL *Exer. ad Grot. §. 38.*

*) *J. N. §p. VII. §. 1818.*

DCCLXIV.

At contractus de præstandis operis militaribus tum solum vitio caret, si satis de justitia belli constet. Improbum igitur esset militiæ genus, quo peregrini mercede conducti militarent sine ulla causæ cognitione. Cf. PUFEND. *VIII. I. 8.* KEUFEL. *l. c. §. 176.*

DCCLXV.

Bellum uni genti indictum omnibus etiam ejus focis indictum censetur. Displicet id VATTILIO *), aliisque, qui belli socios ab aliis distinguunt, qui vi fœderis

defensivi determinata mittunt auxilia. At hæc distinctio a rationibus rursum politicis potius, quam juridicis derivatur. Cf. GROTI. I. c. V. §. I. seqq. & II. c. XXV. KEUFEL. §. 180. & 200.

*) III. c. VI. 95.

DCCLXVI.

Et quoniam belli focii viribus suis physicis concurrunt ad bellum gerendum, res etiam occupatione bellica adquisitæ dividendæ erunt pro rata cum illis, nisi aliter conventum sit; quod utique licet ad evitandas lites.

DCCLXVII.

Intercedere populi alterius armis seu eidem adfistere actio est positiva, quæ requirit occasionem, de qua cuique suum permittendum est iudicium. Quemadmodum porro homines singuli, ita & gentes nullo speciali fœdere obstrictæ jure utuntur *neutralitatis*, seu neutras sequendi partes.

DCCLXVIII.

Hoc qui faciunt, manent in bello mediis, igitur alieni esse debent a favore & flu-

studio partium, hoc est, nullum conatum alterutri belligeranti peculiaria præstandi auxilia præferre. Quod si uni parti quid permittitur velut annonæ coemptio, transitus militum, & alteri idem erit permittendum.

DCCLXIX.

Porro in bello medii pati non possunt, ut in suis territoriis hostis unus res alterius capiat, vel personas persequatur. Sane justitia causæ sufficiens ratio non est, ob quam quis jus in alterius non hostis regionem sibi adrogare queat.

DCCLXX.

Inde quoque patet, cur qui urbi obsessæ aliquid ad fovendam defensionem advehit, medius non maneat; quapropter res ejus intercipiuntur sine injuria. Quod si vero pangantur neutralitatis fœdera, seu pacta, ut populus alteri populo non suppeditet auxilia bellica; non ideo quis pacata continuare commercia, vel genti cetera præstare officia prohibetur, quæ pacis etiam tempore debentur. Cf. GROTIUS III. c. I. §. 5. & c. XVII. §. 1. seqq. KEUF. ad Grot. §. 181. seqq.



C A P U T XXV.

DE CONVENTIS BELLICIS ET PAC- TIONE PACIS,

DCCLXXI.

Conventiones, quæ inter hostes fiunt, prout vel suspendunt actus bellicos, vel finiunt, vel ad aliam quamdam præstationem pertinent, nunc *induciæ*, nunc *pactio pacis*, nunc *conventiones bellicæ* nominantur.

DCCLXXII.

Atque in hoc postremo genere eminent pacta de permutandis vel redimendis captivis vulgo *cartels*, porro de pretio determinato seu lytro pro horum redditione solvendo, tum pactum deditionis, vi cuius aut certa regio, urbs, munimentum, aut certæ personæ hostium potestati permittuntur. Quarum conventionum quanta vis sit, ex iis, quæ alibi de pactis & de interpretatione tradita sunt, eruendum est.

DCCLXXIII.

DCCLXXIII.

Quoniam lytrum ea lege solvitur, ut captivus a captivitate dimittatur, sequitur, ut eo ante redemptionem mortuo nullum debeatur lytrum; contra ut si redemptus iterum capiatur, is ad novam lytri præstationem obligetur. *cf. HERT. Diff. de lytro.*

DCCLXXIV.

Uti vero injustus hostis homo esse non definit, nec juris rite acquirendi moralem amittit facultatem, ita quisque hostilem animum deponere, ac injuriam sibi illatam vel penitus, vel pro parte remittere, aut etiam alteri juri suo permissivo renunciare potest. Ex quo conficitur, firma atque obligatoria esse debere, quæcunque de re possibili panguntur conventa bellica, sine quibus sæpe nec medio leniori ad declinandam læsionem uti, nec pacem nisi sequuta utriusque vel unius saltem gentis belligerantis internecone reducere liceret.

DCCLXXV.

Non ergo cum stratagemate confundendum erit mendacium, atque perfidia, seu pacti cum hoste durante bello initi vio-

latio; hac enim admissa nullus sane foret conducibilis bellorum exitus. Quin quo magis interest humanæ societatis hæc pacta servari, eo major etiam est eorum sanctitas, quæ & ab obligatione Imperantis erga suos cives accipit incrementum.

DCCLXXVI.

Equidem injustum hostem rebus corporalibus ac incorporalibus sive juribus spoliare lege naturali est concessum, & hinc gens, cujus justa sunt arma, nec pactis ante bellum cum hoste initis stare debet, nec quod vi talium pactorum fuerat præstitum, adimere prohibetur, quin potius id, quod ipsa debet hosti, cum eo, quod sibi ab illo debetur, compensare, vel in satisfactionem retinere potest.

DCCLXXVII.

Enimvero nihil sane obstat, quo minus hocce jure suo compensationis vel retentionis quis se abdicet vel in ipso bello, vel etiam in antecessum; quod si fuerat factum, injustum foret ad jus jam remissum atque extinctum provocare.

DCCLXXVIII.

DCCLXXVIII.

Itaque inanis est distinctio PUFENDOR-
FII *) inter pacta, quæ ad pacem tendunt,
& quæ statum belli relinquunt, neque ad
eum tollendum spectant; semper enim ve-
rum est, in re pacto valido excepta sta-
tum belli cessare.

*) VIII. c. VII. §. 2.

DCCLXXIX.

Induciæ sunt pacta inter hostes de acti-
bus bellicis ad certum tempus suspenden-
dis, exque vel *universales* sunt, si vis bel-
lica omnis cesset, atque ubique, vel *par-
ticulares*, si per modum privilegii certis re-
bus tantum vel personis immunitas a vi bel-
lica, veluti *salva guardia*, aut liber com-
meatus concedatur.*

DCCLXXX.

Fiunt porro *induciæ* vel ad breve
tempus, & certi negotii peragendi causa,
veluti ad mortuos sepeliendos, & dicuntur
armistitia, vel etiam ad longius tempus, in
quo totus belli adparatus dissolvitur, &
sunt *induciæ* strictim sumtæ.

Aa 5 DCCLXXXI.

DCCLXXXI.

Universales & longas inducias faciendi jus tantum competit summo Imperanti; ast particulares & breves etiam ministri publici intra fines suæ potestatis sancire possunt. Quamprimum vero induciæ placuerunt, eæ statim promulgandæ sunt; quod enim antea infertur damnum, pro casuali habetur, nec a contrahentibus, si nihil illis possit imputari, erit refarciendum. Quamvis in alia omnia GROTIUS *) abeat.

*) III. XXI. §. 5.

DCCLXXXII.

Tempore induciarum plena adesse debet securitas; quare loca incustodita occupari, aut vallum refici, aut auxilium urbi laboranti mitti nequeunt, ast mœnia intra suos fines reparare, militem conscribere omnino licet. Quod si tempus induciarum finitum sit, hostilitates sine nova belli indictione renovari possunt.

DCCLXXXIII.

Quando vero tempus illud sit lapsum, sæpe in dubium vocari potest. Scilicet
vel

vel tempus additur continuum, velut per XXX. dies, & tum numeratio facienda est ad momentum; vel certus assignatur terminus, uti usque ad Kalendas Januarii, quo casu dies, *a quo* incipere dicitur mensura temporis, est etiam intra mensuram; contra dies vel mensis, usque *ad quem* dictum est duraturas inducias, exclusus intelligitur. Cf. KEUFEL. *ad Grot.* §. 313.

DCCLXXXIV.

Sicut autem privata auctoritate induciæ non ineuntur, ita etiam vis a privatis adhibita eas rumpere non potest, nisi Imperantis adprobatio accesserit. Injustum itaque foret hostile factum a cive commissum toti civitati imputare, & in eo prætextum recedendi ab induciis ementiri,

DCCLXXXV.

Quoniam *pactio pacis* inter gentes est conventio, quæ finem bello publico Imponit, consequens est, ut si fuerit inita ac promulgata, quicumque conatus mala sibi invicem inferendi perpetuo & in omne ævum definere debeat. Et contrahentes quidem *pactione pacis* statim obligantur, ut pri-

primum fuerit facta ; horum vero subditi nonnisi sequuta publicatione, vel a tempore convento.

DCCLXXXVI.

Sed in numero pactioⁿum pacis illud quoque continetur pactum, quo populus devictus imperio populi victoris se submittit, quod pactum subjectionis audit, tum & foedus inæquale quod nonnunquam ad tollendas hostilitates celebrari consuevit.

DCCLXXXVII.

Qui jura majestatica exercere nequeunt, veluti reges impuberes, aut dementes, nec pacis condendæ habent potestatem. At invasori, cui fidem dederunt subditi, quoniam ad eum spectat imperii administratio, uti & regi captivo regni patrimonialis jus in eundæ pacis haud recte denegatur. Quod si imperans regni non patrimonialis fuerit captus, pax ab iis fieri debet, qui vel jure successionis gaudent, vel reliquam administrant rempublicam.

DCCLXXXVIII.

Quamvis alterutrius populi belligerantis causa semper sit injusta, quum tamen
id

id agnoscere, aut saltem fateri uterque detrectet, nec ullus inter eos sedeat iudex, res profecto careret exitu, si, a cuius parte stet veritas, decidere, & quantum quis tum ex causa belli, tum pro damnis inter arma illatis petere possit, definire oporteret. Nulla igitur alia superest via, quam ut lis in foro externo dubia dato aliquo vel promisso, vel retento, hoc est, per transactionem finiatur.

DCCLXXXIX.

Hinc est, quod in conventionem pacis vel omnia eo, quo sunt loco, relinquuntur, vel in priorem restituantur locum, vel quædam bello capta reddantur, alia retineantur, vel etiam alia insuper præstentur. Stipulatio vero de restituendis bello captis ad res mobiles haud pertinet, quia has restituere foret impossibile, nisi quædam expresse excipiantur.

DCCXC.

Ex quibus consequitur I. ut pactio pacis iustitiam vel iniustitiam belli non decidat, nec de controversiis, quæ circa facta in bello oriri poterant, pronunciet; II. ut fal-

falsa sit doctrina COCCERJ *) dari inter gentes jus quoddam victoriæ. Cf. tamen KOEHLER. l. c. §. 1812. GUNER *ad Daries*. §. 370.

*) *Comment. ad Grot. prol.* §. 27.

DCCXCI.

Transactiōe facta non quæritur, justane fuerit prætenſio, vel injuſta, ſed an ſit tranſactum; itaque gentes, quæ litem, unde bellum ortum eſt, mutuo conſenſu componunt, juri, quod habebant res ſuas vi armorum perſequendi, renunciant, & debitum ſibi invicem condonant. Injuſta porro eſſent arma, quæ pacem rumperent, ſeu litem de eadem re, ob quam bellum geſtum fuerat, renovarent.

DCCXCII.

At rumpi pax dici nequit, ſi bellum inchoetur ex alia cauſſa, qualis eſſet & obligatio præſtandi auxilia fociiſ, ratione quorum nulla facta eſt neutralitatis ſtipulatio. Nec paci derogat fœdus bellicum iſtum cum alia gente, ea lege, ut ſi alter populus pacem rumperet, illum adgredi, &
re-

rebus in pacis conventionione adquisitis spoliare, easque priori possessori restituere oporteat.

DCCXCIII.

Articuli pacis sunt singula ejus capita, in quibus de rebus præstandis singillatim est conventum. Igitur si altera pars articulum non servet, etiam altera reliquos tam connexos, quam divisos rumpere jure potest, nisi diserta conventionione aliud placuerit. *) Peccata tamen subditorum pacem non infringunt, nisi eorum auctor imperans fuerit.

*) Cf. WOLF, *Inst. J. N. §.* 1230.

DCCXCIV.

Nec pax irrita redditur metus exceptione, ut voluit PUFENDORFIUS *). Justitia enim metus hic non a causa, sed a jure belli utrique belligerantium competente repetenda venit. Quumque pax metu extorta suapte natura obliget, opus non erit, ut jurejurando sit firmata. Quare remisso etiam sacramento duraret tamen obligatio principalis, quæ ab eo solum, cui

cui jus quæsitum est, remitti potest. Cf.
KOBHLER. *h. c.* §. 2069.

*) VIII. c. 8. §. 1.

DCCXCV.

Pax, cujus celebrandæ causâ unica fuit dolus, pax *Antalcidæ* audit. Quoniam nihil magis consensui adversatur, quam error ac dolus essentialis, sine consensu vero nulla intelligitur pactio, non obîcurum est, pacem antalcidæ omni obligationis effectu esse destitutam.

DCCXCVI.

Amnestia est malorum, quæ partes beligerantes sibi durante bello intulerunt, sancita perpetua oblivio. Quoniam facta pace ob eandem causâ bellum amplius suscipere non licet, evidens est, in pactione pacis etiam amnestiam pro foro externo contineri; quæ tamen ad ea, quæ ante vel citra bellum debentur, nequaquam porrigitur. v. CHR. KLÜX *Diss. de amnest.* Lips. 1736.

DCCXCVII.

DCCXCVII.

Et sicut cum sociis bellicis, qui pacem pangunt, idem fuit bellum, ita & illi in pactio-
ne pacis & amnestia comprehensi præsumun-
tur, nisi & cum his peculiare fuisset bellum.

DCCXCVIII.

Is pacis conventionem exsequitur, qui id facit, quod in eadem fuerat promissum; igitur illam vel statim exsequi oportet, vel intra tempus præstitutum. Et quia jus populi, cui alter populus se aliquid daturum, vel restitutum promisit, illico oritur ex transactione bellica, res etiam in eo statu tradendæ sunt, in quo fuerant tempore conclusæ pacis.

DCCXCIX.

Quare res vi transactionis restituendas deteriorare, corrumpere, monumenta demoliri minime licebit; immo vero jura ei cohærentia, fructus, causæ, & accessiones, omniaque incrementa a die factæ promissionis & acceptationis parti stipulanti sunt præstanda. Quod si promittatur restitutio in eo, in quo ante bellum fuit statu, naturale est, ut tempus, quo bellum cœpit initium, intelligatur.

DCCC.

Ceterum quum quo majori infortunio quis
maclat genus humanum, eo gravioris scele-
ris sit reus, nihil vero magis hominum tur-
bet societates, quam belli calamitas, uti-
nam qui belli sine justa causa gerendi aut
pacis rumpendæ suafores sunt, auctores-
ve, cogitarent prius, hujusmodi actus &
operationes bellicas esse injustas invasio-
nes ac vera latrocinia, & hinc si hostes oc-
cidant, vel res illis eripiant, esse se omni
privato prædone nequiores.

DCCCI.

Illud porro SALLUSTII in animum in-
ducant suum: *Omne bellum sumi facile, ce-
terum ægerrime desinere, non in ejusdem po-
testate initium ejus & finem esse: incipere cuivis
etiam ignavo licere; deponi, cum victores ve-
lint *)*. Ceteroquin, etsi a nobis ostensum sit,
pacem armis utut injustis extortam esse ser-
vandam in foro externo, Dei tamen judicium
evadere non poterunt hujusmodi bellatores.

*) SALLUST. *Bell. Jugurth. c. LXXXV.*



ADT
131810125
XV III



1. 2. 3. 4. 5. 6. 7. 8. 9. 10. 11. 12. 13. 14. 15. 16. 17. 18. 19. 20. 21. 22. 23. 24. 25. 26. 27. 28. 29. 30. 31. 32. 33. 34. 35. 36. 37. 38. 39. 40. 41. 42. 43. 44. 45. 46. 47. 48. 49. 50. 51. 52. 53. 54. 55. 56. 57. 58. 59. 60. 61. 62. 63. 64. 65. 66. 67. 68. 69. 70. 71. 72. 73. 74. 75. 76. 77. 78. 79. 80. 81. 82. 83. 84. 85. 86. 87. 88. 89. 90. 91. 92. 93. 94. 95. 96. 97. 98. 99. 100.



